

又雅不善排遣就醫不可絕客不能衡且朝夕  
扶將調藥餌之不暇而暇及其他乎筆硯之事  
輟而不講久矣三秋若馳倏忽虛度上負知己  
愧恨何言乃若老兄雖一城斗大未能展錯大  
才而擁笏垂魚出入覲兩人自是不惡何感而  
咄咄自歎兄不記南窓下閣筆咬指兩手爲禿  
乎似此苦惱亦何足思也二三兄弟落落如初  
裳甫老大得兒朞月竟天獨兄差爲吐氣而位  
不稱德蘭苗未芽倘亦造物者顧才而玉之耶

天地間惟聖人能合命亦有剛強者可抗命弟  
故於子息上亦未甚着意諺云未得其母安得  
其子之謂也輒有小詩奉懷并上一笑

蹇理庵撫臺

不肖輕塵弱草萎弃自甘不意閭浮大樹亦爲  
蚍蜉撼動老伯之實心實政真廉真才誰不知  
者昨薄游至漁陽三尺童子誰不思者豈待揭  
辨始明百人種樹一人拔之且奈何哉嚼不至  
天還從已墮其于老伯何傷但恐自此英雄豪

縉山先生集 卷之十七  
傑以老伯爲戒則壇圉社稷之事有可痛哭而  
長太息者耳某驚弦之鳥絕意高飛橐筆塚書  
自謂可逃造化之忌而酷窮未已一婦一子相  
繼夭亡寃親刀俎備嘗之矣但得留此皮骨再  
見長者卽已厚幸豈得復有妄想也

申經峪孝廉

奉手書固知六逆殄行朝野同慨家君含辛茹  
苦成得一事反增忌眼之熱亦復何堪計惟有  
一歸耳乃吾鄉刁訟橫起蝸蟻沸羹又有甚於  
輦轂者以所聞令外家之事何其愈出愈新爲  
政者不務使陂池塘澤各鍾其美而必欲鋤之  
使平且無論體統蕩盡風俗壞盡而亦豈所以  
爲小民之利乎愚父子嘗太息於斯蓋漸恐猘  
偷食人桑田化海而非徒爲師門一家之疼熱  
也

馮琢庵宮詹

居常疑今之交情太易或難太深或淺誰能隔  
垣墻見人而遽輸肝膽者文字之交猶近心善

哉乎言也以文徵交亦有兩言真人之息以踵  
衆人以喉見先生之文自見其人雖不交一臂  
者精神當自往况及事先生者乎家君顛顛抱  
樸與世多牴牾顧獨以緇衣好賢之心爲先生  
所知昨猶借聲而揚今且欲剖血而哺之何以  
得此於先生也別論諄復可謂精貫虱心妙伏  
鵠卵敬輿讓微子瞻遜實天下紛紛非命世才  
不能定也其在先生乎家君亦是訓是行奉尺  
度惟謹出閣之事雖未美蒲夫亦爲之兆矣獨

聚訟如豈泣釜內御朝如電閃雲中究竟兩端  
實互相根抵上如暗中視明下如明中視暗各  
不相知各持其是今所謂似隔絕似決裂耳後  
必有真者方其似則人皆能言及真則人又不  
敢言要之衆口之求多皆忠臣義士之資不足  
恨也先生金緋侍子舍樂不可支春蘭自芽豈  
追悼秋風之敗承示欲踈筆硯竊恐未能天生  
先生廣長舌不說盡三千大千法豈得遂入嬾  
殘門頭夫纖塵不起晏坐而萬用歷然如是則先生

退盡時也若不肖才不能半斗讀書不能盡一卷雖人休而我不休尚不如人矧原不如人者九方臯之鞭駿馬見之決驟若駑馬效之則蹄而絕矣人豈不自知此亦絕不染指獨有亡婦哀詞數章欲博先生一言爲亡人不朽之寄若惠然見許幸附便郵致之

寄公孝與

重辱報函回環捧讀四年前相與光景忽若夢見旣感且憐又爲兄喜也人當此陰陽之罰金

石可銷而兄之靈心秀穎絕不爲愁慘之所耗磨窮愁之所窘縛天生此才豈偶然哉弟嘗言兄才腴弟才癯弟今爲已醉之楓而兄且爲方莢之柳養氣待時而已不憂不遇矣第來書謬相崇飾譽望過情以生平之知不宜有此弟之心腑能孳斂而不能發揚兄所知也此次入長安更掩閉如三月新婦邑邑不可言每日高春而起與守閭親故談晴說雨賭棋數枰惟市語與呵殿聲耳中訇訇然俄而歸鳥如烟小鳥啁

嘶簷際則日已向夕如是日夜不幾何而又一  
寒暑矣比浹月之間失一妻一子生趣都盡坐  
卧威儀總不出尋丈之外天刑人忌曾不少假  
而不意老鶻空中摩拳有探巢之意閉閣思過  
怨艾無從吾兄試設身處地且當奈何哉願兄  
且姑置帝平之頌思得一市朝中山林者以處  
我則不佞知所托足矣

馮文所

讀來翰桂林昭州烟嵐雲氣橫來樸人不覺  
與色俱飛也乃知四天未垂不令佳山水沒沒  
而鷺濤未發鳳彩猶含門下第出其囊底才以  
黼黻河漢自是造化靈氣一開闢也某自脚踏  
長安門望墻外榆錢柳花已作寶林祇樹想石  
洞仙人自歌自舞何緣作此好夢伊吾之業已  
束而廢之以鈍就懶忘廢頓盡自守妻子理藥  
物之外惟與二三親友閉門飧餽作牧豬戲  
度日若有暇究天地所窮際則先究此人我是  
非所窮際矣家君種種艱苦前已具訴今上下

相持於毒風暗雨中溺未及胥舵師已任其咎  
比所爲強顏再出忍詬而待者以前未了事有  
餘覲耳今彌覲彌遠極不過明歲決歸矣閣部  
不相能邸報可見顧考功素稱知己亦絕不復  
往來彼避羶遠賦一至於此可歎

緱山先生文集卷之十七

緱山先生集卷之十八

太倉王衡辰玉甫著

男時敏

婿李穀

校

陳章閣憲副



門下才焱廣馭智刃疾驅玉衡金鏡之司定且  
掃席而待矣某謏才叨雋向因偃僂而告門下  
以雲路爲畏途今果高明鬼瞰福過災生卒有  
先姊意外之變不肖痛切鮮兄情難將毋春燈

花月盡成斷腸何暇論朝夕之外哉春季之事  
分屬空花然家門薄祐某固深以寂寞爲佳境  
門下知我當不以鄙言爲欺也

蔡思川侍御

生平仰止之私終以守株自限昨廁名賢書而  
得拜臺下於鹿鳴之席一第不足喜喜以此爲  
龍門階耳顧蚤負難勝鼠腹易溢彈冠未幾而  
哢哢者且張彌天之羅在愚父子固不足惜獨  
恨以臺下典試事而使曳白者倖進天下遂謂

臺下繡斧不伐佞文多不觸邪嗟乎某自後且  
不敢以不潔之身事臺下矣况敢重以汗大君  
子齒牙哉今家君業已裂冠毀冕不肖業已裹  
筆焚書以謝言者心無愧怍成敗毀譽輕如鴻  
毛獨歎士有知己不能報萬分之一而首以穢  
詬相蒙中夜捫心不能喻之於懷耳

吳復庵翰學

今世學士大夫望先生之門如登龍焉而某扳  
緣世誼不介紹而得師事先生於鄙願足矣而

自五稔以來不及奏尺楮於記室敢忘之耶誠  
念名之所在與其進也寧退且不敢以事衆人  
者事先生也而茲者先生乃儼然以叨雋枉賀  
享鸚鐘鼓被狙衣冠非分之寵驚而欲逃然亦  
幸先生之果貫我而索之形骸之外也某竊自  
揣頑心鈍質斧斤不能材鑪冶不能化而當世  
大人君子每不靳以齒牙借之或向所謂硜硜  
者未失耳今愛我者譽爲南金憎我者詆爲盜  
賊瓠落之軀犧尊溝洫任人所置可謂兩非其

質矣但私憐德涼祐薄不幸有無妄之福致無  
妄之災而又不幸動皇上不測之怒日中見沫  
盛夏造冰其初一人謗貞女爲善淫而其究天  
下混啼鴟爲鳴鳳此賤士顛天而深爲千古折  
檻裂麻之士稱冤者也家君口無擇言心無匿  
怨無擇言則叢謗無匿怨則招侮斷不可久以  
不進不退之身爲世笑端計惟有一去以避之  
是非天下大豪傑鎮定衡平割以智刃啾啾者  
何時而定當今命世非先生而誰雖東山卧穩



然恐天終不得不以蒼生累先生矣書生妄言  
至此饒舌死罪

馬肖乾兄弟

門下讀禮未闌乃儼然破涕爲通家小子彈冠  
啟函捧簡感與愧俱某樸遯材也三試三蹶已  
絕奮飛之望而不幸瓠落之質謬爲官師所材  
福過災生致使鬼瞰我室蟲射我影今愚父子  
冤驚覆轍之途心怯虛弓之墮焚書塚筆以謝  
言者猶懼不免况敢論尺寸之外乎觸目憂憤  
行將跼伏田間爲世老農所恨門下振轡入都  
不得躬候道左訴此冤抑耳

李霖寰學道

憶白下從化人而登虛臺爾時自覺一世無人  
今涉世又十餘年而一世猶然無人也衡下快  
風長安朗月或聞聲而相思或進前而不御今  
遂塵垢滿面壘塊滿胃末由洗伐以事長者其  
他企慕睽違之想所弗論矣衡欵啟寡聞之民  
也九能無術五技不成而頃又以枋榆之進爲

世大詬乃先生顧辱以齒牙必欲斷繡鐵之光  
發枯桐之響不亦遠乎若臺下文章籍甚風采  
正新昨讀校士諸篇手足欲舞此豈不得已而  
游於世者荷天之衢道將大行吾曹可以隱矣  
衡之於文猶醢鷄也頃循先生之旨尋其肯綮  
粗能成篇然奏刃格然動至血指先生豈欺我  
哉文王而嗜昌歎亦嗜之一癖也多難畏人譽  
不如毀先生無愛我而益其疾矣

### 水利道

恭惟臺下智刃熟游德車攸載秉玄圭而治水  
沉白璧以捷河惟手足之烈多乃咽喉之梗去  
愚民易樂成而難慮始初或興子產之謠仁者  
有永利而無近功終大享鄭渠之澤土膏滋而  
斤鹵變水維緩而魚鰲寧萬頃皆同樂周原之  
臚臚三江底定著禹跡之章章民乃知公植我  
以田疇公亦自謂盡力於溝洫家君初偶任心  
而排衆議繼直信耳而述口碑適觀桑梓之安  
共沐雨膏之潤譬彼望春而秀草木豈知謝榮

抑亦登高以呼風力未嘗借響比老親私歸之  
役何敢聞諸候人而材官載餽以來顧將命於  
長者珍錯在篚旨酒在罌庭實寵於百朋禁巒  
加於九鼎旣已屬厭小人之腹敢不敬舉邦君  
之觴口腹知恩肺肝銘賜不腆荒啟統冀弘慈

周志齋撫臺

半生鈍置苟求寸進以了讀書願耳如今最更  
非其攄大非所樂且以事言則名勝者實浮以  
理言則履滿者招損臺下不爲愚父子一思之

耶眼前非分之福已自難當若教之得隴望蜀  
則不肖驚而反走矣憶初奉教時臺下第云秋  
試得一春試不免讓人乃又不能無叩於臺下  
者蓋比來國事彌難人心愈變家君以輕權而  
塞厚望家間以薄德而履泰名陰有射工世無  
公道悠悠蒼天竟未審以何日得歸何計得歸  
蓋不問進步問退步乃真問卜不教之趨福教  
之避禍乃真教誨也家君勒啟奉瀆衡再爲之  
百拜以請

董定所

衡至無似承足下賜之書媿媿數百言辭盛指  
過不敢受而有也以足下之才氣憑陵千秋何  
止白眼當世而乃欲壁真我於兩楹之間則且  
驚而反走矣不肖鷄翼未齊蟬腹已飽而復追  
飛逐走以橫世羅下招時人之讒上激烈士之  
憤跼天踏地愧無所容第使真如足下之云弟  
卽不能鮮衣怒馬爲富貴兒容然於晨昏襤襪  
有餘矣何道而得此總之行路雨風無處不有

何足滿一笑獨恨日日混沌此七竅於長安車  
塵中所爲欲橫經而問如黃夫子奉席而請如  
董先生者皆不得如人意孤燈殘卷獨此介介  
耳

黃寓庸

前歲冬王罔伯曾致足下一簡比時值多口不  
暇答亦以無便郵不時答也然置之懷袖紙救  
墨渝所不敢忘且足下亦奚取於弟弟羽毛齒  
角已登於時人之俎何敢望與海內名公雅儒

矩步後先而足下才氣又豪甚落落不可千古  
亦何取於無所短長之人而使束敝帚爲前茅  
也則丈固知弟而亦不可謂真知弟然弟則不  
可謂不知足下矣足下之文穿天心破月脇貞  
心秀骨非待萬物而才者豈足下且暮遇聖賢  
乎世間青白兩眼眈眈逐人要其極至則吳干  
必飛卞玉必剖足下誠持此格掌取功名使天  
下自此不遂瓦棄黃鐘則斯文尚在吾舌亦尚  
在也比有新作不近草一帙與曩刻小同異姑

籍手以報瓊瑤夏秋間且稟郢墨於函丈茲不  
狀

張業師

自古偉人達士不家於官彭澤歸來不免鄰乞  
今吾師解組未幾而有終歲之憂五味生涯四  
壁圖史此可羨不可歎也若不敏日侍老親親  
病而病親憂而憂朝於醫而夕於客乃真少味  
耳陸明府係敝同年平日竿牘之問不遺境外  
倘惠而相聞於齒頰豈有愛者第陸公下車已

又計必能先式徐孺之間不待不敏爲之先容矣

黃明宇縣尹

弟不佞生平局局墨守非能恬於世味蓋性實畏之至今日而始知楮墨中有戈鋌衣冠中有陷穽喟然而歎矍然而起則左足已先繫矣自惟謏劣進而爭雉膏則不足退而棄腐鼠則有餘故先去以藏拙而門下復橫相推許勗以丹青之價必欲使錐出囊而劔脫礪是非不肖之

福不敢聞命也竊惟門下實心實政古之孝廉循良也以施於浙之慈疑於結繩不如製網而究乃治行爲天下第一者則以吾丈仁心爲質精神真而蘊籍厚也門下不握潁川璽則褰長安帷尚借譽人口哉適待命高郵尊東已附郵使從容自以報章上涓史茲不盡

華述齋都事

不肖於文章蓋未發醯鷄之覆而風波及之兩載以來浮沉車馬間已發願作率爾人不意尚

掛先生齒牙也鷄肋功名吾意已輕吾命不得不重支干不靈其以是乎

李太瀛紀善

惟六年前不肖方爲竈下之爨而猥辱高山流水之知攀附恩私前茅始試比時雖黃金築臺不足爲重惟以孫陽一顧沾沾自竒不圖過情之譽非分之福招毀而速謗至於今日也讒廢以來不復見衣冠不復探除目獨胷中有一知已不能忘間以問人始知門下輔賢王介左相

以出卽門下亦豈遽以楚醴爲薄矚然有遠心其亦王之不忍私其股肱而獻諸天子也如楊文貞周文襄自藩封爲名宰執此皆門下分內事獨不知今之用人者謂何耳門下方授簡鬼園而遂有雲中鷄犬之慕青青叢桂願與同仇姑俟向子平婚嫁事畢謝安石蒼生事畢而後相與把袂入山庶不爲風塵之士所姍笑耳不肖自入長安濕灰稿木應酬都廢非張先生爲書郵白鴻頰鯉且杳相望於咫尺之外矣惟台

慈原而貫之

張無隅主政

場文新體讀者舉爲戲笑弟每感額不怡此卽  
奔星流火之異何詎至此方今朝市講張變怪  
已極然以文運推之此直洪流之濫觴耳放而  
決決必更有異此皆吾曹眼中事不可不慮也  
鄉中試卷一至長安指而笑罵者不少然亦有  
隨聲笑罵而陰薦爲上味者數月之後想笑罵  
者皆讚嘆矣獨一何儀部銳然欲叅論而今復

以事左遷可復奈何要之我自用法男子心  
腹腎腸若使爲采生妖人貿易駈使入慙妻子  
卧慙夢寐寧死不可爲也今弟已爲門外漢何  
敢復操雌黃此自兄等旗鼓場中事耳叔達滿  
口粉黛乃弟今歲禁足則叔達亦禁足大類比  
目魚也附聞一笑

黃葵陽座師

蓋聞卞和氏之所寶無慈石也故不難重繭而  
獻之連城以酬之甚至泣血以明之若衡則碌



碌石耳而至勤吾夫子之泣又或因夫子之泣  
而求多於衡則衡雖捐此身指拇膚髮皆不足  
以償知己之一毛計惟買絲繡作平原君以肝  
膽供養勿替耳真人東行大難遂解回首驚波  
駭浪蕩爲清風已矣勿言之矣但吾師息肩道  
園吐納靈氣而彼歛歛者方且鼓掌於黃埃黑  
霧之中不知彼勝我負如來眼開真可憐愍以  
我無諍破彼之諍是在吾師若家君病骨半蘇  
鄉心如醉而終不得明王之憐視桑麻里如在

天上深恨造物者不極伎倆使之躡我踐我一  
以爲病夫惜福而且期以其間從我師於滄浪  
烟雨之間也匆匆附候不一

黃葵陽座師

大兄到道老師近履甚悉蒲團竹杖之暇邦人  
晚生彬彬門墻間與聞悟性靈言之口甘不啻  
農山問答亦肯爲不肖衡留半席不也教中所  
以爲家君籌出處者懇懇詳至老師稅駕清冷  
之淵豈其不戒心於羊腸而顧以其苦難者相

勉乎固知老師慮事遠也雖然老師且以今之  
從政者何如一人當關果可以拒兢兢之日當  
兢兢之震乎且家君親老身病實有不終朝之  
志不能則不如讓等讓則不如早彼之計得則  
毒淺而怨輕不然角牙相并鬼矢搏人諸君子  
欲爲今日之去而不可得熙寧元祐之禍且移  
之國家矣吾師以爲何如人豈必盡爲韓范當  
時不有邵堯夫乎承同病相憐發此浪語幸亮

張總戎

賴公之靈春汛幸且無警卧彪海上使旗偃幟  
而水偃波 蓋東南百萬戶實利賴之祗恐廟  
堂西顧正急北門鎖鑰非公不可或未免奪我  
長城耳某逐行北上本無可避之嫌適誤聞家  
君有 特召之命恐以熱掇見疑故匆匆引退  
期於處陰息影不圖又入人描畫也

申經峪孝廉

弟居長安兩月居則墜戶去則決躡遂始末不  
及與仁丈相聞比時輦上君子兢兢我曹弟且

逆知之而至於紙上之字有可化無則竒而又  
竒矣古云真玉火三日而見性今則不然火之  
不得則碎之玉能自爲落落乎吁嗟可憐矣

張可菴給諫

先生此歸非幸非不幸但試觀春仲以來驕兵  
悍虜一訐於邊而舉朝遂譁張紛紜五色無主  
此何等景象也乃知壇場得失實喉舌之地遙  
執其權若天祚國家則諸君子之牽復將不遠  
矣某一介書生猶懷主辱先生一片熱心能盡  
耗磨之澆花種藥間已乎日月之際當舟過貴  
城渴欲參承未能卜刻先此附使爲謝

殷開美職方

適見月初報朔方如常倭奴大可慮然此等古  
常有之但廟堂以口擊賊以名使人易大將如  
小兒倚強虜爲心腹恐濫觴不止此耳當此時  
惟秣陵一片水可與共語此外皆洗耳提鼻之  
所欲覓開口處不得矣先生幸少安無躁行李  
當以何時西來積懷如帑跂予望之

董青芝兵部

弟之至長安也守如處女槩不通戶外之間念我懷人欲梯航一字而不可得圍坐之中暗閱世變豈但技劔簪筆爲任不易卽馬少游亦何可易爲今自朝至野一種苛刻囂訐之風無脛而走天下又豈有平路岐耶卽如吾丈家事聞之使人嚙指而驚裂背而怒又且捧腹而笑天地日月宛然而辨猶血人恬不爲怪此何以也今輪風劫火蕩薄已極混沌漸開而令弟世兄

又巍然首列想丈家自此入蔗境矣頗聞此事起於吾丈苦心輸已而反爲刁民刻吏所乘本旨盡失亂之至也豈有量哉其究吾丈所稱蘊崇燎原二語盡之而旣蘊崇則未有不燎原者但苦上無抽薪止沸之心而徒使火中人撥火事中人處事則強必爭弱必侮無一可者也吾丈欲知朝政所以紛然不平則丈家事其左驗矣今幸已俱脫火坑且請將從前冤親俱放下着但目前秔稻不天畢羅滿地王孝孫卽寄處

一車必不憂滄海之橫流耳如何如何

石楚陽太守

浹歲三得手書借箸而籌東師殆無遺策明公  
真天下才也倭之可慮人類能言之但愚者勝  
則喜敗則憂而智者勝不忘敗敗不忘勝此小  
異耳我師之陟凍西渡也乘其新冠之未集與  
朝鮮之未定先人奪人其筭未嘗不是今日鋒  
刃小挫人不售其始之太緩與其後之太急而  
遽以遠討爲窮兵以收軍爲完策與兒童之見

何異旗鼓一動採指脫綦之慘將有不可言者  
無論難進卽退亦豈容易耶且今日廟堂之事  
足持手行衿掣肘見覓秦王翦已難覓六十萬  
人又難覓六十萬人食尤難之難者也衆寡不  
敵勢必用間用竒先聲而後實庶幾有濟而今  
不過以手搏手以力角力議論牽纏橫制而中  
棼之如此則敗局已定又不若整師而遁足以  
支目前矣恨明公不在輦下何事不可爲痛哭  
豈暇用倒倉法耶家君仰籍嘉謨正欲次第獻

之當宁而入朝第一事便屬支離今已杜門乞  
骸但不知一片採薇地落何所耳心苦而不濟  
於用某不忍其汶汶謹以先後諸揭置密遞中  
奉覽幸亮之

石楚陽太守

每讀手諭未嘗不爲明臺咄咄彈指遂欲決青  
天而呼白日也雖然姑蘇數千萬口上下二百  
餘年孰不謂明臺寸絲不掛百尺無枝者則公  
論亦安得不出吏議亦安得不更乃明臺顧惴

惴焉如履水集木羨冥鴻之高而賈蹄虎之勇  
頓粧點眼前世界具黑河黃霧之景非所望於  
明臺也竊意事所以淹久者不過上下兩難彼  
此相仗故各洗耳欲自解免以避非必當事者  
有意納之也聞當事者且悔而變兩說矣願臺  
下姑待之請試觀此事結局如何鹿車方新鳳  
巢無恙可便謂鼎鑄遂無耳乎卽欲拜餞行麾  
而老親病甚比日不肖又病惟西望吳閭遙寄  
數行淚於鄉父老而已統祈台亮幸甚

錢浩川知縣

昨晤見田兄始悉吾丈起居第不意如尊諭之甚耳驛傳旁午至妨卧治之適日執手扳折腰貴人前亦未必非消融客氣之一端知非大雅君子所羞薄也事既如此只得且以忍辱爲上乘以磨兇堅爲法門逢人道苦苦未必損而或反以失前路之歡似不若冷煖自知姑且與分別中尋無分別弟非敢以世俗巧宦相期而事固有不得不然者吾丈耐心應之可也家君賴

庇甫出百病之中而遽歷羊腸孟門之險煩言塞耳已自難支而比者國本一着則尤百倍於邊事者只得不顧利鈍以去就爭之疏已今日上矣若幸而得歸晤言有日重辱存問先此附謝不一

馮文所

門下雲卧良久斗牛間異彩理無久湮大君子出處自有意彼矜東山之高畏北山之笑者皆不免以蓬心分別知非高明所屑屑也若家君

則衰病狎至委非劇場中人滿擬葛巾野服送  
故人出山而碌碌旅羈中浮莽相揖於長安道  
上比來人情物態展布彌難待門下駟車榮路  
而後知謝安不能奈蒼生何耳不肖蚘竅蠅聲  
何足辱大方月旦而門下乃口之不已狼籍齒  
牙祇益其媿比僅於公車業一帙中有新作數  
首請教亦如嬾蚕作絲不可望以七襄也目眚  
草草不具

呂渭陽大尹

臺下之濺澤仁聲如飲醇醪彌緩彌醉如響雷  
鼓彌遠彌聞明公不在帝居有誰復當巢鳳阿  
游麟閣者內召在邇家君卽採拾輿人之頌以  
贊公論如順風而呼豈敢貪天功哉衡春未當  
歸里中猶及見攀轅卧轍之盛臨楮無任欣躍  
張總戎

方今邊烽未息正豪傑橫刀躍馬之時家君旣  
知公深寧不藉一士以報明主而忍使卧虎  
耽耽自適長林豐草間耶今旣建牙衝邊軍書



戎政拮据良苦顧此迺丈夫所輕獨聞其地十  
羊九牧在皦皦者豎立稍難耳旣具審麾下衷  
曲亦何忍不以相成也

韓念劬州尊

中朝口事日甚一日習竒爲故習怪爲常此豈  
可以理論勢禁者家君不幸悞入劇場唾面之  
辱已自甘之正恐自此上與下隔內與外持身  
不爲砥柱而反爲射招耳家君比日再疏引疾  
自爲國本事重非屑與兒女子爭言其援之而  
止蓋亦以 聖意稍移庶幾桑榆之望不然則  
此時已在春明門外矣

徐二府

方今朝陞之間稷稷如鬪蟻百人輿瓠誰克舉  
之家君謬當衡軸責重於山權輕於羽遠志小  
草灼然已明披靡難返終當返吾初服耳

鍾文陸侍御

曾記善果寺中遇一匡一坐蓐牀蕭然如苦行  
頭陀者廉之則賢侯之奉簡命來者也心大異

之庸知乃明公耶蓋衡讀明公文章仰明公之  
治行爲日已久第恨不及見光儀今遇李君而  
不得御奈之何哉樸櫟鄙儒名先實後掛於謠  
詠之口爲知己羞何更辱寵借至此家祖母買  
舟私下亮不敢與地主相聞而臺下顧追而貺  
之此非所以康老親則亦非飲冰君子之所以  
惠不肖也日省錄置之座右羨牆見嚴師矣敬  
謝敬謝

緱山先生文集卷之十八

緱山先生集卷之十九

太倉王衡辰玉甫著

男時敏

婿李穀

校

顧涇陽選郎

不佞累辱先生以道義見知兩年以來不通片  
紙者避世嫌也今先生且脂車出國門敢致書  
穉登効其惓惓焉不肖竊觀天下之亂莫太於  
人心之不和不和始於相睽而成於相激激不

已而門戶而戈矛朋起角立若有真是非真邪  
正者而其端十之九皆誤也蓋近年以來官府  
堂陛之交隔而百誤漸生大小臣工之不相能  
也閣部之不相通也不知自何日始也意其初  
不過薄物細故禮文體統之齟齬亦或一人一  
事小有異同而已也而不幸與事變會又不幸  
而與聖怒會天下有一種居竒獻新之徒聒耳  
莠口遂飾無以爲有張小以爲大喻訛其言語  
描寫其笑貌以爲真而君子皆瞶焉有外心於

是遠者高蹈近者前却諷者囁嚅憇者詬罵而  
當事之意不能無少望曰我何負於彼而棄我  
至是也而庸知彼之望我殆有甚焉者也於是  
其相與踈踈則居竒獻新之徒又各以譎張煽  
惑者同耳而異入而心始大疑疑則謂人皆腹  
刃也皆竊鉄也舉凡責難求備於我道聽塗說  
於外者視爲借口訟詞索瘢之隱計而不知其  
未必至此也彼愛之人我亦愛之覈其根源如  
蕉子卸葉不盡不止是固可以不辨雖然人情

不大相遠也。未有事不自心不平而不辯者也。求白而反不自求平而反不平則勢不得不爭。既爭矣此正則彼必邪此直則彼必曲以各誤之見持不服之心而挾樂成其誤之黨求勝不求是而爭不得不成蓋其間非無虛衷好善欲以口舌爲調人者而常苦於壁堅而不得進列成而不可解以求盟爲護以免胄爲耻則有徘徊太息退守其誤而止耳此近年以來不和之大較也。家君之至于是也此風舊矣無何遂有

趙之謫劉之闕一則偶有望而可疑之事一則先有望而見疑之心而其後實則皆洞然無疑以去去之後眉睫肘臆之變幻又不知凡幾安知悞不復化爲真而要之終不可謂之不誤也。幸遇先生掌銓事冲虛而高遠貞固而圓融不惟徼其肺腑與家君久通而且敷歷其腎腸以告於百執事家君輒舉以告小子而輒自喜也。曰泰交其爲之兆乎。今家君在告踰月而先生遽以譴去自此隔者愈隔爭者愈爭天下事尚

可爲耶雖然及今尚可謂之誤也惟天下真豪  
傑爲國家慮深遠故不卽誤以爲真而且卽真  
以爲誤以待君子則如周公於召公以待小人  
則如郭子儀於魚朝恩彼豈以畏途而容容以  
爲天下事誠不可以激也激則不自不平之極  
何所不至其究必下挾其同以爲公上挾其獨  
以爲勢所謂誤者將真而國家之禍不知所終  
矣家君受事兩年幸不得罪於公論且且暮隨  
先生去他何暇恤哉而恤吾兩人已去之後其  
爲世道憂者方大也不肖之抱隱慮久矣不知  
已者無所告庸衆人又不可告則先告於知己  
之君子而願請正焉外拙句五章詞多比興以  
申其嗾嗾之意云爾

顧冲庵總督

東事賴老叔一力擔當真社稷之衛樞筦之間  
又絕無異同將相調和事當可成今家君垂成  
而不能待以去非本心也雖然此事利害已共  
之矣分不得爾我去住不容不三思今紛紛爭

續通志卷之十九  
四  
封貢有以體統者有以兵計者有謂倭必不退者有謂其俟兵撤卽來者又有謂當與戰者有謂當勅之歸而再易表者皆浮而無據了不足論吾曹從旁睥睨但其中貢事之不可保者有五中朝之必不信者有三而其必不可行者亦有三耳無論倭必非真畏我真求我款與不款槩柄必不在我卽真畏矣真求矣真能制其命矣而狡夷非孝子順孫又非有七縱七擒之震疊何以保其能十年不叛昔班定遠之於西域

諸國我 成祖之於阿魯台豈不有德可懷有威可畏而轉眼卽叛况其下焉者乎蓋倭中亦一人一心一日一變其酋長不能必之部落而我能必之於倭乎不可保一縱曰夷性有常矣果盡如吾約束矣而贈送將迎之間主客參差之勢豈容久無釁端譬如井飲者之相掙也市之囂囂與候館之嘖嘖也此非爭地也而衆與利所聚其勢必至於爭此不可保二昔虜款之初成也王襄毅實以身始終之我所持惟一心

客所仰惟一主故耳目心志不捨攘雜亂而事可成今許貢者在此與之貢者在彼一理之一捐之少年代老成終事而老成必反代少年受殃矣其不可保三俺酋之與關酋強相等也然俺酋伎不過擄掠則貢事乃擄掠對症之藥也志實在那吉則封號乃那吉稱心之事也若關酋明乎非爲擄掠來矣明乎非有所甚愛矣以力疲而退退養其力而復來將必不免而欲以一丸泥東封釜山得乎其不可保四議者曰倭

通於中國將覘我虛實也將有奸民出而狎之引而內之也獨不曰彼國有大唐街乎國初原通海禁乎雖然居燕之吳人引燕至吳終不若居吳引燕之爲易也沿海之鹽徒私販私鹽終不若公販私鹽之便也隄而防之猶恐其決苟放而決之寧有極乎其必不可保五貢人貢船貢期貢地著有明例而今日之貢與國初之貢實則不同昔我御彼今我畏彼昔乘開創餘威法明令行之日而今當承平積弊備弛紐絕之



時有如倭以貢來能逐船搜檢多一人卽斬以  
狗乎或以非時非地來能逆而拒之乎卽今日  
能之而能必之後日乎卽我能之而能必之他  
人乎江南數百里內能無處處防年年防乎民  
不怨火而怨使之救火咎將誰執焉其不可保  
六夫是六難保者制府旣保之矣吾曹真冥冥  
決事耳而至於人之必不信必不行之勢則局  
旁觀者甚清朝議初言必盡勅倭盡歸而後許  
封繼言許之而後歸矣初言許封則倭必退今

言不許貢則封亦無益矣彼百求百行此一步  
一縮當事者不能保前日之言不變而能使事  
外之人保今日之言之不變乎此必不信一初  
之請止於封以未聞沈惟敬之言也繼之請及  
於貢以卽聞沈惟敬之言也受降受款軍中大  
事今別無一腹心之間而專取於惟敬之片言  
彼議者曰使沈惟敬而復有後言將亦從之乎  
其詞近直無以應也必不信二倭之不欲無名  
以退師也行長之不敢空手而見關酋也固也

然釜山對馬島之間相去幾何豈不暫退而待  
命乎待而不至來亦未遲乃我肯退尋丈而彼  
不肯退尺寸以是爲慕義爲向化卽三尺童子  
知其不然其必不信三古稱違衆獨斷惟趙充  
國裴度然實以兩帝爲之主謀經營卜度而後  
敢任又其所任者皆上風之事也今許貢之說  
通國以爲不可 皇上又漫聽於無權之執政  
屢憎之樞臣縱明旨昭然亦必不勝衆口卽如  
近者小西飛明許入關而守吏閉關以請終依

違而不能奪其效可睹矣其必不行一往年之  
款虜也異同者直中朝之浮議耳至於邊方之  
民與其地之官皆久苦虜患而徼倖暫脫於湯  
火故以爲便者什三不便者什一今兩浙方安  
固如金甌誰肯出身嘗大害者必將至頸寧逃  
而不免無寧不逃而免此人情也其撫按必且  
以危言恐喝其縉紳必且以浮辭嚇張甚或反  
聞而敗之飾小爭爲大爭以嫁禍於人而自脫  
其必不行二禮曹諸君喜其名之高言之中而

樂吾事之壞此議果行是必有結旅而拒者是  
必有封印而辭者卽奉旨矣又必有故爲遲迴  
其期迂難其路抑損其禮以亂厥成者不成則  
曰我固言之矣而因以爲許成者之罪其必不  
行三至於必不信必不行勢不得不悔悔而復  
更徒多此一番議論而於國何益矣故計之不  
可不早也愚嘗歎今任事之難非難其人也亦  
非任任事之難也譬之治屋楣樞梁柱必互相  
撐持而後能任若一長一短一堅一脆則必并

其長者堅者而俱廢奈之何以豫章之材而輕  
棄爲溝中之斷也故忠臣爲國苟真有一了百  
了之計則死生以之如其暫了而終不了則又  
當量已量物無從并救人之理今日東事愚意  
莫若因人言而遂以委之第云封貢並許某所  
信爲無事者也而今舉朝非之某亦豈能強行  
則某有成言矣惟撤兵以守邊左耳若必欲不  
棄朝鮮非司寇策不可司寇策非司寇用不可  
請以某之任任之如此甚善愚觀司寇議雖互

異然經緯井然非鹵莽滅裂如往年西督府比  
一旦身見其難自不免退就吾之議而今之公  
案可完蓋援異已者相助與同者之相助不  
啻倍也不肖又伏而思之老叔明於事而熟於  
計使有他繆巧可羈縻豈樂言封貢者一封而  
可以完事豈好爲是更端者得非倭強我弱有  
頃刻不能支者乎果爾宜且備揭其情狀以聞  
之於朝毋徒虛張門面聲勇實怯翻使人獻疑  
也又得非以前人之誤盡不可彌縫乎而前人

則又謂一封之外別無枝節矣是亦宜以實情  
實事明白言之毋徒以含糊爲忠厚補苴塞漏  
翻爲人擔禍也此東事之最要着也以頃所聞  
卽遼左一片空地殊未易守增兵請餉急修備  
禦寧可再遲如人已犯消渴病豈可以家無積  
困忍饑而待後日乎又遼陽積弊不徒在於東  
征之騷費狡虜之蹂躪蓋惟去世將而易客將  
將皆傳舍其官而兵皆傳舍其將李氏盡籠一  
方之利遙執其權而禍不與焉議者反以是爲

新山先生集 卷之十九  
裁李氏而保遼陽也不亦僨乎爲今之計宜亟  
還提督總兵使之自爲戰守庶尚有經營完整  
之日此雖小拂衆論而要於事理甚明非若貢  
市之不可保也書生之言知復無當但念此等  
雖國事而亦我兩家之事故率其固陋冒昧言  
之不知亦有可采與否

周二魯尚寶

衡至此月餘矣跼伏遠郊不敢入謁長者比聞  
家祖母病信殊迫踉蹌而歸竟不及深談歎甚

歎甚衡之在家也每見先生與家君書以肺肝  
示我以藥石生我所不杜門墮戶以奉先生之  
教而復結束爲茲游者蓋亦有說凡謂衡不宜  
就試者非曰避嫌乎避嫌宜在前日不宜在今  
日縱謂以宰相子不就試將援祖宗例耶將援  
近代例耶將計其必得而避之耶抑自疑其不  
宜得而避之耶無垢自洗無風自波勢固不能  
夫旣試矣得謫矣而後始逡巡以退彼有心有  
口者且將曰是其初掛於物議而不得不爾也

又將曰是其爲身急而爲子不得不緩也是非  
避嫌乃避口耳衡之無愧非獨信心若以科場  
不足憑則硃墨卷見在若以墨卷不足憑則覆  
試卷見在若以黃座師不足信則盛座師鄒座  
師見在若以三座師不足信則同考官監臨覆  
試官及高郎中見在上不愧屋漏之天與衆多  
之指示而畏此悠悠訾讟之口則衡所必不甘  
也不然如衡縱不得甲乙第烏衣高屐亦足了  
此一生豈須此然後活者滿腔積懣久欲伸於

知已之前今匆匆引歸恐先生不察其意故悉  
布腹心以告所謂惟先生可與聞此言亦不可  
不聞此言也家君之被眷知極矣卽粉身碎骨  
當無所辭但以家君自度以不肖身度家君內  
不可者一外不可者九所謂內不可者家祖母  
躡坐一冬命危如綫具在家君諸疏中知先生  
必爲分痛無俟衡言矣其外不可者則家君所  
不暇計卽他人又不及知請縷言之蓋有三難  
焉如屬者排闥紛紜雷霆猝下荃宰懸而不屬

主器虛而若搖時事尚可爲乎而家君乃儼然見召以苦爲甘勢既不能害生於恩悔且何及難一古之大臣進則行道退則行志近年以來朝廷忽以褒崇爲體面僚友忽以羈留爲協和卽伊傳生此時不能進又不能退無乃觸藩耶難二自往時當事者首鼠調停漫無別白以致激天下君子慷慨之氣而亦潛授策士以縱橫之權昔之是非可分而不分今之是非分而不分不分之則何以爲國分之則曹起而訟矣

難三然尤難在外也家君又有六病正與時尚相反今之居熱地者詬責叢集一切有注錯勢必存形迹以自解虛議論以俟人而家君信口言信心應胷中了無宿物而人已拾爲訟端矣一病也爲相先收人心收人心不免市恩亦不免避怨今家君薦人救人誓不使人聞人不聞而疑我夫何怪乃其疑我也復盛氣而爭之愈爭愈晦愈晦愈爭而怨從此積矣如兩年以來薦於上而久得請者鄉吏部三進士也其終不

得請者姜給事孫王政諸君也其薦之閣部而  
久始得聽者趙吏部艾中丞黃少卿羅吏部羅  
給諫也其薦之上與下不卽行而托之後人者  
沈中丞高儀部饒比部也其薦之終不得不甘  
受人怨而劇受怨者管僉憲也其救之而得者  
馬侍御顧吏部也其救之而不得者李中丞饒  
比部也凡此類人盡不知欲以收人心得乎此  
二病也徐文貞奏成手中人至死不悟而家君  
一事受屈遽有變色迨事過卽悔甚且厚施焉

常自云我生平輕開罵人口不起害人心然心  
不可以示人而口則足以構璫此三病也今之  
論人者皆耳耳相授甚有疑已白勘已虛而尚  
因仍不止者故辨不容不亟而家君果於信已  
又果於信天下之信已如李公瑄言杖饒公伸  
之事決不肯置一辭無幾何而舉朝囂然以誤  
爲真矣此四病也一人失勢世每交手而擠之  
一人被指世每貸口而詈之如是者名利俛兼  
焉而家君顧偏於失勢之人存一分忠厚於衆



好衆惡之中加一分體察衆怒如水火其可犯乎此五病也智者逐世如園射名如鷲如人所薦而是何不攘之已已所樹而非何不委之人而家君尼分惡之小仁失爭先之捷徑過歸已善歸人此六病也大臣有所關說度其不必行似當姑暴之以脫已罪而苦心苦語什一在外什三在內人求多於我則唯然而應耳此七病也以七病際三難縱脫然無內顧憂亦當審已量物善守挈瓶之智而况以萬萬不可強出之

老親復挽袂以相泣耶惟先生知之憐之則幸相與全之今疏將三上也而勢似不能卽得允兩相公又身處嫌地尚欲待我季孟間愚謂三四疏以後必得臺諫中以疏請曰 皇上方孝事 兩宮何忍以三公而奪王某一日之養姑使得終事親而後圖報亦未晚如此 皇上當有所感動兩相公亦得有所據以上請此乃家君母子得完之日也先生獨無意乎夫排難解紛真豪傑事是攝是贊真師友事環視諸同志

中非先生莫與任此幸熟籌而一引手焉情切  
語長不覺媿媿死罪死罪

張可菴給諫

數日中兩投刺長者而不得見愴怍而歸爾時  
君子好遯未便應白駒之招則不肖捧席執經  
當自有待正不爭旦夕也家君竟蒙恩放庶幾  
考槃而復爲病魔所苦蓋天之忌盈如此今幸  
而稍勝杖履方擬與田夫野老頌橘嘯松修潞  
公故事昔司馬公方在茂節而諸公特借以領

袖老成門下倘有意乎

李修吾巡撫

關河一見比於景星慶雲次且北轅晚出早歸  
不獲再奉光儀則惟病母之故事親無狀竟爾  
中道棄哺哀殘毀瘁不屬爲人自分於台臺生  
死絕矣弘慈隱篤奠唁遠臨華袞瓊茅枯齒生  
色先慈而有知也尚當啣結地下况不肖雙淚  
未斷何能不感而泣哉惟是家君白髮守閭誠  
不敢以墨面見而荼蓼同苦憂不自支卽窀穸

續山先生集 卷之十九  
大事尚爾囁嚅在口則不孝情事可知矣厚奠  
出自尊者本無反命而恐反損先親冥福敬奉  
家君之命以辭且別賜甚腆喪人無私以此敬  
羞魚菽伏惟矜贖幸甚

翁見鵬知州

不孝中心介介惟晨昏之憂則已數年於茲客  
冬勉奉慈命灑淚渡江則已恨多此一出矣俄  
而先妣病信至場中瞶眩幾死狼狽奔歸所得  
侍湯藥者纔四閱月耳嗟乎尚忍言哉不孝今

日如失哺乳下兒直無所倚爲命雖析骨析肉  
猶難爲報速貧速朽尚恨其餘百無以生爲矣  
惟是老父白髮守閭摧傷已甚使有術可以破  
涕卽損情抑禮無辭爲之而醒難解醒痛自知  
痛朝朝荼蓼面面鐵圍不孝抑尚可苟活否也  
承門下奠唁遠辱被枯齧以華袞嗟室以丹  
青惟有叩心几筵呼天搶地蓋茫然不知所置  
謝矣盛賻槩不敢當謹附返

馬肖乾憲副

憶前歲門下所以撫念窮子者輒感而泣不竊  
冀稍附臨清守張溟池之便一展謝私而不意  
遂遭大故又不意臨清守亦化爲異物也臨清  
本竒士今聞其歸骨之時萬戶巷哭果然不負  
所學門下倘旁采輿頌使之得沾俎豆此亦激  
揚風紀之一盛舉也伏惟高明留意偶念忘友  
灑筆及此萬罪萬罪

沈泰垣督學

弟自遭苦神志隕墜血氣萎枯菊苦無期蒲凋  
可慮正未知何日得副尊望也承諭商公高明  
極亦願見而先親窀穸之事正于先一月告成  
又賤疾淹時度未有款門之日姑辭諸從者稍  
能自力當更與結青鞋之緣耳

于穀峯宗伯

不孝適從遠道歸忽拜長箋及辱奠先妣之命  
隨卽爲羨苧沸醴哭告於先慈几筵而後敢鳴  
吾私竊惟先慈生平行應圖史澤及里閭以當  
明公大人之酌可以無慙而不孝罪逆豎子明

公卽以世誼哀之亦何至在明月而弔鰥鳏也  
不孝今日析骨析肉寸報無從速朽速貧萬緣  
已斷俯仰天地生趣盡矣忽不意蒙過情之譽  
重以折行之交甚至欲收馬淳於藥籠寵蛙鳴  
以鼓吹誠慙誠感不知所持竊惟不孝至愚極  
陋上不足以副著作之椽下不足以汗窮愁之  
簡志隨髮短憂與歲長卽將來未死之身亦不  
過爲守閭之雞犬守墓之松楸無復望見長者  
日矣惟是手抱瓊篇心追口誦山川靈氣杖履

風流恍惚俱來第恐明公漱石雖甘需雲未雨  
縱極力描畫林泉唐突冠冕乃愈以見廉將軍  
之善飯識謝安石之同憂欲久鳴琴丘中豈易  
得也哀疚中本不欲他及不勝感衷遂爾媿媿  
伏惟台慈亮存

陳抱冲孝廉

弟不粘筆墨六年於茲非但意興懶散不能作  
愁冗迫逼不暇作而俗趨世好日化日新八識  
田中初未貯得實有所不解作也何君奇士文

如雲興飈散名世不難弟生平不好爲人師而况爲是人之師乎必欲問道於瞽弟亦惟有一肚不合時宜見所見而去耳

程山人

乍從許太初所得詠佳篇懽然而驚以爲非今之人也乃知代固不乏異材苦爲游士之軾縱橫天下有志者寧處囊中不欲與之見短長耳茲復承郵書見寄并示扇頭諸作的的與少陵青蓮分其笑貌丈執此可以不朽矣弟才不及

中人而雅不滿於今之詩爲今人旣不欲爲古人又不能遂兩置之今愁冗日增意趣日減且如是老矣弟欲以一時評目強自附於侯巴而未知丈之許我否也

趙太室大尹

不佞於舉子業猶醯雞然若著作經濟之林則覆蔀而已承惠教雄文雖阻舌賡亦欣目飽明臺鳴琴運甓之理半得之言語文字之中千載而後壁奠言先生間伯仲未可定也容卒業後

更抒頌詞先此謝教

緱山先生集卷之二十

太倉王衡辰玉甫著

男時敏

婿李轍

校

沈泰垣督學

弟自附驥以來十五年間浮沉驚憂疾苦中齒  
舌都弊皮骨僅存此番裹禿筆赴公車糠粃再  
前真出意外望外弟因悟世間得失毀譽倚伏  
若環向惟叨冒小過以致紛紛今見償又過之

天意人情不知何以處我托在肉骨自當爲我分懼而獎借滿紙殊非所望於知己也當今文體怪謬釐正紛紛百無一効愚謂其根不在文體而在邪說其權不在主司而在督學今海內文運莫盛八閩時下且有巨子爲之倡而適值老年文以青天白日之胷襟秉司文鐸此真千古一時弟所惓惓屬望非直九方之相馬匠石之取材而已伏惟傑然建立以迴倒瀾將粗糲腐儒亦有榮籍焉

趙寧宇撫臺

昨者簡授全楚事重程嚴不肖不敢以濁酒素竿載迎道左僅一瞻馬首而已竊惟明公此行楚民如脫湯火而見父母鎮囂篤隱在台臺一拊念間了不足難所難者腹心之嘆喜難測嬰紳之毀譽難調蓋昔如郭汾陽李鄴侯之平亂在堂簾之外而明公之平亂乃在不內不外之間上下異指勢不能水火鑑而左右袒此不其較難乎哉今外議洶洶直欲明公梟獍兪以謝



百姓而不知其正未易也頃敝郡又以亂告矣  
楚亂猶是意內亂至吾蘇宇內便將無一片乾  
淨地台臺睠然東顧言念舊棠幸分拯楚之緒  
以策蒼生幸甚外家君有書函奉寄附使馳上  
幸檢入不備

曹嗣山撫臺

郡中螳動賴台臺箠使而定家君郵書來道之  
詳矣其縉紳間所手額頌服者字字陽春字字  
藥石實其言非獨三吳之慶也大抵今日奸民

少亂民多本亂也而托於公憤有謂宜且蓄藏  
斤斧勿聲其辜俟沸羹已定蘊火已寒而徐申  
朝廷之法是一說也又有謂用事之人畢竟新  
不如故少不如老宜且容與其心以待其自悔  
無使激而生他端又一說也此二說者既已盡  
在臺下含吐操縱間夫復何言所甚憂者民已  
髓竭亂且膚剝矣而徵科之命日新今諸州縣  
又以缺金花停俸使賢有司必與窮民仇窮民  
必與亂民比其禍何可勝道台臺一身既以爲

保障又以爲繭絲調停水火鎗中使之兩無敗  
此非大豪傑不能末學所難贊一詞者也頃方  
以思親之苦鬱鬱成疾丐歸事已有巴鼻陽月  
初可漙娑舊棠下矣某向以子弟之禮旅見於  
庭非素門平進者比雖蒙台慈折節萬不敢承  
先此謝命之辱

吳對渠中翰

往者家君以一日之臭味得交於尊父老先生  
不敏亦獲於趨庭之次快覩偉人爾時門下妙

齡高科聲華籍甚音塵相望而不一見私心嚮  
往如在雲霄焉益又五年而不敏始登第則輩  
行且邈絕矣來箋何詞之盛何禮之恭也不敏  
隕唐下駟雖參前茅然而蓬心已白竹汗不青  
已矣今而後直乞此草木之年永奉桑榆之日  
芸亭蓬室直以爲蘧廬一宿而去之耳如門下  
春秋旣富毛羽更豐叩囊底智應天下何事不  
辦豈胥以千秋鐘彝金石而易曲江一日之春  
哉聞尊駕非久當來不敏且丐沐子舍恐無緣

復望絢履先此裁書布復統幸炤原

范長倩學道

弟冷廢憂虞僅存皮骨曲江花事久不夢見乃  
頃者糠粃再前豈屈伸反覆之理卽尺蠖亦可  
化爲龍蛇耶亦大不可解矣種種人間世浮榮  
浮譽過眼如花到口成蠟都不足道所沾沾者  
或籍是得以綵衣丐沐使平臺綠野間几杖不  
倩人魚鳥不避客則已厚幸其他非所敢聞命  
矣

公乎來孝廉

孝與嘗謂我仲子將攻伯兄也僕竊謂蒙陰一  
拳石何便有兩孝與已見足下之玉貌則灑然  
異之今又見足下之裏矣蒙山雖培塿亦何必  
減眉山哉有才如此而反噬乾肉得味於不敏  
復何可解不敏才如盆盎水不能蒸雲變虹自  
顧獨於帖括之業若有微長心所自喻口不能  
言人謂我渙忍爲陳紅僕聽然受其有以耳聵  
相尊妄譽不敏爲雕龍繡虎者僕不愛也足下

新山先生集 卷之二十一 五  
所以獎借僕者百不敢當乃所云眼前覓光景  
從口頭說聖賢此兩語者子非魚何以知魚之  
樂乎然不敏亦有大言才不能副識每咯咯喉  
吻間而止而世之多才者又或雕空鏤影少中  
規矩今足下既有才可使而又不爲才所使其  
所就豈僕所能百一乎哉兄如孝與足下無賤  
家雞貴野鶩第以足下方孝與淹博蘊籍顧誠  
不知何如乃枝柯扶踈神華酣適孝與似難爲  
兄也左券在彼困躓牢騷之况卽不敏能爲足

下輕之矣十月朔正與孝與作學子面孔握筆  
拈鈍如寒蟲繡壁不能成行豈江令筆花暗中  
爲有力者奪去耶孝與老手紛披似尚賴春草  
入夢耳附上一笑

樊棠軒大尹

王言不宿昨道貴邦同事者已先待於青浦遂  
忍心掠城而南不意執事之追覘之也敦命誠  
不敢辭抑明臺愛人之廉無乃不如自愛乎計  
往者別時屈指東歸僅與崑山片石語耳何意

干旄之尚淹我土也明臺茹蘖愈甘飲水愈旨  
無論不敏卽三尺童子能使人不歌謠不俎豆  
否聞之當事頗歎向來兩推位不稱德安知天  
不故留明公仍潁川賜璽爲後來者勸耶不然  
何其久也至後數日當執簡謁鈴下茲不一一

洪澗陽戶部

屬者震器既定大構安矣不敏父子以身爲燕  
雀業已幸甚若反以此分功則何敢人豈不自  
知三朝袍笏再世絲綸何德何福可以消此若

更勗之以旂常之業則有穴地而汗走矣謹謝

邵慕衡把總

某初叨第時書生之性不解世趨意有所蓄如  
含物欲吐往往操公論之券契責當路已漸窺  
時局殊不其然蓋各衙門皆是而司馬氏爲甚  
門下試觀數年以來遠征功次大鎮薦書記賞  
記陞者曾有一二踐諾否耶而門下第執面皮  
之語以爲息壤在彼亦信古之過矣職方兄每  
見輒云爲主者所持種種不能如意似非飾詞

當此謗議橫生之時彼方避嫌如膩誰敢橫開  
一口門下姑養望積資以待天定可也承言及  
不敢不以質對

賀道星文選

初辱翁丈惓惓借譽似謂以布衣之舊收之而  
徐窺尊旨不難以肺肝見悉又有出於敘舊之  
外者弟果何長而可以致長者知也感激感激  
昨匆遽束裝遂不能西別所有未盡之語惟是  
漱父母太倉丁守與崑山樊尹兩公的的邵南  
陽之撫循范萊蕪之廉惠久棲枳棘已自變常  
若此番覃恩開俸而復無超等之擢何以勸後  
弟輩之爲惓惓者非獨爲兩公也恃愛草草附  
啓并以爲懇

俞州判

比者公費日窘交際日增卽如諸父母之於鄉  
士夫自公賀外本無宴贈之例公臺雅意好士  
間一行之豈不甚厚祇恐此後遂以爲例諸臺  
迭爲賓主迎來送往憧憧無窮身在宇下壺簞

之獻闕如而數以授餐之愛勤我邦君此心蓋甚有不安者謹此循分控辭非但僕輩求免素餐之譏亦欲仰承諸父母懸魚之美也伏惟鑒亮幸甚

焦漪園翰撰

不肖居常謂人以國家二百年制科得台下而始重不偶如此何忍遂以一網窮之不敢謂直道之尚行人心之尚未死也么麼小子乃獲以旣鍛之羽差池後塵名先實後一之爲甚以此

知慙亦以此知懼雖然懼其不能爲先生耳第使能彷彿萬一雖丘壑甘之矣今幸而徼命歸省已分於晨昏蔭下省簪藏拙益此半生無足爲知已道獨喜凍雷忽蘇萬象萌始異日者訪舊學而左右焉則甘盤呂父尚未艾也無論蒼生卽愚父子桑榆日月知托命之所矣時下東山斲卧繙述必多尚當三薰三沐虔請緒言以發蒙蔽

耿叔臺操臺

時事亟矣世人皆咨風訟雨而台臺獨責歸於  
反身捧誦三言一言一歎愚謂道法治法皆有  
綱紀若不知綱紀爲何物而令欲爲所不能如  
逆風上船直苦澁耳卽一旦能爲其所欲爲篙  
舵縱橫於駭浪窮波之中憂未必不什百此也  
伏承以令先兄恭簡公誌文見委家君恭簡公  
人品政事家君則常提耳而訓不肖矣其蜚文  
譌史顛倒黑白者則常戟指而罵之矣乃其妙  
悟懸解渺然堂奧之間則槩乎未聞其風也古

人如明道之誌出於伊川子瞻之誌成於穎濱  
彼時豈無大手筆人而兄弟間自爲知己其不  
肯妄自菲薄如此台臺自爲三思其可耳

于穀峯宗伯

客歲假道貴里伏謁鈴下遂獲親光儀奉談讌  
玄言如屑不覺引膝至前伏惟老先生所處如  
立雲亭之顛俯眺日月而猶然賓徂狹弟鳧繹  
則盛德之至自游大人以來未之覩也退自奮  
發亦頗願尺寸豎立以副先達之知踐孺子之



約而今已矣戀戀乳下不能再踏春明門矣自  
茲以後但使綵衣無恙課魚責鳥便足了一生  
所爲嗷嗷未滿志者惟是先慈棄養已五閱春  
秋逝者骨朽生者肉單非但釜鐘禴糴化爲冷  
風卽馬鬣牛眠等歸蔓草計必海內名公鉅人  
挾馬班之文樹夔龍之望且爲琬琰且爲著蔡  
者寵貺數言而後可以不朽則無踰於老先生  
已用是忍死修狀乞華袞於執事固不忍文亦  
不恣溢恐以封黃漫木而受斤墨無地也惟台  
下矜憐辜人賜之一傳地下地上啣結無量某  
無任哀祈之至

耿叔臺操臺

每奉手翰諄篤委至使人肺肝自露茶簡公誌  
文家君旣不獲命黽勉執筆管窺槌撞不足以  
發揚道德亦復何言中朝一夫裂眦遂使官府  
之際疑城愈堅真可痛哭愚涉世未深頓覺忠  
恕一貫曾氏並非誑語有宋大儒以爲借言似  
猶未學忠恕在台臺以爲何如若不靳指南敢

以草木之年請事斯語

鄒瀘水座師

衡伏子舍逾年始遣一介起居台下可謂甚淺鮮而我師批札愈溫投惠愈腆使弟子分窮於不敢辭而情誦於無可報其且奈何乃台論尚自以爲偃蹇者則不敏且跪而請前負矣伏賴台庇乞養小疏旦暮且覆允業已辭親求仕豈敢得仕而棄之正以曩歲別離滋味至於食爲噎夢爲魔今髮已華矣不能強自禁持以忍而

出若教中所云亨屯傾否者今其人方在屯否中悠悠蒼生望有所屬若某輩不過飛鳧旅鴈何足爲重輕出處諒可自由矣別來十餘年止辦磨敲門磚未及門以內事顧胷中頗有私疑焉則老師所云乞靈假唾摘取一二字以立門戶者是矣千暎萬徑總從作始孔子已曰述而不作而今反人人自謂作者將求加於孔子耶故不敏竊謂古人三去去言爲後若在今則言無可言能排橫議卽是去言如吾師所云欲於

續山先生集 卷之二十一  
未畫之前稍加思議更希微妙非淺識可窺  
而愚又疑墮地之時已在畫後若思議可着便  
非畫前與如周易亦止云立人之道陰與陽未  
曾道畫前一語殆是濂溪堯夫諸大儒別有所  
得而假借言之非孔氏初旨也今畢竟言詮之  
外何所着力使畫與未畫打成一片望道茫然  
幸吾師假津筏焉又所恨者身居劇地躍冶實  
難勢不免於紛擾中求清靜肥濃中覓淡泊而  
精神枯憊疾病叢生從吾所好種種未獲言念

西林草木覓覓亦飛我命不猶付之一慨而已  
老師儘可追蹤向平一暢湮鬱倘有意與二三  
勝引涉江而東不敏請激大海之潮奉迎從者  
一日千古端在此時而非所敢必也伏惟台亮  
幸甚

劉雲嶠祭酒

往承老先生忘分俯級雲霄邈然不圖幸步後  
塵瞻邈伊邇乃返爲使翰所先百愆萬負總在  
台下陶冶之內矣比雖久闊聞問及知老先生

晨昏之外於出世經世事業無不灑然今時亟  
矣老先生尚欲乍進乍退虛蒼生之望寒兒女  
子之疑乎愚竊謂出處二道本無低昂稍涉成  
心總屬俗諦某頻歲日在愁涕中間一開卷總  
是茫然無有會心古人三年通一經今欲以萬  
陰中寸陰窮易不已踈乎易固不易解若必求  
字字句句可解恐千載終隔一塵老先生何以  
教之

商等軒同年

長安塵滾滾同籍兄弟多有不覲一面者而弟  
獨與丈比肩而立聯驪而游則幸中之至幸也  
後段分張誠出不意然以弟覲於石渠之賓經  
年簪筆實不過一帶俸書史吾丈縮百里符含  
吐膏雨人望之爲神君而可言墮落乎如弟一  
染指而遽吐舍鷓鷯之伍而老農圃之是師是  
乃真墮落耳然此無實之名尚爾消受不起頻  
年災病狎至萬緒茫然丈羨我冥鴻之逸正不  
知我爰居之憂也

蔡中山同年

弟以臘月廿二日抵舍以諸丈贈言張之堂前  
跪捧一觴真不減百步鼓吹也自此以往晨昏  
膝前萬事粗畢獨惜此一腔熱心盡付之木石  
鹿豕諸丈備行弘文不可數觀父子兄弟之間  
終未免得一失一以此小缺陷耳 冊立大慶  
既與普天同喜不圖意外又蒙特恩 存問鴻  
鴈稻梁轉覺消受不起吾丈何以教之齋疏人  
便草此布謝

溫封翁太老師

不肖門墻下走藥籠棄餘迄未奉几杖之光且  
并闕瑱環之間忽蒙寵命授衣授餐此皆卑所  
以獻於尊少所以獻長而倒施至此墮越如何  
惟有懟墨拜嘉踟躕思報而已衡今夢慚書蠹  
跡類壤蟲已長辭北海之風敢虛擁玉堂之月  
仰煩問道彌益悚慚別諭直布鄙忱統惟鑒在

崇明縣尹

筐篚玄黃賁相望於海上辭曰優老揆之於分

尚不敢當况不敏一介散吏壺箠之不先而偃  
然分邦大夫之俸恐訾食者之不肥體也雖得  
罪於將命所不敢辭更望此後以跡外見寬無  
令愚父子有爰居之懼耳伏惟原亮

陳抱冲國錄

別來五年弟已請長休而吾丈遽耽冷局回視  
少年鷄窓拈筆時真成一夢也南中江山雄勝  
亦吏亦隱無所不佳獨弟碌碌塵土報輸烏鳥  
跡類馬牛隱不成隱以此深自愧耳比來有生

蘭信不深所欲聞弟比遭摧剝甚苦止存一虫  
蚩未角之犢耳劇愁至心輒舉陶柴桑語以自  
解然亦未易破除也如何如何

耿叔臺操臺

昨敝親自南中歸風聞台臺有分帷之痛尚在  
疑信間今且信矣偕老碩人雖莊叟不能爲達  
然年至逾六眷屬滿前誰能保金甌之一無缺  
者當且視爲變中之常稍以自寬可也大疏以  
苦語蕪危詞計亦無復之矣但比來求去紛紛

得請者僅百之一舍一覬百卽此似涉僥倖心  
從僥倖得煩惱擾擾徒自苦耳江南民風軍政  
儘費振刷猶勝今中書堂中噎噎不得吐者練  
事亦可以遣情台臺倘有意乎教中三君子亦  
望以此道相切劘北風雨雪之詩似亦未免太  
早也時事時通時塞時躁時靜誠如台言但我  
朝 孝肅二廟號爲盛時而亦有甚不如人意  
者只比時決壅潰疽較易而今化成一頑痺不  
仁之局鍼石難爲施耳衆庶爲政良可深慨使

人心見以爲妖孽則妖孽止矣而士大夫間強半  
以爲快心爽口之事推波助瀾則且奈之何哉

王豐輿方伯

側耳明譽二十餘年老先生殆老氏所謂猶龍  
人也搏弄狷夷於股掌之上不啻嬰兒而又不  
廢騷吟談麈蓋間世異才駢植於金友玉昆之  
間可謂竒矣丙戌獲通籍世講則已幸甚昨歲  
又辱收令弟老師門牆得以世父事臺下則猶  
幸之幸塵鞅碌碌未及果負笈之願而翰貺儼

然辱之所以寵借過當且排詞儷句尤非以子弟見畜之禮使人又感又驚不敏今跼伏子舍已爲菰蘆中人矣私心戀戀欲以農圃爲箕裘菽水爲鍾鼎而波臣之命泛泛不能自必赤城霞氣遙起屬之卽桑榆久照蕭艾並榮所依籍至厚不必又重之以頌禱矣適擬留令弟老師作平原十日飲接詞奉報而家君病疴甚篤老師行色甚遽醫藥擾擾遂不能以俳語奉酬矢報不虔統惟台亮

任心葵同年

愚父子里居以鑿坏爲常於當道諸公少所通訊况千里而遙自應闊踈弟謝朝籍久矣惟是二三兄弟往來於懷鄭子瞻鬚髯陡健袁孝里秀骨采采俱非久爲人下者丈左提右挈以爲雲霄之游真不佞弟所掀眉而待也相見幸爲致意

陳嵎陽太常

書生褊心每見野史縱橫狐嘯鬼嘯生平棘心



第一事而上不能窺著作之壇下不能汗窮愁之簡志長髮短空有此心乃者先生獨欲創出鴻裁訂其紕謬一代詞人克棟似不過以浮膏俗艷供千古覆瓿未聞有念及此者此乃真不朽矣兩朝錄家無全抄從瑯琊借得一半想尚足供數月披玩也冉冉節至傷心燈火不見者已數年華障忽頽且匣而藏之異日或與剡溪佳客共煖冷腸今尚未忍自娛也

江續石公子

憶客歲名賢駢辱恨不舉平原故事相與講學論藝忽使兩丈輒歸也僕自揣於章句之業紅腐久矣乃猥承老馬之師而僭自附於他山之石真可謂不類乃兩丈猶咨咨念之賢者之不耻下人豈有既乎辱諭結舍菰蘆且欲再尋舊雅頗念敝地枯泉稿石誠不足以發枚叔之雄辨倘以晨昏小間折六橋之烟觀八月之潮而問道於下執事兩丈其聽然而許我否

緱山先生集卷之二十

緱山先生集卷之二十一

太倉王衡辰玉甫著

男時敏

婿李穀

校

吳藩幕



伏承箋貺遠臨專枉稱賀蕙帳山人乃爲風塵  
解願非誼在彈冠不至是也今中書君已老上  
不望銘太常之彝下不能汗承明之簡第遂欲  
私此四肢之敏長侍嚴親於平臺綠野間不知

造化肯佚我以太平不所苦東海一杯已落吾  
掌三洞二九亦欲與五湖長共之門下其能割  
半席以相容乎則舉世間嚼蠟功名覆瓿書卷  
皆可置之齒牙外矣

曾棠芾大尹

伏惟鳳曆春新鴻仁雨施首投珍於遺老業已  
過情復授粲於故人更慙踰例頓藉花封之暖  
盡回黍谷之寒雖草木不謝榮於春風而麀鼠  
且厭飽於河海腆顏以拜汗背奈何統容端謝

不盡

曾退如同年

弟幸就小差以歸晨昏膝下得在兄先塵鞅雜  
還蓋不啻長安馬上者兄安巢阿閣而忽慕籠  
外白鷗頗覺無謂御書不卽下或爲吾兄遠來  
以春風相送不可謂非幸也

湯質齋同年

大本定矣計諸丈榮補之命必不出浹旬間而  
至今尚爾弄印殊不知其說然我輩筆成塚紙

成蠹何者不淹日月非必長安米能困人也今  
經此百忍異日者亦往牛解弦發鴈落天下無  
難事矣丈可以此語置左右當緩歌否

樊棠軒弟

昨承委令先兄誌文寂寂數行心長腕短方負  
冥愧蓋棺之論至於令先兄亦可以定矣而尚  
有尼之者是何肺腸也以一毀當百讚所謂唾  
不至天還從已墮此不足以灑仁人之涕發義  
士之憤乎直望兩難弟早奮大業爲逝者作護

法神耳董思老夙尚風義令先兄才品卓卓是  
所親覩不佞何嘗以語爲先容足下第靜以聽  
之渠定有格外標舉必不墮彼雲霧也

耿叔臺操臺

昨豎子妄言辱尊教獎借益深捫舌之媿不敏  
所爲慨然及此者非敢言一貫之易直是見忠  
恕之難耳自二十年以來朝宁叅差議論驕駁  
何者不坐此病今當此同舟遇風之時而病發  
彌劇則吾不知其所終矣方伯公亦復波及可

歎台臺試觀近事幾見有不立一高名竒節而  
免於物議者乎使天下人置舟楫不問而惟風  
波之是求風波何自得平此不忠不恕之粗者  
然于債事有餘矣

鄒瀘水座師

感知酬德之念慙焉攻中念老師向所脫驂解  
幕泣之盜車下者何心比日一聞吉語所謂頓  
足起舞不啻身當之者又何心今轅未債而先  
迴絡已解而自縛使人盡某也卽南金竹箭累

纍貢玉堂與太倉紅腐又奚別乎倘執經之士  
不廢蓼莪有道之門不稱官閥則某之不負我  
師其在此舉矣伏惟老師暫卷經綸低回膝下  
承歡持後之道知且表儀一方某雖不敏亦未  
肯以五陵裘馬消損白日惟是爲子言子在鄉  
言鄉亦望先生長者以其緒餘振之若夫亨屯  
傾否之道是則我師異日之憂不敏惟有束身  
翹足以待耳江風渺然結涕如雨

公周庭同年

十年以前弟與兄離而合合而復離此番則離者其常矣亦復何能無慨然然弟之困憊原不作春明之夢其猶與兄同籍同館奉清誨飫高論者則猶假之歲月之緣而不可盡謂之不遇也每一念及以此自寬耳世之相者舉肥久矣使唐諸大家與時賢共逐柳州眉山或稍甲乙廬陵臨川彼直學究視之耳此中不必深求必深求或無意者轉爲有意而變態生焉秩宗師傳聞病狀甚可畏病疏屢陳豈是眼前世味尚有芥蒂但恐中朝以故事見留必難得請到不如委身聽之免得五內擾擾耳弟甫爲學子而精神枯憊已似老師塵鞅碌碌於讀書養身兩無所着未知稅駕之所而猶勤人未已真所謂蝙蝠不自見也一笑

申玄渚兵部

客冬曾致數行於記室不審入覽否愚父子情事大抵如蓼蟲處蓼無復回甘之時當事者亦可以見亮矣而小疏未覆不審何解戚總鎮竟

挂人言矣大抵宦途無天介胄爲甚戚君與文  
墨爭長得謫固宜然其才終可當一面也偶便  
及之

馮栗庵主政

竊惟尋常師友間傳經授鉢感恩則有之至如  
令兄先師之知愚父子非意氣非文字卽鍾期  
子牙未知孰多也千古難窮之念別無可以自  
酬止此隴頭一片石而家君老不任役某又鈍  
不能役掀天揭地之光采僅收拾之寂寥數語

中使人悲而欲泣媿而欲汗長以此負我師矣  
乃門下遂謂此朽毫禿穎足爲墮淚之碑齒謝  
勤倦又介以兩世兄之幣萬萬非愚父子所敢  
承也家君比者忽忽殊無聊賴不敏支持晨昏  
力憊神枯卽頃者於先師不能效生芻之奠於  
門下不能盡班荆之語種種坐此門下疼痛一  
體當有所以鍼頑砭愚定不津津俗艷爲矣初  
聞先師謚議未定意故事歲終類奏今聞主議  
者果有異同且以先師調停朝紳共濟國事爲

持兩端者然則必立幟分門日尋闕閱始爲君子耶士大夫議論如此心術如此當爲世道發大慨非但塵點日月而已身旣長隱不能申眉一言凡在門墻豈甘灰沒吾翁能以內舉不避之義爲二三子首唱否望之

于穀峰宗伯

伏承使翰重以華袞之章爲老親稱壽片言尤鼎一字七襄此爲子孫者所爲重趼及門乞殘膏餘瀋而不得者也而今一旦坐而致之亦何

福可消此何德可酬此哉但家君比日所遘殊無好懷一切頌禱之詞如爰居之鐘鼓塞耳不聞兩年於茲矣今幸得先生長者滌以鈞天之妙音發以枚叔之雄辨當遂爲渙然意解霍然體輕子墨引年正當不減昌陽耳不肖烏鳥私悰實不能解晨昏之戀前歲差竣之時已有小疏告覆况今膝前落落豈忍復言絕裾仰負深知寤寐爲耿謹此草布不宣

樊棠軒弟



昨奉談晤已復卒業所爲令兄狀文而私心嚮  
往之羨見真令君且深幸樊令君有此難弟也  
恨比時窘於他客不及爲高士下榻負媿無已  
猶咨咨枉謝何耶令兄明府懿德美行不勝記  
撮其大都如千丈明光錦剪作襜褕窘束無生  
氣且不能滿鄙心豈能滿弟兄百姓之心耶以  
此長負明府矣承諭欲爲明府請謚請祠僕不  
諳朝典第見今世無法外事官不登三命非死  
忠死事者不謚不祠卽龔黃卓魯復生亦不過

祀鄉賢名宦而已今令兄明府旣官有特祠鄉  
有私謚豈不足爲重耶兄幸與識者更商之

馬肖乾憲副

太老師名世大業所謂游夏不能贊一辭而家  
君以燭武之年任載筆之役瞻天測海毛髮未  
償台下何譽之過也不敏丐養局面雖幸粗完  
然鳥烏啁啁其所以自保者末矣時世苟詘卽  
王孝孫車上且有滄海橫流之憂藿食者能獨  
甘乎哉三復德音愾然有感

李桃王親家

昨得丈高捷報踴忭無已既得尊卷讀魁碩精悍如百鍊刀如萬石弩無堅不摧無遠不洞此番逐逐鴈行似殊未滿衆望須來春攫取龍頭一伸狂詘耳弟一病三時初擬力疾趨賀聞尊駕遄發而止過此便須待丈錦衣持節一望清光也

李念劬王政

弟賴台庇丐養事粗畢所差勝者中書堂催課

吏不到門惡風劇波不入耳如此而已老丈乃以此見祝乎惟是區區兒女家常尚犯鬼神之忌往年登籍之子四今僅其一年來賤體又善病蘭茁無期蒲荒可慮懺罪穰災吾輩當自有法老丈何以教之適又爲回祿所驚扶倦作答臨楮悵然

王霽宇總督

拜箋已竟而使者復有後命捧讀增慙弟考古人自作自書如李北海趙吳興輩皆滿意之累

卿中書之毛穎相得而成章耳其不然者如材  
師課章句纂甫脫手而已屢屢然惡之拂塵掃  
葉惟恐其復至前矣尚能快顏揮灑作盤礴之  
客耶乃台臺孝思無已卽蟲書鳥跡必欲廣收  
俯拾則鄙拙亦無所辭命矣家君年至日昏間  
一作擘窠大書細書則不復能成行惟不肖比  
亦善病入夏來痰熱交作執筆如杵欲稍消息  
賤體勉爾供役俟秋涼尤山人奉詣鈴下定不  
負此諾也

瞿洞觀運長

家君與少宰年伯直心戇口間有又牙究竟冥  
冥之中百無所負卽意氣諸公有指而見詈者  
亦必掩耳過之決不引絕不相關之事爲已詎  
厲况大作原不相及耶止以少宰公求去之時  
調停苦情見察者少此處須有道者一爲點破  
然亦非今日所急也草草附復不盡

許繩齋太守

緬惟明德正如調饑忽奉教言增其愷結某無

似於世間往來贈送之禮百所不解惟是好德  
感恩一念掇皮皆真乃五年宇下忽忽不得申  
而所自展者止此乃煩明公齒及耶時事異矣  
使必盡厭衿紳之腹盡滿輿臺之口而後可以  
無咎卽墨大夫知且灑然去之猶幸而道路有  
天鼎鑄有耳終望衮衣再東爲我輩襜褕耳江  
流如便幸嗣好音

俞瞻白太尹

盥讀來章琳瑯滿紙強半溢言使不斂口呿而

不能答則且奈此瓊瑤何也不敏未實而華未  
老而倦此宇宙之蠹餘而尚可稱於閭閻之林  
乎頃者乞養得請老瓦盆邊日月滋覺有味擬  
遂於賓履之間父子相携歸向嬾殘門頭稍懣  
悔半年以來所得浮榮浮譽而臺下復津津念  
此嚼後之蠟祭畢之芻徒令人覓夢不安寤寐  
自語耳知已實難卽當樞謝不盡

楊魯源同年

都門造次滾滾馬頭塵不能令踈者親而能令

親者踈同籍兄弟至有不識一面者獨幸附老  
年丈梓末獲奉步趨穆穆化弦恢恢大器竊於  
罄咳間一窺見之乃者素書赤鯉飛渡錢塘重  
以瓊投增其感結弟生平所志原不越馬少游  
今通籍甫耳而遽不勝乳下之戀竄迹菰蘆真  
聖世之逋臣傳家之惰子未滿而溢鬼神厭之  
矣而老丈尚津津艷稱之乎居今之時莫邪爲  
鈍差得自展者惟郡縣之長耳老丈含吐膏雨  
披揚仁風卽腐毫螭下功行有百不相若者况

弟以已盡之才汗窮愁之簡其不足以與於三  
立可知也屬有家冗不能作俳語奉酬草草謝  
命伏惟慈亮

又

長安接晤時稍測吾丈底裏才如霜劔心湛冰  
壺知百里不足以辱丈然亦知吾丈不難百里  
也弟福過災生歸後遂失三子日圍圍老親膝  
下無懽可承朝心不開暮髮盡白譬如蓮萼甚  
華而葯甚苦丈無以貌見羨也家君衰病辱以

憲老之禮不勝感悚已有專啟報謝諸不盡

張業師

楚樹江天通訊不易乃老師歲一遣書重以華  
詞玄論花粲雲起計老師春秋已高鼓毛穎之  
餘勇猶能含古鑠今攀秦提宋難老之美卽此  
可占若不肖則髮未化而先枯腕未脫而已倦  
矣常念居老師之地從前所經苑枯得失之場  
毀譽悲愉之境皆宜付之蕉鹿夢中而來諭似  
尚介介不忘躍躍欲鬪五嶽方寸坐此尚掛一

點微塵縱今日元愷齊登喬松並壽而唾壺終  
缺鼓缶不歡不敏尚爲老師惜之不敏通籍未  
幾遽自竄於蒲蛤之濱相知者亦有爲咄咄彈  
指如老師所云者然鄙衷則已照破久矣家中  
久不置仕籍不知淮上劉叅軍爲何人鄙野可  
笑然吾師覩此情景亦不必以世味中語強暖  
冷腸也會送一親友赴任倚筆作答十不盡一  
惟幸原亮

答友人

伏承示令郎佳篇翩翩奕奕真所謂駒齒龍文  
臺下微詘於彼而取償於此天所報長者不薄  
矣靜而需之冲霄躡景自在足下正不以旦暮  
爲遲速生平語澁口重不善居間矧督學以憲  
職提衡非郡縣之比苟非甚不自愛者誰肯顯  
通關節亦誰敢以關節通之使衡不察而以故  
人爲托則董丈且唾而見絕不敏實不能具此  
淡面也古今之事不同前朝開薦辟之門其途  
自廣今日糊名就試本是骰子選着不得一意

蘇長公云非分干求於定分無分毫之益而道  
德有丘山之損有才如令子何患不早發少年  
初進第當養其器識使之進禮退義羽儀日新  
乃更在文章科第之上耳台臺以爲何如

蹇理庵總督

四千里之外歲承爲家君陳詞戒篋幾于禮過  
而泰情過而溢非但甚感甚愧且矍然避席而  
起矣家君劬勞之念老而若新偃僂之戒晚而  
彌篤每當斯日蚤然逃虛其不能拜長者之觴

有以也不敏依依膝前不過以襜褕爲舞衣葵  
藿爲鼎食烏鳥一枝苟以自安而已敢煩以雲  
霄聲價爲之噓借乎悚仄悚仄

耿叔臺操江

適承札示始知台臺情事亦自有真不堪者小  
臣之進與大臣之退稱兩難者已數年於茲矣  
苟非坐索長安米添註政事堂者隨所任劇易  
要亦可以公義奪私怨况我翁臺之以數千里  
爲堂與儘廢經營者乎比者中朝復來聚訟當

事者甘苦自知非野人所能妄測要之此中乃  
水火交爭之場智勇兼困之地亦從來久矣台  
諭四君子者信是濟時之舟楫但尚未經天下  
第一惡灘不知所自信謂何耳邇來流言飛文  
譁於里中民心日生盜賊多有養疽固難决疽  
亦自不易此皆在翁臺籠駕調伏中隱人所恃  
以無恐者獨此而已伏惟留意

孫月峰尚書

不敏嘗竊歎福真有量器真有極自念此瘠材



散木無因而枉匠石之顧乃一顧而人損來再顧而天刑至名之不可妄徼如此今以老先生千古人物一字華袞而顧擊節盱衡于乳下之子此豈所以爲某福乎不敢當時事孔艱蒼生之望指所首屈者爲誰老先生直辦一力擔荷更無跋而望之他人矣

鄧虛舟大尹

數歲宇下菅蒯之質得沐陽春今飄飄仙駕已入雲中視壤蟲萬里隔矣不虞箋寵之復見存

也屈指徵書又復徂暑徘徊香署旁局愈清旦夕當事山公之啟傅公之笏山中人已揚眉視之不知以何者爲第一籌也不肖丐養之志爲老親分勞破愁而已比來犬馬善病乃反以顰眉之事貽之老親嚔沫江湖尚爾頰尾况敢作釜中之游乎明臺愛我幸無過望

緱山先生集卷之二十二

太倉王衡辰玉甫著

男時敏

僭李穀

校

莊赤雉同年

昨者救廬款對不能晷刻粗陳壘壘薄選絲竹  
了不能自異于悠悠者以此媿知已矣屈指吾  
丈履任忽復經時南中山川之雄秀禮樂之都  
美大足以發枚叔之辨窮班張之辭于蕩皆滌

胸不啻已足何物二豎能病君子乎弟今所處  
已是乳下小兒竈下老婢局面實不能爲老親  
分忙破愁直是倍忙伴愁耳常自笑生平好游  
游之勝地最稱白下次吾郡及陽羨武陵諸山  
搃角游白下時遂困佔俾不能記今老而歸來  
東南半壁諸山不惟日窘不暇記亦苦才窘不  
能記所謂知者僅是中年落莫所歷燕薊諸山  
一班耳其實彼之上駟不能當此下駟而弟偏  
與彼有翰墨緣豈弟之枯皴拙繪與黃沙白草

差足相副耶山靈之嗤我久矣吾丈宵貯五湖  
筆搖十嶽登高作賦幸無讓人弟雖倦游猶能  
卧而讀之昨有數行附家叔奉訊江魚如便幸  
嗣德音

吳山人

長兒之變千愁萬痛非可言既所最苦者家君  
無片地着落爾異惟有方外有道之士沃以遐  
觀超舉之談可稍解萬一然家君茶蓼已深纏  
縛甚固愚謂此念不解卽修年之彭未必賢于

殤子門下如有治心之法先爲破除煩惱卽是  
無上菩提非必三轉九還而後爲上道也芝馭  
若有日東下當掃榻以待

耿叔臺操江

亡兒自南中歸日侍祖父之側詫長者之遇居  
無何忽病病未踰月遽死至今猶如在夢寐也  
細察此兒生平真一處子得病之由與受譴之  
故纖毫無之直是不肖業崇釁積中陰陽之罰  
而移禍其子耳不肖初有四子浹年來已失其

二皆嫖秀可念承歡爲重猶能以強笑遣之今  
柰無歡可承何家君自獨處以來實倚此兒爲  
命晨昏食息未嘗少離平日情深若此此番則  
不深不得旬月以來聞風聲而悲見人影而懼  
居家不可則逃之深山又不可則權牽小艇沿  
菰蘆上下以苟旦夕情景如此雖黃面老子復  
生亦無術爲之破涕矣重辱台慈軫念齒及復  
拜生芻之寵謹此附使控辭惟有哽塞

沈定菴僉憲

歸後何日不在愁冗中今復遭奇慘不敢自比  
于人苦海千丈弟拍浮其間不知尚有活理否  
心腑結轡兩膝如攣正追趨家君於枯蓬斷葦  
中苟度旦夕不敢望剡溪之棹也方寸如沸占  
謝草草

馬肖乾憲副

伏承專使遠存爲亡兒枉唁重以哀夢固知長  
者之分痛也惟愚父子叨冒已極亦何敢有過  
望如來箋所云第喜此兒循循孝謹庶幾有萬

石家風卽哺糜茹菽雅勝鐘釜而今已矣復何  
言哉若天道有知不當令此兒殤死直是愚父  
子讐積福過而移禍及之憫痛之餘惟有叩心  
捨地私懺罪業耳猶幸乞身子舍長得充老親  
弄兒但眉頭不伸鬚鬢已白求所以破涕爲笑  
者而不可得也如何令先翁太師墓文家君亦  
以愁緒如縈久負前諾然終不免磨厲朽鈍以  
報二天第無作者之法柰何草草奉復臨昏感  
愴

馬肖菴尚寶

伏承爲亡兒枉唁至以哀詞纍纍待以禮殤豎子得此可不朽矣此兒雖頭角未成聲譽未起而頗爲鄉黨所稱父子所守硜硜鄙人之緒私欲挈而付之此子而今已矣世界缺陷日辰孤虛愚父子亦何敢以再實之木求多于造化乃逝者何罪且家君自失此兒朝不朝夕不夕東門之達亦第爲身遣耳若瞻前顧後載愁萬斛如不肖者亦不知所以自處矣令先翁太老師

墓文亦以此久稽來命蓋憂虞之未間而又未敢倩筆他人故也茲草率請教惟兩翁自以尊見裁之

胡瑞芝巡撫

臺下愛我尚似曲江舊夢津津爲故人彈冠不知器忌已盈木忌再實坐此分量稍過遂中陰陽之罰天刑疊至生趣漸窮今不敏行徑直與家君闖闖相守共保歲寒如是而已絲綸事業竟已付之浮雲冷風惟欣附世籍快覩臺下高

揭日月之旂直逼星辰之履爲菰蘆子生色耳  
別具纖菲伏惟亮存

上父書

竊觀古今以來未有人而無所寄其情者惟太  
上忘情爲能泯絕無寄然無寄之寄亦寄也惟  
父親自歸田以來毫無所寄竊謂今日非另換  
一副肺腸另開一篇局面易憂以樂不可而樂  
又非人之所能進也進以樂而不能受則愈悲  
悲則不可復進矣其道非自尋樂不可自尋樂

者於無味中求味於無情中求情而已古人之  
樂多端有好靜坐者有好園林者有好聲伎者  
有好讀書著述者裁以老人之所宜靜坐宜鍊  
心不宜鍊氣宜偶行不宜竟日蓋鍊心則穩而  
有益偶行則逸而不勞如晁文元之宴坐有時  
自謂真樂者可法也園林則宜專不宜雜宜任  
人不宜自任蓋專則精神聚任人則功罪明如  
張功甫之分地藝植無日不賞花者可法也聲  
伎則宜密坐不宜開筵宜短奏不宜竟日如韓

持國之手執紅牙卧而節曲自謂忘暑者可法也至於讀書則宜從容不宜疾讀宜節次不宜斷章蓋從容則緩而有味節次則引而愈長著述宜筆記不宜抽思宜警世不宜應世蓋筆記則近約而不繁警世則實而有用此則宋元歸田諸老無人無之風流議論掩映來襪絕非如今人五車四部一字不堪存者也此數者皆情之所甚便勢之所易辨或擇其性之所近則有順治之方或矯其性之所偏則有克己之法惟

加之意而已蓋老人自治之法與少年不同大抵熟處要生生處要熟真處要認假假處要認真人不可一日無朋友在老人尤不可無蓋人至于老骨肉自然零落朋友者所以濟骨肉之窮也種種諸樂各自有友饑飧飽臥非友不節更長日永非友不消今初畏生客重客漸而并密客畏之嘻亦甚矣度所畏者人事耳天下豈有人而能離人亦豈有人而能離事者夫人者天地之生氣也亦天地之吉祥氣也故屋得人



絳山先生集 卷之二十三  
則不腐器得人則不壞山林修道之士尚欲求  
近市塵况在市塵者哉且人亦非甚難處也彼  
非真能浼我與有不可徇之求也一切悠悠之  
徒到門而已未必求見也有所慕而來者以得  
見爲幸耳非必求留款與答拜也必不可已則  
見可已則謝誰敢強也願陪則陪不願陪則弟  
子陪誰敢責也年位至此自當別立一格昔范  
忠文致仕無貴賤槩以野服相見槩不報謝而  
史冊以爲美談今日見一人則一日不樂一

處見一人則一處不安視之如毒猛不可嚮邇  
也亦過矣年來閱世漸久覺得相人之法與相  
文同大都不論品格高卑氣韻雅俗惟得春夏  
氣者多吉得秋冬氣者多凶今吾父子潔淨收  
藏已是秋氣若更妝點出淒風苦雨迷霧嚴霜  
之景純是一團蕭煞發生長養之氣何自而來  
甚且畏客不已而畏夢夢是心之影消子畏影  
古所傳以爲笑者也今骨肉無多不可不着忙  
不可不珍重若只視天下遂無一物可喜無一

續山先生集 卷之三十一  
事可做無一處可住無一人可交則生趣窮矣  
就使從此疾病不干至百歲千歲而閱世已久  
其憂愈長可惜父親以蓋世之聰明高世之名  
壽謝人所不能謝之官絕人所不能絕之慾而  
究其受用歸宿雖世人忙勾當村快活皆不如  
也來日儘長回頭未晚不若就此十二時中使  
身心處處有着落飲食起居調停得不饑不飽  
不忙不閑使日有日事夜有夜事卽此是真靜  
功真道學只苦不加意耳男棄官歸舍少年三

不朽之癡念俱付東流只有承歡養志一事而  
今悶悶無歡可承無志可養對泣不可強笑不  
情相守無益相離不忍種種鬱結麗於胸臆間  
不酸卽痛過此以往男亦自謀之不暇矣伏幸  
豁然悟脫亟思所以延和氣娛永日者至望至  
望

耿叔臺操江

微傳台臺閉閣經旬謂他有托耳不虞其果困  
採薪也不敏丐養得請微念粗畢此亦會乘鳧

去來于自爲謀易耳若台臺而思稅駕豈不虛  
費此九迴腸耶楚宗事家君正爾縈懷辱示極  
感同憂之誼落落群不逞原如搏沙而朝野紛  
然不知人心何以不耐亂而復養亂思亂好言  
亂此滋不可解矣外寧內憂迂儒之言漸覺親  
切台臺旦暮當局幹旋次第亦可略聞否劉先  
生霖雨之望衆所共許今又與翁臺左提右挈  
惓惓之托匪獨故識也觀翁臺津津相告直有  
喜而不寐之意上臣用心至此爲之悚然海濱  
寡陋聞省有私史號肅皇某者意所願見可爲  
一覓否恃愛附瀆不次

陸欽所憲副

城下一別忽復許時弟初歸碌碌無幾何而大  
愁狎至苦海中日月悶悶昏昏初不知翁丈之  
官何地任何日也弟浹歲而失三子涼德罪積  
固無說之辭乃以丈之神明棊相而亦同此傷  
心之痛蒼蒼者亦何可料稔知荼苦敢相勸以  
東門之達第念吾丈游宦四方雖小小躓挫然

輪蹄竿牘亦可以少遣煩愁若愚父子褻泣相對濡頭百丈愛河中無有出理吾丈何以爲弟解也老親數憂福過得寵若驚今一旦摧割至此此豈言賀之時方寸如沸不盡欲言

黃荆山縣尹

憶在京邸見老伯所居蓬門土銍充然有自得之色竊知老伯必辦爲吏人患不真耳真則乳虎可狎何有馴雉也某比所遭奇酷蓋淡歲而失三兒愚父子生趣適盡百不自聊老伯何時

治成錦旋得奉濁酒車前一訴愁痛言及泫然楊撫公詩亦未能於懊惱中草草成句拙筆塗鴉塞責而已并惟台諒

鄒瀘水座師

往奉承東來之約神動色飛然太師母春秋高倚閭之望想當介介以不肖之不能往而知吾師之未必能來也茲承手諭知福門慶祉駢集甚慰甚慰不敏福過災生前者失兩幼兒尚可

以理譬遣曩歲所失則頭角已見之長子也老

師以堂上見慰謂得損于此而收益于彼可謂善寬然老親倚長孫爲命自遭變以後朝不朝夕不夕卽不敏如東門吳亦不能自爲達矣老師何以處我伏覩手教處江湖而憂廟廊卽不敏鑿坏已深何能無滄海橫流之感但治蠱之策幹父蠱易幹母蠱難今日官府隔絕嘖笑不通調燮殊未易言大抵此時此勢自開闢創有之局面所恃者國家亦有開闢未有之福運耳至于士大夫學問彷彿顛晉人清談徃時名教

陵夷喪亂已極直如饑渴之思飲食而今日太平已甚如醉且飽者又欲惡食而逃之吾曹第當留此真穀種以待後人之咀嚼在今則不可以口舌爭也伏讀復古紀事使人憬然悟爽然失人有此識見未必兼有此議論又有此才情勝登堂說法者何啻百倍此足以警世垂訓矣衡向所云筆札之役蓋影響間記老師以太師母節行托爲闡揚而今不得其詳矣不知何以効愚鄙幸終教之

朱平涵祭酒

犬馬病日進正父子喁喁相顧間忽有此非常之命太山壓骨大懼隕越柰何家君比年雖幸少病顧獨善忘朝不及夕夕不及朝以此棲遲園畝喜其漸復于嬰兒若使之坐政事堂押五道黃昏文書老先生以爲可不可也老皮骨不敢惜閒風月不敢愛獨念此最重地柰何不及先朝史臣輪直之制今必借朽蠹以任棟梁爲此座惜耳

李太瀛紀善

病中忽承溫諭如飲甘露自恨學道不早狼狽至此蒲柳之姿未知尚耐歲寒與否豈更言雲中鷄犬之事哉來教云云得未有儻湏臾無死仰承談麈之餘請以異日家君於世外夙抱微尚而苦爲塵鞅所羈俟殘局一收卽爲白頭弟子亦所不辭門下幸傾筐以授我

卜戩甫文學

昨辱枉過適疾病之未間不獲篝燈布席仰飫

清論至今恨之細讀尊作真瑩然冰壺最上一  
乘也今世文青白參媿宮商雜進而已曾有此  
文耶然究竟是此輩文占便宜天下惟典確之  
文不能藏拙瑩潔之文不能藏疵兄文可謂瑩  
潔矣第使神來機湊表裏通明火候遂全熟矣  
非必更于鼎外覓丹也承愛輒効其愚幸恕唐  
突

蔣孝廉

得教大慙弟今曾中柴棘八斗許何得有烟霞  
入癖若少年時行脚帳豈堪與吾丈白門詩作  
奴耶所諭謹如命致之以此爲夜光之櫝幾于  
贅矣

李九我宗伯

不敏于先生雖僅覲面然居常于先生一步一  
趨莫不愧之師之盖今世所號爲巨人君子不  
過麟儀鳳彩而已先生固時之麟鳳也而乃鑿  
鑿如五穀可以濟饑藥石可以伐病此豈徒今  
之巨人君子而已乎比揆路尚虛帝心簡在郎

續山先生集 卷之三十一  
四  
兒童嬾女皆思君實而大疏若有所嗛然欲避者何也世變日新陵谷有時易位惟是泰山喬岳巋然中流儻亦爲蚍蜉所撼動其如此蒼生何矣貴部事聞經大手整頓已盡清如洗平如截矣而私心尚有微介介者今之舞文亂法者尚掛吏議而舞經亂道者居然據臬比爲學子師直以私史充庭醜正亂真以至于此凡近年不脛而售者半是物也幸爲稍留意焉

潘見所主政

生平意念灰盡惟此不平之氣未消昨見南中疏爲竊嘆者久之物議之淆無影而射者多矣今日凡詈人者必勝受詈者必負何論虛實吾言所欲言而已家從誤蒙採擇人門單寒實難攀仰聞吉期有二願從其後蓋貧家無論裝遣卽小營針縷便須許時知老吏照其辛苦不見罪耳

沈湛源知州

家君以年以力以時以勢萬萬無可出者來諭



云強出二三年審勢布局畢而後圖歸似尚未  
設身處地當今之時進旣難言退亦未易爲泉  
鳳尚可爲藩羊則不可復悔矣

張業師

屢辱翰教蓋不敏之語衰氣濁而尊師如鋸木  
出屑汲井得泉津津汨汨而未有止也卽此見  
神檢有餘南山不足爲祝矣一行歸隱雖迹顛  
冥鴻實同牛馬四支不敏未老而倦冬來一病  
經時今尚不堪典客差喜老親粗健反爲子弟

代勞然不敏之近况可知矣令郎兄考作比更  
道上自此拔茅而前爲尊師振未竟之緒豈徒  
故人生色已哉健羨健羨

蔣養庵塩臺

不敏草木一蠹消受春風不過比 勅命臨門  
亦以病甚不能肅迎堦戶塞竇者五月於茲矣  
老親代兒典客勞于夏畦台下猶津津艷其盛  
乎捧教惟有悚懼耿年伯榮封上壽不敏托在  
世誼宜亦以間修彤史之職而無柰犬馬之不

任役何也丹青無容乃反乞靈于造化可謂顛  
倒亦未知枯木朽株何以爲報耳賤銜謹如命  
呈覽

耿籃陽縣尹

病中聞兄臺駐車江干垂念病弟欲手拊之而  
病甚至足不能行一步口不能出一語忍心前  
拒抱耿而已支離數日病狀愈深生機如髮未  
知尚得仰沐雨露否然家君之命無論疲馬不  
能離棧豆朽木不可任棟梁卽膝前狔獮亦豈  
能以棄核吐之兄臺無以過望爲矣會刻碑文  
一一領訖口占謝命不盡觀縷

陳嶠陽太常

自尊府被事以來何日不在心其初駭雷劇雨  
惟不肖亦怦怦焉俄而公論漸出無論親仇之  
口皆爲翁家訟冤則大兄雖在桁楊中不肖亦  
渙然心解矣目今當事無耳目誰無人心直是  
爲體面異同所錮縛莫可柰何此正君子明夷  
讀易之時着不得一分煩惱也不肖愁病淹纏

至今不出戶庭而常虞顛躓人生何常亦未必  
福堂之果爲福堂也

王聚洲給諫

同鄉兄至接得手教病中如沃甘露跼足子舍  
來教所云擠排之故毫不知之弟嘗與周庭兄  
言今詞林白首悠悠如學宮攬貢揔其建立實  
不如一州縣吏劉忠宣奮袂而出端亦有見卽  
使見擠擠者未必非愛也教中所慨世變不如  
意事八九從古已然然而聖德容言較前此似有

勝者天下事尚可爲惟老丈積誠以孚而已弟  
一病經年尚無起色正父子喁喁間乃忽有此  
非常之舉犬馬命不足惜乃家君實衰實病則  
有萬萬鞭策不前者天聽至高閣套未改必得  
知己從傍解結庶上可以全國恩下可以救殘  
喘弟頻月不近筆研專爲此一事搏顙以祈于  
諸丈統幸憐察口占不盡

顧涇陽光祿

馳企日積自顧塵土面目不堪廁絃歌之堂踣

踣而止比疾病纏歷疑于大賢謦咳絕矣不圖  
教命遠辱命童子倚案讀之爲之慨然居平謂  
忠恕二字難體貼斯何時也翁乃以伊周相業  
爲家君勸駕卽此似亦體貼未盡處使出而如  
姚崇十事應荅如響則爲姚崇亦足矣如其不  
然求復其十四年前伴食面孔尚不可得何論  
伊周耶精神力量長短自知其次則知父者莫  
若子某一身之外惟知爲老親營菟裘課魚鳥  
而已此外非所敢聞命矣當今時事雖大紛然

較量亦有勝前代者惟學術濫放不可復理初  
猶不肖者自占便宜耳今遂欲掀番孔孟棋局  
以妖髡代之此何可長比時言伊言周總是盡  
餅於此下一砥柱乃真勲業要其道亦惟大聰  
明人守村學究蒙說如是而已蓋道本無不明  
談道者自晦之開門戶則自不免多生徒多生  
徒則自不免立異說卽南宋大儒吾未敢以爲  
不落窠臼也先生爲斯文宗主幸少加意病劇  
占復惟亮之

王岵雲學憲

當夏抄時執筆如杵猶堪自力今又作兩截人  
矣一切生趣起居眠食無所不廢止皮骨存耳  
至痛至苦恨不并皮骨而委之吾丈復何望乎  
平生于吾丈相與之契自謂不同世情此番風  
雨多恐延捱不過歲寒之托虛抱此心丈無訝  
其言之不類也楚材甚富得丈爲之陶鑄大佳  
適拜尊集歎息久之丈奔走藩服以其間修千  
古之業整暇乃爾弟無一字覆瓿而動已稱病  
精神如此能望長久乎伏枕占對不盡依依

鄒瀘水座師

今日之病似尚在表裏之間非但不可攻療獨  
苦主人隔垣群醫滿座勢不免用不寒不熱非  
補非瀉之藥以獻酬群心循斯道也雖和扁亦  
應與衆同功老師無過望爲矣

緱山先生文集卷之二十三

緱山先生集卷之二十三

太倉王衡辰玉甫著

男時敏校

詩

西湖四賢祠迎神歌

有沁兮井涯亭宛宛兮繚之汲井兮宿酒鱸鯉  
兮且有素衣裳兮澹如煙恍褰帷兮與言我客  
兮我俎紛拜起兮王母轆轤忽兮若驚魚奮揚  
兮將雨

右李鄴侯

靈之來兮日未卯靈之容兮尚妍以少山花兮  
楚楚儼擘帶兮睇予春渠宛兮至今溝洫泚泚  
兮田疇淺深池上兮孔閑紛歌舞兮如林賓餞  
兮穆穆俏月出兮波綠右白侍郎  
堤深兮水暄畜魚鱉兮長子孫柳花兮木李繁  
不蠹兮又美薦之兮中流拍簫鼓兮淺洲畫船  
兮寶馬歡與我兮游者春之日秋之夜湖中之  
人兮告以暇右蘇學士

山孤兮樹寒霜雪下兮攢攢鶴之巢兮生鶴鶴

于歸兮翼薄草青兮墓田瞻徘徊兮焉托雷峯  
兮舉火將進酒兮容與靈去兮若旋標梅兮翻  
翻右林處士

山中雜詠

日暮走旱麓雨過山氣青谷中發空響鑿石何  
丁丁累累負之去去作誰家楹我憐石骨破松  
根橫來爭根老子復出此石何時平

微雨洗石竇春流靜無言旁有青草肥戎戎覆  
高原掬之不可得照見衣裳翻撥杖尋泉源透

迤出山裏山前有清水遊者過歡喜變易生乎  
動人情好遷徙彼哉涇與渭宗祖竟誰是

向來紅杏樹著葉青蕪蕪百鳥競深巢啼者爲  
鷓鴣一啼葉欲長再啼葉欲枯游子樂未央白  
日柰已徂

門前無名樹團團蓋行路根老頗有瘦節多不  
生蠹坐者仰而嗅行者歎而去嗚呼栢與楸妄  
爲立名字濕重黃膏封亦復誰省記得蔭且卽  
休無爲問同異

蘚花漬屋瓦山空鬼風哀朱衣而火冠燐火爲  
之來魂魄本好靜其以尋酒杯怒而欲訴誰無  
乃生人猜去去同所歸春日聊裴徊

青青牆頭花野草半相附好女簪山萱視之去  
不顧余心雅自憐潔修委行路豈不見游子被  
服紈與素所患指日多君子處其汗

古廟有高樹樹上新鴉青新鴉飛不高繞我田  
車行阿母呼其雛慎勿輕作聲人心不可測鷄  
子來縱橫空巢落山果飲啄將無傾



我來菜花收薄言擷其子蠶繭飛爲蛾山翁罷  
酒市當戶理桔槔開畦待新水努力貴及時布  
穀聲爾爾歸以語吾友農夫且如此

山中有好夢雨花來自天老僧髮根青告我以  
九禪指畫富言語記憶無倒顛覺而識其處惟  
有箇在焉明星白堂堂影落松樹間巫咸不足  
問斯理亶其然

遊西湖歸及暮

錢塘九月潮怒平日出杲杲湖光明舟人攤篙

不防淺畫船紅旗射魚眼湖烟染樹輕于風綠  
盡高山及平行齋鐘一敲簫鼓清前船恰上湖  
心亭白墻紅樹酒家裏來者將醉去者醒醉看  
芙蓉高復低賭詩鬪韻歌聲齊迤邐六橋花更  
暖提壺再上蘇公堤堤上行人如走馬共息蘇  
公桃樹下烹魚膾蟹坐如雲日暮曾無弔君者  
看看水面天模糊神燈磊落行渡河西陵西陵  
柰爾何

過故宋離宮

泉聲嗚咽寺門前望到斜陽更黯然佛閣幾經  
粧閣改柳枝翻作竹枝傳蠨蛸露下游銅井躑  
躑春紅滿藉田聞道武林春社裏至今土鼓挂  
榆錢

竹子深深覆短溝人傳此地鳳凰遊江水不能  
遮馬腹宮墻隨意長禾頭平原燒白無歸鳥野  
戍霜青好放牛寒食清明更蕭瑟汴州今亦似  
杭州

鳳凰山上日紅時正好芙蓉夾岸吹蕭蕭大堤  
來觀馬叢叢少女進深卮十三處所無行館四  
百季來讀斷碑始信滄桑亦常事及時行樂不  
須疑

西湖上拜岳武穆墓

當年飛將事橫行強弩如風射不平戰後歡呼  
重出塞軍前痛哭話休兵此身恩遇先酬死中  
土功勞負請纓怒逐鴟夷入江水新潮更接舊  
潮生

酌水包茅薄獻酬不須入墓氣如秋寧辭腔血

新山先生集 卷之三十三 五  
膏原野誰使勲名在淺丘伏臘衣冠新戟下有  
時風雨大刀頭西湖縱道經行處夜夜神燈照  
汴州

游西湖諸山詩

余與仲醇以九月遊武林高至五雲幽至  
水樂無不探者每夜飲酒至醉則與仲醇  
互唱韻作詩舒匹紙寫擘窠大字唱絕而  
句不成者罰又遣一童子舉酒杯酒冷而  
篇不就者罰法無短長興盡而止興無多  
寡紙盡而止故詩皆草草不足當里謠也

登五雲山

西湖之陰山簇簇登高望遠五雲獨江濤拍雲  
千尺強繚繞來及山之足山危無杖攀鳥巢風  
吹大樹如短蒿松頭多烟亦多雨半嶺霏黑空  
生毛須臾日出若乍曉會稽山陰殊可了市梢  
青入平沙長歇涼亭外行人小行人花帽衣蓬  
蓬擔羊買酒携兒童上堂再拜復再舞願山無  
虎田無蟲祝者盡道神來止竹上挑燈紅累累

我亦攝衣前致辭願我遊山日歡喜

僧刁雲年少知詩挾之遊湖盤桓數日而歸

生憎不識西湖月與君到處尋船歇煙橫橋斷  
行人歸魚梁蟹麓參差沒沸酒闌韻期君詩君  
詩能及酒熱時短巾麻鞋白衲子長公風流今  
在茲湖邊冷塔亦舉火晨齋不歸長者怒

訪雲栖師

下及半山逢遠風風聲洪洪吹寺鍾亂石盤折

無次第松籬戢疊迷西東觸景緣念增慨慷生  
季三十多荒唐君不見山之塢草頭綿綿晝眠  
虎白髮頭陀爾何苦

西湖竹枝詞

踏踏吳歌十二時油車白馬客參差自從風雨  
西陵歇翻却楊枝唱竹枝

菱田高與稻田齊野井螻蛄徹夜啼若箇竹枝  
聲最苦那兒橋北趙園西

高懸十里下風桅白袷青裙次第來怪道竹花

簪不盡五雲山上賽神回  
簇簇滿炊菰米飯娟娟緩唱踏歌詞爲謝西湖  
蘇太守桃芽柳眼不須吹  
酒盡爐青客未休脫衣走馬恣風流西湖亦有  
橫塘曲一拍風吹入秀州  
請君一向斷橋行橋下花泥漸漸平此日風光  
應不忘重來記取竹鷄聲

錢塘江浪淘沙

暗水漫天不見沙叢叢海燕宿蒹葭揚州估客  
爭欺得打浪撈泥一任他

石脚高低白浪奔剛剛石上印沙痕夜來潮信  
如風急忽地移痕到驛門

盤盤沙浪旋回渦浩蕩空江鬼夜歌由來不信  
錢塘險曾向龍山渡也麼

大野荒荒風怒號上流纔急下流高花光閣外  
新沙暗十五漁郎好放篙

澁澁青沙軟不流茸茸細草漫汀洲秋來幾度  
江籬濕催得行人白到頭

白馬神君踏水煙魚牙鼉鼓拍風鮮無端子午  
江如市日日淘沙漾紙錢

聞道山陰雪半消北連湖水下桐橋桃花浪起  
衝沙破恰好東風上白鱗

惆悵行人不遽來風風雨雨過黃梅門前唱罷  
箜篌引潮落沙低又一回

乙酉春余與仲醇讀書支硎山日凡三出  
隨目所得卽誦於口效天如和尚體詩在  
歌偈之間不必盡解無論工也

曉山烟重暮山開石馬三朝半綠苔掃得墓門  
清似水梅花昨夜又飛來

十畝山田任客租松毛滿澗半荒蕪偶然昨夜  
風和雨綠到僧家香積廚

清明將近陌頭黃稻種參差打麥場無賴煖風  
催插種趁閑日日上松岡

白白黃黃卷耳根采來其柰北山昏經過市上  
無烟火人在溪橋洗藥盆

原上春風散鬼燐馬蹄月上暮山貧樵哥猶自

不歸去放鶴亭中問主人  
天平酒客欲歸時路口人家正晚炊墻上新生  
青竹子亂敲花板落秧池  
夜來月暈半無光今日風頭不可當我勸游人  
且歸去百花如雨下山塘

哀寒食

野田麥飯攤陸續甚風疾雨泥相蹴黃雀何所  
將兒啄啾啾飛上人家屋屋上多季生瓦松五  
月不掃花蓬蓬新起高臺缺墻壁兩廊黑暗啼  
陰蟲自來臘月斷煙火何日不同寒食苦耳房  
冷氣旋作風那更餘灰施空土人生誰能百歲  
期井中之影霜後枝君不見東家兒孫聚頭哭  
紙錢不動收魂旗

游玄墓

出郭薄遊覽鷄豚初散時老農能驗歲小女學  
繰絲茶地開新徑松陰在短絺豈須尋遠興在  
在野情宜

游虎三橋橋東西已半爲淺洲平田非復

昨日水月之觀矣

宿昔當橋門舟師戒犯浪邇來太湖灘蘆花白  
蕩蕩

我觀滄桑變天地無倚托無令後人笑經營好  
石榔

別支礪山一年舊遊如夢記憶未遣戲拈

短句

根在原上花在水邊悅懌女美而不能言  
將子上山驕不能下好風來吹衣裳欲化

野日玄黃歸無廼早剩有酒漿以漬宿草  
薄來無日酒場載遷于以流連于彼墓田  
扶者醉者其行施施下防石芽上瓜籐刺  
旅旅酒亭落落水亭紅衣者客白衣者僧  
有蟻出遊封于高壘明日大難愁而不寐  
榆葉始秀色如老鴉有情無情綴以紅花  
我夜讀書有聲過耳流星如煙照見野鬼  
菜花茸茸鶯花間之我醉匪酒酒慵不支  
春日洵美其光洋洋野馬如霧亂人心腸



風吹嘯歌不見倫理松聲鳥聲亦下亦起  
長杉老栢于焉盤桓陳郎去矣影在樹間  
支公所遺不毛者石風過石青雨過石黑  
步出東門其樂綏綏舉頭見花誰不能思

思仲  
醉也

### 春仲園居

無事此經月細草衣垣墻開門不見人但聞花  
甌香眷言對華滋有懷托春陽無棄管蒯質生  
理各有當

### 夏日園居

不到已經月園門夏雨初檉花來喜鵲蘆筍散  
新魚宛宛扇無力紛紛月自踈如聞桔槔動夜  
起讀耕書

淨掃竹亭子深居聊自娛旅葵當淺戶乳燕入  
新廚小睡幸無客閒行多起予因知野中興定  
與市朝殊

瓜已東門熟東臯禾尚蕪有田耕自耦不酒醉  
爲徒客苧先霜白蟬聲共暑徂薄登山果賦魚  
鳥任成逋

隨意尋春到欣欣藥徑蘇蒺藜從得刺惹苒任  
爲珠百鳥充花使千頭仗木奴灌園如可老吾  
欲傲江湖

傷士不遇

士爲四民首豈以示夸異末俗雅道傷浸浸逐  
聲勢顏色貴姣好衣服別鮮麗隸也夫何力宴  
笑樂泄泄念彼非殊絕文辭善粧綴父老有好  
言摘事曲相說重違人不祥俛心受經藝

昔爲糝中實今爲倉上塵隨風任簸揚積粟如  
積薪嗟我同舍子短鬚未覆唇竭歸父母喜車  
馬耀四隣縣伯不追呼鍾鼓邀上賓十五學句  
讀名姓固沈淪試察丘里言讚歎聲何頻

少季盛意氣縱橫矯無上不學諒可能韓生志  
何壯束髮受衡軛鼻息制俯仰氣數專事權遭  
際忤謀望豈其乏良圖致身竟無狀跛兒牧群  
羊羣羊不能抗

三反省過愆過愆不可得出門欲訴人逡巡慘  
顏色嬉怒相對持聽者反不直談笑聊支吾反

覆誰黑白婦口執嫵妬人情險於蜮去去勿復  
道掩卷空抑扼天也非不良勢實不爾克

賢士良自苦貧賤難爲工事親貴名揚鄉黨羞  
固窮余慕孝廉節雅志亦載攻孟浪越少壯始  
事鮮有終名實難兼專虛生負皇穹誓將棄此  
道礪此言行庸祇恐命有制人道或不容

菀枯如可測造化焉用之始知日月光周流亦  
遷移人情任營度如彼奕者棊晏嬰爲之宰曾  
不容仲尼願君絕尤怨鎡基貴乘時本無糾墨

質杙椽其安施

慷慨抱獨是我舌亦旣毀喻張順衆譽矯物昧  
人理鬱陶徒苦傷廓落謂無恥顧我何百難獨  
以有名耳人生如日徂見在而已矣牛馬可迭  
爲名字更自美能以退爲進雖敗亦可喜

讀陳白沙先生詩

道味淡亦盡詩才消未窮能將堯夫質巧托少  
陵工寂寞自成響悠揚如在空世無先輩在高  
韻與誰同

會意律如動深心言入微盈盈眼前景瑟瑟箭  
鋒機造化能隨手風光不墮圍太玄真尚白人  
道解嘲非

懷陳仲醇

舉世厭人倫師道久滅裂里塾與序序句讀鄙  
是屑稱餼薄未效擊蒙笑爲拙童子驕佩觸居  
就先生列陳郎古人心喟然仗竒節身植洙泗  
刑彌縫黨所闕羨君志良苦思君未敢說  
聞道愧殊暮年駛將柰何所見或恍惚石火光

已過譬彼蕉子心葉葉如重簑伐木乃見本豈  
不在執柯微賢雖如風足可做蹉跎相違僅三  
月遂與俗事和安得叔度來破我鄙吝多  
著屐巡池塘濯濯花與柳鳥鳴挾雨韻苔生覆  
魚雷舉目動成思思之不可有平生縱慵拙雅  
不解藏醜我非易牙味聊可悅我友吾友不復  
來獨賞得佳不同病諒亦然珍重且勿苟

自嘆

前身是居士生長宰官家飲啄齋時飯心情春

後花強教應賓客差亦勝紛華終自慚予拙城  
門學種瓜

自我不如意讀書知半訛摘花聊調笑焚草避  
譏訶棄世終難說遭時似小過生涯如恨恨詹  
尹道如何

少有嵇公癖那堪與世親裳衣或顛倒車馬太  
逡巡避客私開徑移園更卜隣非關愛沉寂我  
是自由人

束髮事經藝心將文在茲窮愁復誰信公是久  
予欺風雨拋書夜衣冠動古思吾猶及大雅不  
謂遂如斯

崑崙山人焦螟寄歌

崑崙王山人有舌如流泉文章傾注不得盡酒  
醉微吟秋水篇心中豁然了無事厭薄江湖等  
朝市妻子饕餐那得知五十閑身謀所寄寄身  
不及春鳥窠粗排竹木復補蘿淺窻矮戶安不  
頗熹微恰愛晨光多午眠卯飲恣婆娑稱意呼  
爲安樂窩汲汲波波自今古岡頭草色如雜組

吁嗟我不如焦螟蚊睫之上無風雨何物么麼  
字丈夫山人山人殆隱乎

雙白燕歌敬爲二叔頌萬福

氤氳屋梁煖氣生瑤光散落天河清光芒不肯  
太狼籍東到大海初分明玄鳥遂將雙白玉赤  
睛黃口驕相逐滿地霰花如洗粧更添晴月來  
新沐差池素羽風娟娟改服不受諸雛憐烏衣  
已故海泥薄移巢近向君堂前堂前一片荆樹  
紫氍裘主人色相似錦簇銀綾覆玉筐輝輝對

舞春從始行見致君葵葉芝千秋萬歲頌公尸  
滿堂賓客賦欲就正是梁園初雪時

贈趙凡夫

靜者意常餘幽齋事事如衣冠耕墓草婦子饌  
山蔬桐樹成棲並蓮花結社初買隣真不惡轉  
欲愛吾廬

漸老白雲根依微見水痕石如聽說法鶴已解  
應門日冷青松谷風開芳草樊徑蒿時不剪綦  
縞亦能言

雨後游天池

嶂影周遭合池光宛自通壁飛千道雨谷受四  
山風引水香厨裏分泉靜鉢中蓮花青可摘望  
望色成空

送長孺北征

何以別君無苦顏男兒兩足多波瀾况復春水  
平登百千尺吕梁石爛黃河寬今日橋頭設小  
俎郵筒正報潮來午天絲飛飛撲酒壺君船且  
逗荷花浦浦花不可見船去疾于箭三月蠶子

眠青桑思君此際過高唐俄然大道棗園熟馬  
頭已飽長安粟長安瓜李玉不如內家冰氣頗  
有餘莫道黃沙暗額角早涼會見秋風除秋風  
發發送吾子不負當時舊弧矢老大無端怯暑  
寒千里之行自此始我唱吳歌軟且輕爲君擊  
筑歌燕聲燕聲吹入北山去落月亭亭挂楓樹

籬賚園觀落梅

辛苦愁中見偷將酒量開何郎大遷次還逐好  
風來甲散春無力花香子漸催苦爲看不足後

日且啣杯

送王岡伯北上

祖帳西門道君行去徐徐雪月凌淮河肅風戒  
征車瓦上冰乳鳴循床顧衣裯中夜暖粟酒倉  
皇意踟躕黃沙罨昏星出門昧所如丈夫薄溫  
飽無爲歎勤渠

買粟不問主買馬不問價燕市有殊價黃金古  
臺下一朝遭知遇聲名美狼藉太常薦鹵薄官  
厨上羞炙更衣篋有餘賓門客無暇銅龍上新

詞秘書自中借光艷榮一鄉何乃况同舍

直直簷下松不能抗廊廡雖以有力者不能越  
垣堵得志何不爲稷契奚足數皎皎聖賢心無  
使落草莽濯纓清水源種桑擇高土京塵慎素  
緇志士良自苦

送張汝增北上應試

明星肅肅曉裝齊容易關頭信馬蹄柳白淮河  
遮大道鷄鳴野店薦新稊老親輟洗迎歸客博  
士持經問杖藜何況長安最佳麗秋風花鼓大



街西

送沈際甫復任龍溪

賢令未解郡渡頭人吏囂絃歌漸下里火種正  
東臯門外致牛酒群中惜羽毛借君應有意莫  
厭簿書勞

贈朱虞封

練之民比屋何蕭然市門白日鳴弓弦問誰致  
此未敢言繼活我者朱侯賢朱侯骯髒清玄  
不惜曲意審治便節縮身已爲吏先壺漿尚恐

傷民錢煦濡仁義折笞鞭輕擿官俸任免蠲行  
之邑里歌且絃逃丁有屋墟生烟訟庭閑寂慈  
烏眠開鋤隴畝麻麥連人人道是朱公田更欲  
借君三兩季循良譽望不可延縣門慟哭攀車  
韉吾願慰汝以好言君今洽禮人天歡能時旱  
潦貽民安况汝父母恩所偏但逢豐熟念長官  
乞花塲詩爲徐孟孺陳仲醇作

兩郎租山山背虛野鶴有巢花有廬石茅碇萃  
舖庭除勾連湖水通花渠春來紅白娟娟笑山

頭明月來相照乍可新香釀酒醪剩將狼藉供  
才調風風雨雨無不宜高高下下惟所施濕雲  
滿天土膏滑乞花幸及黃梅時非但與山添景  
色兼爲古人留勝跡花神自合來周旋生長不  
賴花奴力

乞花塲雜詩

二陸祠

白雲頽不流山堂久蕪沒乍聞百花香風流如  
可掇

斑竹堂

新竹點點黃疑是花上露空堂烟橫生不見人  
來處

楊柳橋

春動板橋上携邛我獨行悠悠山渡好楊柳任  
縱橫

蝌蚪灣

落花知幾多清流着春膩茭葉如許長草蛙生  
子未

頽石壑

湖上赤霞氣倒射石壁光披髮視天井居然在  
扶桑

紅菱渡

秋嘗憇未舉秋水正潔清紅菱如可採羞作紫  
蓴羹

澆花井

就近穿山井灌園聊自怡潮潮春水上好弄桔  
槔兒

洗鶴涇

青溪蘿月靜抱鶴理毛衣悠然放鶴去恰帶水  
花飛

蕉室

我愛蕉子葉好風亦好雨夜靜聽不厭燈花欲  
語語

與長孺泛舟園池觀雨後月

娛人有良夜媚月淡雲浮露氣深棲樹霜華滿  
到樓吹簫向風口載酒在花溝無窮愛今夕更

與助清幽

園中詩

雖復勤夷草心常願草滋更愁生路狹撲到石  
墩兒

老農未容易老圃亦殊難開渠來放水旋復怕  
花乾

春將三月短景物暫湏賒獨立斜陽下閑拈郁  
李花

草花未生子蒲芽如半開撐船就灘上自在放

魚來

人道園翁拙園翁興益奢種樹無頭次行行雜  
見花

不禁看花雨粗安屋兩椽老親容膝外長共雀  
雛眠

會有魚兒散先期下水松順時行月令長物與  
春同

位置蜂筒穩清明穀雨天憐他作蜜苦移就草  
花邊

未解調禽性先來課竹兒鄰家竹許大養在笋  
尖時

送王將軍督運

日光曛曛海波偃戰鼓無皮大旗捲金吾將軍  
氣如雲亦向船頭督輪輓石梁冰澌雪未央黃  
河沙凍天蒼蒼男兒橫行不裹糧千艘萬艦如  
風翔况聞北庭淨羣醜馬鞭縱橫壯夫走今朝  
鵠印落君手歸來莫忘發跡初歸瀝淮陰一杯  
酒

唐道微作狀頭漫寄

生平苦作違心事拙于用長與時會公卿白眼  
輕文章里中小兒識科第自甘懶廢年復年耳  
中猶願聞人賢况我故人貧且好富貴不欲居  
君先君今磊落空群才白馬蹀躞黃金臺內家  
衣袍清且裁榮名如此良可懷丈夫容易致身  
子上報吾君下知己既有出者可以處嚴瀨之  
間吾足矣

孟夏與長孺輩泛舟迴瀾臺

荒荒落日照孤墩就可中央立衣門草木半江  
屯雨氣波瀾平地出山根春秋弔古餘尸祝我  
輩臨流次酒樽躑躅暮雲感慨在更將遺恨問  
平原

初秋月夜園外散步

陰陰竹徑中隱隱通繩橋橋上竹籬篔簹橋下星  
動搖獨往平疇間白露沾稻苗介然亦何之遠  
望高樹標

月白鵲投樹夜涼人在門我行亦造次未敢通

問言小兒倚桔槔但指明星繁白龍昨蠶蜿膏  
雨當何村

微風拍秋螢欸欸飛欲高時來觸團扇近人光  
自韜豈無燈燭張憐汝飛蛾遭羣動亦有息農  
務緩所操絡緯索索啼織婦行已勞

我田占城稻七月先登場橋西歷歷黃半頃收  
夕陽東疇剛放花露氣浮甘香力入雖云薄幸  
免秋雨荒早晚粳酒熟隣父歡來嘗

獨坐梧桐下紛然落殘果低頭浣葛巾不覺蘚

冠墜汎瀾流月光掬之復在左忽驚人影翻不知  
知乃是我

苜蒲石

秋月影拳石知復幾許丈不盡苜蒲青油油疊  
春浪

芝石

燁燁五色芝生于千仞岡紫霞澹離披采之不  
盈筐

螢

溽暑蟲蟲怨孤螢獨自閒飛星流碧漢一點破  
青山照影杯前落衝人扇底迴東風那不度百  
草露斑斑

五舅游燕坐分牙帳歌以送之歸

生不願執耕課桑田間醉亦不願伊吾徬徨老  
食蠹魚棄男兒墮地走如風赤手能博雲臺字  
咄嗟吾舅雄姿標龐眉睥目虬髯飄挾彈戲走  
長安道捉鼻富貴來招邀匝匝金飾青驄鑣模  
糊錦簇雕弓稍弓今歸殺馬歸園時清送君且

歸去如聞廟策安思危坐致金吾問前箸頭顱  
未老建隼旆任汝猛氣吞居胥誰云宅相小魏  
舒只今長矣猶讀書

寄答屠長卿

聞君待詔建禮門青縑紫纈香初溫俄然風雨  
秋一葉犯浪歸爾桃花村盡道文章憎纓紱古  
人逐貧是何物人情強分枯與苑我獨何爲自  
咄咄祇應升斗水不能活莊周放之東海邊咲  
傲凌滄洲陶公太白相對出金娥玉枕長江頭

妻春子耕不足問空策短劔輕于鷗擲還手板  
持酒杯天地豈私貧我哉有詩百篇足歌嘯蓬  
徑復向誰行開青蘿如髮幸未白藜桂徒攪幽  
人懷君自美服集人指身非娥眉妬奚來長安  
覆車多于太行道使我疑古黃金臺禿此三寸  
穎供爾三尺喙與爾千秋名千秋復誰在我自  
有友安期公拍杖招我漁溪東海門一潮夜月  
白北鴈俄作東賓鴻有時相將御無極吾願爲  
雲子爲龍豈能熟寐聽呵殿掩卷脉脉嗟途窮



况我與爾皆半老向子損益諒所保囊中含章  
苦不早浮雲西征塵浩浩

酬王崑崙先生

鹿門車馬漸難期肯自扁舟爲我移入夜松風  
窺靜榻半規蘿月照深卮竭未求仲開三徑可  
許蟪蛄共一枝天下有君知已在浮雲身世莫  
相疑

送李茂實北上兼簡殷無美

百尺廣陵潮十五邗溝月送子千里舟悠悠江  
上發江上綠蘋霜滿頭驛亭掃葉迎星郵使星  
西流客星隱今季重九茱萸愁愁緒不可及揮  
手但努力人豈鹿豕哉况子婚嫁畢豈不念斗  
酒一篇自抑扼委蛇未肯慙退食東海一腐儒  
德衰笑鳴鳳不作長安游時作長安夢勾陳玄  
武霾朝昏山鬼晝嘯青天渾十年磨劒不改試  
千秋著書難具論此間五湖一片雨污萊半奪  
漁樵村借君喉舌叫帝閭民茲無衿禾頭髮及  
今蠲賑猶見恩輜軒使者乞恩已爲我轉致殷

無美去歲風走赤白囊壯君飲酒不衰止君能  
辦虜虜易與如聞海上復塵起餘皇散盡組練  
荒樓船將軍以誰使吾已好言謝鄉里耕桑無  
恙有吾子

問伯浮香閣觀梅

巡簷索笑亦難逢况復憑高千萬叢冷葉粘罇  
吹不散踈花入眼照還空池光黯澹搖晴雪山  
影低昂護晚風彷彿美人來月下闌干斜出一  
枝紅

栩栩園詩

結廬在川上川流自成折萬里船可呼千章木  
如結闢宇迴高風䟽池湛秋潔門外平湖光濫  
濫若可掇烟波澹人意魚鳥媚吾拙芳草忽冒  
堤翕翕春夢熟物華洵駘蕩旣寤亦同悅

南園雜花明竹淨香微微開簾散芳旭蝴蝶紛  
滿衣栩栩各有適夢覺誰是非袞繡東來時駟  
馬滿路輝湖山落廳事朝夕變景暉井深寒泉  
食澤廣潮田肥風流緬前哲因之寄音徽頽仰

園林好未與榮戟違遽然公案旁吾意欣有歸  
家園白蓮花中錯殷紅數瓣

芙蓉幕裏一枝芳宮彩紛披白玉堂借得紅酣  
剛半面褪來朱粉剩殘粧銀河月照天孫錦華  
渚虹飛素女裳知是寸心含不盡秋風故合兩  
花香

題內官出家像

惆悵東風十二闌錦鞍玉勒幾回閒自從龍象  
傳經後白馬歸來識故山

自來奉御玉皇前磨衲何從得晏眠久厭諸天  
饒色相布毛吹徹半生緣

日日焚香玉案臨隨緣瓢鉢主恩深人來欲問  
宮中事忍草窓前知我心  
故識當年供奉人寫來生面侶前身到頭錐立  
元無地幾樹梅花未是貧

壽從叔

九十春光未老時當堦紅藥照深卮賓筵杖屨  
扶黃髮吾黨衣冠讓白眉堂上德星看映彩簾

前滿月正如規竹林小院歸來後日日相將醉  
接籬

壽封君

仙郎里舍整從容通德先生始杖筇漢史新成  
循吏傳秦官未老大夫封帳前桃徑看初合郭  
外棠陰望已重最喜白雲秋署氣江湖日日信  
音逢

題二色牡丹

宮雲朶朶映朝霞百寶欄前鬪麗華卯酒未消

紅玉面薄施檀粉伴梅花

洛陽女兒紅顏饒血色羅裙寶袂腰借得霓裳  
半庭月居然管領百花朝

曹子念賦緱山行贈別率爾奉酬

王郎來而不見而兄厭臭腐蒼龍白鳳森翱翔  
又不見而翁抗疏辭魏闕袞衣苦戀慈親旁爾  
何短裘鈍馬走冰雪萬目睽睽心短長懊昔人  
言苦不早奚囊蠹魚且半老浮丘笙鶴不自保  
萬事人間摠草草姓名已挂世人口能復行藏

落人手無心要看長安花與客但醉邯鄲酒酒  
中白眼看是非爲蛇爲龍我何有吾不媿他人  
乃媿曹先生先生陳思後雲綺紛縱橫舅氏青  
箱顧向誰天下詞壇執牛耳近忽避人草太玄  
松窓竹扉朝不啟自言我老百不緣獨有憐才  
心未死贈我瓊瑤枝投我琅玕篇高賢豈必後  
生畏品題欲死居人先何以報所知指此寸心  
是蹉跎筆花夢好醜反覆似抱牘不卽棄以此  
負君矣君歌緱山且柰何山中之人已如此

初日照積雪

暖暖墟烟薄輝輝日氣晶白雲虛點染積雪淡  
微明樹結層冰綵山含凍雨情驅車原上好鳥  
鳥樂新晴

緱山先生集卷之二十四

太倉王衡辰玉甫著

男時敏

婿李轂

校

女兒乞花歌

墻頭薄雨烘朝霞  
蹀蹀紫騮嘶杏花  
綸巾挂取一枝去  
更逐飛花過酒家  
酒家小女對花立  
睡起折花無氣力  
葦中醜面虛自嬌  
今日喜從郎手乞  
紅輕翠滑不勝簪  
月明好借窓前色  
撚花

笑問郎花好何如妾相看面面不相知鏡中郎  
鬢濃于葉草頭一點白紛紛明朝化作黃蝴蝶  
妾家拚酒琉璃筒壓取百花枝上紅留君不住  
竟東下門外落花花鬪風風迎風送花時去枝  
上紅留君不住乞君顏色君可憐花若常紅花  
自主君不見朱樓玉殿埋芳春白頭不苦臙脂  
貧杜鵑聲老頻催客燕子泥香空殢人今夜看  
花在何里花月燈前盡如此四更喚破賣花聲  
桃花又代相思起

閶門楊柳枝詞

沿門楊柳弱于絲人去人來折向誰賴有幾枝  
攀不盡就陰拋入小鶯兒

二月初收鶴市燈踏春兒女笑春貧朝來忽地  
閶門柳綠到臯橋不見人

鵝黃扇子白衣裳許久吳兒不到鄉月照柳芽  
如欲語風光時節好相當

行春橋下是儂家月月關門不見花老大爭如  
少年樂清明好作柳頭茶

白門楊柳解風流每到花飛更解愁  
恰恰班雛啼不盡新鴉又出樹梢頭  
粉光亭子日爛斑欲寄音書好是難  
一夜柳花吹不到大長干隔小長干  
渡口無花水半渾酒旗橫出對橋門  
秦淮三月愁如海莫是桃根接柳根

荅仲醇贈別

良友齋頭事優游盡可書笑言心自好  
名理樂將餘別子酒樽易渡江楊柳踈  
惟存篋中句一

日再三舒

親朋在河滸終日思昏昏容易遂千里  
倉皇無一言露花村屋靜風鴈浦沙喧  
忽忽深悽愴重將別事論

鴉影江上沒鐘聲檣外吹襟期豈在酒  
光景若爲題而自理松菊吾其慎素緇  
歸來不知日相示各無疑

隔舍苦相憶各天將若何依稀尋別緒  
想像得微哦風雨真成散行藏半屬訛  
謝君勞遠念吾



已渡黃河

楊州別姊丈季良三兄

因緣弟兄好重以郎伯知石花清點茗竹榻靜  
圍碁剪燭揀今夜連床想異時茱萸不盡插遠  
道更貽誰

別伯栩叔祖

別君太感慨感慨悲以怒親朋日暮歸亦常我  
獨持君泣行路好君兼忘分與年見君布衣時  
可憐文章半世遇小至蹉跎復爾寒青瑣青瑣

典盡鄭生餓天下笑君齒都破赤手豈能回陽  
春予亦曳尾河之濱眼淚滿面禁不能相看盡  
是窮途人吁嗟乎人生貴賤真難擬王陽早來  
貢禹喜君不見楊州之市冷如水又不見江無  
底

向與長孺不成別追爲寄懷

月照白華寒松楸葉半乾以茲風謾謾念爾貌  
纒纒世事憑蘆酒衣裳笑楚冠窮途愁不任况  
且到長安

荅欽之贈別之章

九衢春月淨京華  
醑樂年年賜內家  
恰似吾鄉農社後  
白旗紅酒醉桃花

道中別汝增兄

揚州

曉柝關上動與君  
從此睽何人更如故  
到處不成栖歎話  
親燈火深盃倒滑稽  
那堪吟別賦  
秋月正如珪

周如春送予北上旋送之歸因走筆寄慨  
并以示吾里中諸友使知予懷

羨君老矣健如犢  
游韉絲鞭走陸績  
羨君貧賤樂于我  
南北東西無不可  
我願如君百慮忘  
飲酒不醉心磊砢  
自嗟功名失壯季  
兩足重繭心血乾  
欲已不已亦偶然  
但畏褻服趨人前  
人前哆口多慨慷  
吾將塞戶如鼠藏  
心事且共陳人商  
有酒但索妻兒嘗  
今日送君重握手  
囑君東歸謝吾友  
王生王生勿復狂  
一日頭毛短于菲

送李玄山之檀州

李將軍真丈夫  
生長菰蘆中  
佔畢工爲儒  
衆人

刺刺戀腐餘子獨拋棄輕鎗銖挾弓提劍走上  
都豹韜星纏徵選殊矯然千騎上頭居羞戴錦  
服驕妻孥願得一面當胡雛緹鼓北指檀州途  
烏丸至今骨尚蘇仗子氣岸操鼓枹寶刀瑟瑟  
當夜呼日黃風黑追單于手提髑髏血模糊馳  
歸藁街搏虎符高顙壯髮果不徒笑殺里中白  
面兒畏風怯寒圍瓊瑜傲殺王家烏衣郎終歲  
面壁吟之乎李將軍真丈夫

登北固

悠然眺平楚暝色自江東石有三分恨烟銷六  
代才暮城星火雜斷壁雨風開猶記題封字沉  
吟日暮回

招隱寺

行到衆山盡應知游者稀客深樵徑暝鹿飲凍  
泉肥地僻無波浪時清有蕨薇獨吟招隱咏四  
野谷風微

遊金山

日高京口渡遙值定鍾時烟雨寺幾點江山天

四垂沙晴群市合鷗入亂帆疑數盡東歸浪滔  
滔未可期

遊焦山

孤嶼自亭亭微茫接遠汀樹含浮石動海入衆  
江冥鶴表仙人骨梅花處士銘可憐春色近隔  
渡廣陵青

慨慷招隱詠我病獨登先大柳坡前浪新鴉寺  
裏烟杖頭探水渡崖足試衣褰况此風帆利僧  
寮儘借眠

大雨行龍潭記事

水雲片片遮禾田白魚跳梁及馬鞭小兒爭渡  
喧樹巔野屋無牆竈無烟回頭後車頰不起三  
尺牛涔沒馬耳農家買簑錢百千驛樓昏昏雨  
未已抱薪烘濕烟半收出門四望生窮愁須臾  
春潦忽露影日光澹拖出天井雲收峽坼長江  
明白沙湍減波紋靜石塊礧礧山根橫走入江  
澣眠如羊躡石洗足其中央石肌冷骨潮湯湯  
酒乾更買白浮梁水風吹人醉不長行路難不

可說老鼉舌喻張茅青虎子渴人生安佚何可  
常王郎慣從險底活

五月五日遊金山觀龍舟競渡

自我兒時上金山登高但覺江風寒十五季來  
復游此始知水大難爲觀水流滔滔自楊子海  
門浪出剽如矢瓜洲檣樹綠于蒲蓬脚無根任  
風使風來鬪浪一時高千巖萬竇聲嘈嘈石廊  
蝌蚪忽噴雨東西沙影侵山梢我歡飲酒不知  
數况值江頭船競渡落索朱符坐櫓工鷄黍賽

神神無怒此時寺杪亦鳴鐘夜濤吞吐雲蓬蓬  
江豚跳梁老鼉睡恍惚京口桅燈紅勸君暫聽  
津吏語日落烟青且歸去

揚州道中謁文丞相祠

白沙大樹掩寺墻載瞻載拜神旗張拜者楚楚  
青衣裳云是宋文丞相之祠堂堂前銀杏日光  
小以手讀碑殊草草惟有石壁垂文章五月涼  
風射人腦我思當時丞相何嶮巖夜行晝伏隨  
狐狸蘇剝名字胡以爲感格非有精靈竒丈夫

之類亦有泚俎豆其間良足矣君不見揚州歌  
吹空潮頭怒打漁人蓬

觀海

潮頭來遠沙開岸日當斜杯影浮鼉額神錢逐  
浪花天西如有市海上孰爲家遮莫乘風好崑  
崙亦釣槎

讀驛墻詩

青草年年盡黃河信信乾驛墻餘涕淚何日寄  
長安

穀城

出山逢老人入山化黃石千載石人前紛紛拜  
行客

過古薛城

原田莽無際道是孟嘗門秋風荒稗盡烏雀不  
知恩

窈窕歌鍾起參差幸舍開已隨朝市散尚逐曉  
關來

三歸臺

山中先生集卷之二十四  
九  
宮中奏歌舞閣外起樓臺茫茫汶水上車馬至  
今來

叔孫通演禮處

野外脫戎衣干戈化冠履至今思兩生千秋豎  
儒耳

漢高廟

千古猶原廟空山白日寒神旗中夜出誰識漢  
衣冠

毛遂墓

霧散翹材館天高對策墀悠悠天下士何路薦  
毛錐

將游泰山九日在道有感作

予生日  
是重九

日月依辰不自禁深秋節物倍驚心平霾大澤  
生陰霧曲映遙山有茂林生日幾經天壤異壯  
年能共歲時沉如今漸畏登高事搖落風前問  
短簪

城北城南川氣涼岨峽遠接嶧山長日中洗馬  
歸沙市秋半辭林多白楊小摘畏人禁菊蓋短

吟倩客解詩囊菜萸滿地都狼藉故國親知可  
盡觴

登泰山頂時重九後一日

呼吸應知帝座通振衣千仞試雄風長留雨色  
秦皇樹不斷泉聲玉女宮介水遙分洙泗白黃  
河曲抱海潮紅相如擬作東封賦細草千秋輦  
道叢

蒼茫海岱鬱相羅裳上岨嶮青更多大壑晝霾  
藏虎豹中原日落帶山河水迴澗道樹初淨雲

護碑陰封不磨極目可堪吳觀盡側身吟絕四  
愁歌

登泰山日觀觀日

捫星夜半歷虛臺海畔青陽左箇開暘谷先含  
諸界動濤光忽擁衆山來封中雲氣成宮闕檻  
外扶桑落酒杯晴色漸分輕藹後島烟點點辨  
蓬萊

登泰山月觀觀月

瞑入烟蘿萬壑齊月華清切介丘西星芒歷歷



河陰靜烟樹戎戎齊曾低半夜神旗飄鬼火空  
崖海日度天鷄棲遲雲臥侵寒甚爲憶風塵重  
解携

荅岱宗丈人

我有越紉素一日再三洗褰裳過天津見人且  
掩耳京洛正日中美言如可市但恐謀身拙飄  
零愧妻子庶保不緇操歸以示知已

予蓋齟時交周帥敬比歲余至燕而帥敬  
亦在焉驚問其故則帥敬乙酉秋自白下

歸已謝儒而醫矣秋而賓興冬而去之一  
何不粘手也予喜而且悲之作短歌

笑余何事悽此中心頭蘊蒸雙耳聾乍出蹶躓  
迷西東瞥然市上逢壺公壺公與余故相識以  
手撫膺三歎息冷風拍拍吹馬韉欲啼欲笑說  
不得人生老大心易悲且爲置却言當時當時  
意氣光如錐芋眠五色降蛟螭精能百伎縱橫  
馳醉染欲奪山陰碑四方學者爭負笈博士趨  
風下堂揖一朝挽髮不勝簪如覺閑身過四十

丈夫何必饑來驅秋風策足恣所如偶然爲客  
落大都青囊羞澁輕于瓠齋前綉佛倩人供肘  
後丹砂當市沽丹砂可以飽市人走草草誰知  
公者費長房咫尺深居令人老公何不借我竹  
杖從公翔使我久作墻東王

夢回吳山吟

天垂靜耿耿天河直于弦黃鶴如蓋導我前蓮  
船十丈縱橫眠老兔搏霜射瞳子蒼龍挾雨耕  
雲田海塵浩漫漫惟見七十二點空青山衝風

何來吹我冠翛然忽下如驚鳶自餘囂囂復何  
物恍惚似遇城門烟城門烟橫不可識土肪石  
骨參差隔花明百路春溪紅鳥啼一聲大荒白  
白日光依依照耀桃與李綠楊垂條引紫蘿長  
杉當堦掃松子嵐翠虛無入市橋幔亭次第依  
雲壘壘窮橋斷心轉移茫茫平湖名可疑湖前  
陂澤不計畝手葺菜麥兼柔荑晴絲悠揚罨蝴  
蝶跨水種田知是誰黃面主人巾葛巾午溪白  
鹿招佳賓坐中一翁獨吳語豈是當時角里之

先生鞠躬向渠問歸路笑我買山不知名眼前  
劃然心孔開支硯岸嶸紛相迎東窓竹子手所  
種蒿床葭席如有情五千靈笈幸無恙點檢未  
竟書魚爭覓動忽失聲推枕鷄革革夢境不可  
思此身依然在山北吁嗟乎胡爲我身在山北  
元夜先一日觀大內鰲山有述

祈靈太乙報年豐大地光明自九重踏踏寶輪  
浮齒苜沉沉烟海鬪魚龍新宮錦荔如雲出歸  
輦梅花帶雪濃最是未央春夜月栢梁頻自儆

### 宵鍾

#### 游燈市

歌城舞館古燕趙麗春况復今京華厭厭月照  
銅盤蠟薄薄風寒油壁車橋東穿市眼乍醉樓  
上炙管顏如花乞得西宮一叢錦黃昏燈火滿  
人家

三月五日偶步至象所遇杏花因與帥敬  
醉花下賦得四首

草掩閑庭久徒行亦偶然爲貪楊柳色忽到杏

花前珠勒分弓影春衫傍酒船都緣無底興隨  
意遶墻眠

頗解窺墻意探幽得滿枝是桃如淺林避鳥未  
全披紅白相兼笑縱橫強自持燕中花事後三  
日暖歸遲

葢氣通香象花光接苑墻輕霞薄春浪舞雪受  
初暘醉面頻生暈新姿未解粧好將門外柳吹  
入兩三行

久不見李仲吉聞其病詩嘲之

門外車音密懷人獨未來望如春月滿坐到海  
棠開豈以苦吟病浪將花事猜金閨無渴史露  
冷集靈臺

### 湖堤

脉脉春沙淨纖纖暮雨齊吹花還擘柳綠盡短  
長堤

水紋深淺明照見影箇箇風來激微波疊疊催  
人過

若箇樹邊寺幾層沙外山一聲齋後磬容與大

江間

暖入酒暈重風動鞭梢輕馬嘶不盡處春郭柳  
條情

雨過蝌蚪化新蒲出鮮水瀉瀉爲誰來飛飛不  
可止

上水人種魚下水人種黍歌聲一何變好晴或  
好雨

三月上旬過西山

流水枕寺門曲曲臨山趾靡靡楊柳青濯濯草

蒲美遠映城上樓近見橋外寺曝然得初心我  
心乃如是

踈柳逗日光照耀山寺面古松鬱生烟騰入翠  
微亂肅衣儼進趨火迺蝕其半暗燈覆古佛苔  
長石骨爛悲誨不可聞慈昧苦無倦支頤歎斜  
陽隔林坐鳴鶴

寒烟橫不流長林緘月靜山頭青蒙蒙地上白  
耿耿童子築石塲涼花當山茗縱能拾松枝不  
能掃松影

水眼通石渠淵著不可了中有五色鱗深淺欣  
在藻老僧散殘鉢唵呬出周遶悠然入魚趣人  
影落清沼

途窮旅僧寮餘興殊未畢馬渴不可使策杖縱  
橫出倚橋藉深草綠溪造山膝峻涉凌風頭緩  
歸盡日力前林露殘紅有無杏花色

泓停泉一方倚山得清絕石子光鱗鱗水松澹  
相掇泡影噓不停魚游自成節一顧清人心再  
顧清人骨渺然起微瀾流風坐來發

露重幡鈴深朝晞北山止因循引我去若與白  
社邇沙彌攝袂袞袞逢迎雙樹裏排鳥開石扉手  
擷娑羅子逶迤拜長廊指點丹青似坐佛不復  
臥臥佛不復起如聞龍象泣千秋淚如水

灤灤北山奔茲山創其首腹背橫交加餘音尚  
爾陟巖如主事賓累若子負母哈呀不可測中  
有靈物不蒼鷹戛然鳴老兔紛出走扶輿會有  
托秩禮祀培塿

送陳臨陽封 曾藩

執玉諸侯自首藩分符使者出河源星懸大野  
皇華發天入東山曾望尊五月紫泥明驛路孔  
方丹甌待臯門太平補闕須周禮古壁元經好  
細論

送顧涇陽謫倅桂陽

平世似無闕天下稀諫章委蛇橐筆棲明光都  
門赤甌懸虛囊仗下孰者聲琅琅迺是涇里尚  
書郎縱橫指列多慨慷手持唐虞報吾皇烟  
然赤心鬼神直壯氣欲排帝閣黑造次未免南

遷勞聖主用人或不測當時賈誼之逐丁盛隆  
衡桂頗與長沙同痛哭不了治安事羞對野鳥  
言道窮領郡亦是天子賜抗疏敢曰微臣功  
石門啼老猿衡陽叫哀鴻過君耳畔如清風人  
自憐君君不自憐况有令弟鳴君前峩峩簡書  
照後先桐江一絲繫兩難君家得譽亦已偏君  
莫道干將頓挫收光彩天乎愛爾終自在

寄仲醇

人生會有托所托且速朽形影不相附誰使爲

之守朝聞夕可死此理直其有日月不能長生  
理徒苟苟警策慙吾師切靡負良友良友多苦  
辭相知謝忠厚小人其自偷敢以勗其後

吳儂歎

天不弔我吳災運相排拶壬午剷饑民今年肉  
幾脫所苦欲脫不卽脫老翁今秋尚苟活六月  
淫雨至七月天河逗漏地維缺湖翻海嘯聲總  
雜禾頭行舡樹頭歇耕牛橫渡隴畝夷遺穗不  
救蝗蟲飢老翁况有兒與妻剝樹見骨烏烏啼

丁男抱耒坐屋脊有女粗能漚麻績兩日催成  
一疋零持歸斗米咽不得薄糜不及朝來殮漕  
軍租吏聲復喧公私迫迸豈暇苦中夜造次開  
柴門釜沉屋破餘老骨轉向前巷抄鷄豚如聞  
天子慘東顧司農感慨相爲言痛哭已下緩征  
詔惻怛尚有發粟恩當緩故急不可問且向公  
門乞恩賑零落半合鼠餘糧大家除錢頃時盡  
耕男織婦亦人僕飽經荒亂死欲速艱難豈惟  
一身足租債在兒兒在腹



送鄭子瞻歸浙東

莫相疑行路難一片男子腸歷落天地寬怪道  
古人何刺促出門羊腸脫車轆天烏九首搏人  
嘻黃風白浪相逐逐余髮苦已短余肉不足食  
槐耳未成陰何物堪彈射儂自不合離東墻致  
君暗地生青黃君寧不知鄭虔餓鬻書燕市提  
空囊爾家青氈一何貴赤手可搏蛟龍睡大笑  
不足問會有白日麗群飛荆榛復落羽天乎人  
耶總無愧君今去矣乘班騅予亦挂帆從此辭  
吳江水桐江磯浮家泛宅無不之黃雀啄啄飽  
野粟看爾紛騰何所爲

錢郎貌余余對像戲贈錢郎歌

貌天易貌人難容易撚指開春花誰能見此赤  
肉團何物錢王孫操人好醜權意匠慘欲就下  
筆光爛斑於我良有契置我丘壑間頭枕大石  
手竹簡白襴偏袒春風前拋書捫石殊靜便輾  
然一笑解兩顴錢郎何巧我何鈍落落七尺子  
爲政留影天地間長與犬馬並吾將息影山之

陰離朱對面無瞳神

送李仲吉請病東歸

李郎志五嶽竭游黃金臺  
搖筆觸龍額天門粲  
然開棲以蓬臺芸觀之  
參差耀以紫微翠華之  
崔嵬李郎毛穎今不虛  
胡爾顰眉來謂予與其  
坐給侏儒糧毋寧病著  
長卿書眼前金莖不解  
渴子夜吳吟思故廬朝  
來上章暮挂席棗香桐  
落長安陌贏得洞庭橘  
半區剪取吳江作浮宅  
丈夫得志堪棲遲衡門  
之下百不思翻手覆手

任爾天公爲豈不見君家  
鄴侯羸布衣白頭竟  
食王家梨

孟夏游摩訶庵飯于八里庄吟非幻上人  
詩聽無弦上人琴

薄游郭西門沙深馬蹇蹇  
悅此招提靜我轡亦  
載緩蓮篔簹覆鉢平松  
蔭一庭滿婆娑兩沙彌  
盤石恣偏袒不知爾爲  
誰客來亦暇懶

春事闇將盡給孤誰氏園  
幽境澹隱日灌莽欲  
深煙水車激長風花徑  
催暗泉采之作清供亦

復旨且鮮門外正喧動歎息秋蟲偏

楚楚化人居蘿根古于石鳥歸深不聞天影臥  
來迫我有傀儡場乃近衣冠陌騶馬喧晝眠管  
城歎于役羨此幽棲清復恐憎愛格願言息所  
緣居然在廣宅

聽無弦上人琴

何物悄然鳴松風相激盪無所置吾耳但覺神  
颯爽巧囀春鶯歸澗聲乍聞雨峽崩泉響參差  
玉磬金琅璫合沓徐來復小往驚飈吹斷還嘶  
嘶豈其爨下梧桐枝自爲羯鼓亂大雅古琴復  
破爲薪炊如彼穎師豈不能冰炭我腸奚以爲  
是誰五指間幻出迦陵禪空堂颯颯人耶仙問  
之迺是師無弦嗚呼賴爾之無弦

詠非幻上人詩清能沁骨余心賞焉漫賦  
以贈

休公賈餘勇猶敵孟襄陽下語理不厭無言興  
爾長蒼荀參朝靜菩提結夏涼借君清一掬浣  
我非征裳

五月送任心葵歸武昌

爲君劒舞對離樽客路蒼茫易水渾到處藿塲  
堪繫馬何山雨峽不啼猿未容世外思招隱莫  
易人前賦巧言京洛素衣無恙在湘纍角黍至  
今存

訓醇甥讀書

舅自名成崇兒須筆可耕生今不逮母况爾願  
爲兄種德餘千葉遺經正滿羸春鶻爲誰泣立  
盡短長更

宅相看吾子寧慙小魏舒荆花隨歲盡葛藟望  
春踈痛哭東征賦徘徊暮倚閭欒冠吾忍見好  
授鄭玄書

巳丑冬至前七日友人王罔伯李允升母  
舅朱向之姊丈周季良瞻

萬壽宮謁

九陵

崇岡如帶擁平皋沃野神宮駕六鰲天上珠丘  
開曆莢春前玉輅薦荆桃千山象設雲初曙萬  
歲蓬萊日正高聞道昌陵封事少吾皇久矣

賦民勞

九原何地不蒼涼  
弓劍橋山泣  
孝皇警夜燎  
光承委佩當關午  
漏下封章翠旗風  
雨歸華表  
玉几星辰照未央  
千祀泰陵杯土濕  
登臺北望  
想沾裳

走銀山道

寥寂荒山徑漫隨  
黃葉蹤林虛峯影  
亂谷老雪痕  
封落日閑歸牧  
投烟及暮鐘  
到來頻立馬  
鳥道幾重重

宿銀山寺

野宿欣逢酒匡床  
肯借吾僧寮  
共談虎佛供對  
啼鼙月壑懸  
相照風鈴莽  
自呼夜清鐘  
磬發驚我尚  
征途

余舅及季良捷走銀山巔  
度闔王鼻余倦甚再遊耳

岩堯出鳥背  
羨爾獨登先  
樹影黃花鎮  
風聲沙澗泉  
寒山棲睥睨  
落日響弓弦  
老矣燕然石  
憑君早着鞭

銀山歸道

澹日荒平野差池我馬黃暮山看更好空翠遠  
相將寒入鳥棲亂烟含獵火涼傷心松栢地鎮  
夜月蒼蒼

送葵陽座師謝病歸樵李

流澌蹴浪渡淮河草綠南齊擁傳過五夜對懸  
天祿火三秋未老越江策憂時日下占雲漢招  
隱春來到薜蘿端爲盛朝舟楫重憐君不遣試  
風波

五噫歌半雜燕聲筑響波流鴈驚汀雄劔匣中  
難把問蛾眉宫外若爲青瞻天尺五君恩近去  
國三千客夢醒相見無須傷采葛樓頭煙雨對  
人冥

江梅驛舍雪深深歲晏頻驚遠別心岐路飽參  
窮達味燈花青入短長吟黃河凍雨紛相逐冀  
闕流雲莽自沉白首門生供杖履彈冠原不爲  
朝簪

桃李春宮花滿枝獨憐失路媿人師素衣不化

終爲我青簡無言可問誰故國已歸蕉鹿夢新  
知半入海鷗疑伯牙臺上登臨數日落琴清有  
所思

### 大風行

天地快哉氣澹蕩爲長風云何大塊間鬱意聲  
滿空長安鎮月天漠漠十日九日風色惡揚塵  
握堞小作劇轟虓遽爾搖鳩鵲凍鈴急鬪簷亂  
鳴老樹轉撼罌思落褰帷射人疾無影掩面謝  
爾猶相掠不及相鐸不及占蓬蓬自何來南海

北海波相黏白浪襄大陸響沙驟平川射工負  
弩驅而先黑鳥長嗥赤狐拱尋常物類亦爾顛  
相切助聲勢獵獵摩青天帝怒問巫咸寥戾者  
誰子風伯鬻厥首風母歷其齒石尤慣船趨羊  
角爲之使爰有同好相喻張箕舌如許當空揚  
封姨抱樹泣欲訴欲訴不訴風難當翻能暈日  
且珥月拍落霞彩霾精光白衣蒼狗倏忽變金  
支翠旌紛走藏海濱有鳥縮脚立享以鐘鼓愁  
不食敢辭萬里塵請以六月息一風之力猶可

勝如彼草木皆風聲世間萬竅盡號怒攪搜哮  
呷何時平左朱絃右玉琯歌再闕波未偃東山  
破斧何時歸日光瞳瞳風可反

偕友人登顯靈宮閣感故友王亭伯作

直直閣陰午嵯峩通天闕持此一杯酒欲酌千  
門月連臂踏踏呼柰何柰何不盡金叵羅空庭  
故逗霓裳歌老檜舞影凌漣娑當此好景復不  
醉古人月笑今人睡匏瓜正壓虛青簷罨恩宿  
鳥紛相避霜重可彈冠燈涼更炊酒客自留主

人觥籌錯吾手笑予王大何情癡酒前墮淚如  
縷縻柳墻荷幌百回飲有人贈我紅將離依稀  
此月亦此酒醉我之子今爲誰山陽笛聲不暇  
老天涯對面皆新知今夜爲君了癡却破量共  
汝深深酌樂極能生哀哀極復生樂君不見鷄  
喔喔白月悠悠向人落

送范長白東歸余亦後此歸矣

六街燈火柳烟霏紅入東山舊舞衣爲語青城  
歸去鶴弓彎如月背人飛



答表肖海見贈

襟期相許十年前邂逅風光更可憐日暮雪街

迎醉馬雙龍捧出帝京篇

公寓雙塔舍  
中山出詩相示

山頭雲影遠相從藤杖芒鞋得幾峯見說富春

雙易近夢游先到謝公松

富陽有  
謝絳松

答長卿寄作

復看竹裏印雙趺日日涼風生座隅出世且饒  
君作主有親未許佛爲奴山中白石能餐未樹  
下明星得悟無欲向傳燈叅動定年來衣鉢在

吾徒

送李玄山留守中都

匈奴自識李將軍牧馬不收塞山紫漁陽臥鼓  
當北風日高痛飲臨淮市

贈公季與

蒙山跨東海泱泱風尚爾卓彼公王孫居然學  
周禮偶逢話深心慷慨不可已一時自千古暇  
復理姚姒爾才自丹青能不爲世使燦燦錦繡  
腸戢戢稟意旨大雅別有尚采風迨下里我有

寂寞韻閉戶聊自喜斯道苟有興奮藻豈必已  
高臥聽雄辨賴子食吾耳誰與相激揚言有曾  
太史

神物固不測一龍將一蛇龍飛下其髯而猶頓  
泥沙吐珠置路傍行道誰爲嗟蜣螂蛻爾丸念  
彼愜莫耶著書懸國門反爲車馬呵市聲日嘈  
嘈誰理擊筑歌請君晦光彩礪石玉可磨如子  
百不爲息影山之阿猶恨有舌在君其慎揚波  
壽陳太常母嚴夫人

紫薇山色入簾時簪履如雲照玉卮燕子暖迎  
鳩杖舞女貞青共鬢花垂鳴璫半譜容臺樂旨  
酒遙分泰時釐好導板輿來北闕長春遲爾閱  
宮詩

贈阮孺平

子歌我謔頡頏其辭道路縱且橫持此將安之  
余也流言髭爲白况子客燕手猶赤窮途相將  
不相憐酒中意氣真可惜天門閃閃光欲奔照  
爾劍上星辰痕時來致身豈遲暮柰此中夜羈

人冤雷砰電射有時寢息青蠅薨薨老彼叢棘  
會見吾子御風走知余駑馬先後不目前萬事  
且莫道與爾同消步兵酒

酬馮琢菴先生

大雅久墮地彌縫賴曾叟穆穆清廟響含意若  
未剖東海固大風體大或錯糅素質渝玄黃舉  
世相唱偶嗟我負薪子竊歎不出口誰裁齊音  
傲澹與琴瑟友剝盡墨瀋痕恍惚遇蝌蚪曾史  
世爾家詩庭尚敦厚

至言富苞孕肯與文章絕彼哉創籓籬千秋在  
頰舌氣盛神理衰轉手化工拙不有千頃波安  
能制頽決惟君氣宇宏鍾鏞在東設琅然時一  
鳴金石森就列慙予寸莛資幸獲仰磨切嗜好  
豈必同昌歎亦成悅

鄧林徒勞薪豈能勝日力擾擾闖者苦孰若憑  
爾軼以予悶悶心長短深自匿况爾白髮生驚  
波僅餘息讀書不求解夢寐寧復憶君不惜精  
爽耀我雲五色無端被榮名擾我嬾所適終當

便蓬蒿謝子勤羽翼

送李茂實領武誥晉陽以便東歸

星輅五月渡河梁  
負弩先驅出太行  
春色欲青關外柳  
絲綸故遣近臣將  
斜陽催酒莫留殘  
千里相思命駕難  
長夏如年歸未得  
知君頻折藕花看

夏日新霽望西山

夜卜齋鍾韻簷花報  
午晴雨歸雲壑淨  
虹斷暮山明  
脉脉辭團扇  
閒閒出市城  
相看禽語樂起

我故園情

故自西山爽雨餘  
清更饒落雲猶在野  
晴翠欲分橋  
嘉樹曾紆賞  
飛鷗可待招  
兩年羈客夢得此足逍遙

長者兒相視  
少年心若何  
回腸更事老  
對面失歡多  
寺影濃花出林  
開野澗過長安  
有閒日底是久蹉跎

大內蓮花

西山青落影  
娥池仗外芙蓉入  
照時薄雨未消

初日暈晚風欲語向人枝六宮香粉流紅膩三  
殿浮涼湛綠漪的的夜舒人不見集靈臺畔露  
華知  
鬱羅天外壁壇清曾此瓊花散玉京河上卿雲  
猶泛泛水心芝蓋故盈盈月窺粧影鷺鳧並晴  
落紅衣鳩鵲明是處綠蒲堪繫舸君王那得萬  
幾輕

聽太初琴

君有千里心彈作千里曲何來黃山泉飛作指

頭玉

吾欲封谷口獨坐當長松留將明月吹度與萬  
溪風

欲彈再三撫拂子弦上霜我歌梁甫吟與此誰  
短長

渴飲上池水飢食長安糜靜對琴悄然奚以彈  
缺爲

送麗明歸山陰

病骨誰爲支臥對經與史窓前紅葉翻居然念

吾子

酬馮琢菴先生朝爽樓詠

高樓高幾許上與西山齊山上復重山雲光鬱  
淒淒朝氣穆以爽可以一振衣乃有東海公選  
勝同攀躋良朋愜高唱遂欲忘簪圭感君托素  
心傾倒百不疑坐中獨與訥眉日常乍低雅交  
不欲甘心故無町畦廉靜鮮風過吾耳時若提  
談深酒欲寬渴飲日竟西海棠暈悠揚醉面生  
光輝殷勤重言別申重千古規卓哉不朽名烈

士良所期學山或不至恐蹈愚公迷大笑指落  
日頽然進厄匱

周貞女

宇宙至今在其道惟貞觀寧若木與石塊然徒  
頑堅山頭望夫石風雨愁汎瀾陵谷有傾移况  
此愛浪翻卓哉周季姬生死狗所天裂素騰哀  
詞灑血鳴肺肝霜風凜以淒使我骨欲寒乃彼  
抱一心知者或復難往昔餐松人竒節豈不蠲  
惻怛念兩髦辛苦勤三遷葦蘿各有托荼蓼良

自安之子中谷蘭未與春風緣爲誰長青青素  
縞凌華年終我父母命不負三光懸中心仗獨  
是甘苦得自然以御世春秋澹蕩真浮烟余家  
化人跡與爾相後先靜者一念果白日生羽翰  
而子猶塵棲寂寞耽枯禪將天老哲婦扶植人  
倫顛抑以瑞聖世照耀光堯編彤管色有煒汗  
簡青闌班修名豈所求吾自相媿妍

送五母舅武昌督運

江頭赤壁淨軍麾十里樓船臥鼓馳飲馬晝眠

鸚鵡樹掛弓秋老建陵碑舳艫蔽日聯魚麗帆  
羽揚波蘸纛旗北鴈稻梁謀未熟臨風吟斷渭  
陽詩

秋月感懷

瞳矐海室湧波黃溫樹先沾紫禁光浮動乍翻  
楊柳浪霏微轉泛芰荷涼寒星自守三臺露碧  
漢虛搏萬杵霜咫尺瓊池稀宴幸暇將清夢問  
霓裳

追涼結伴上針樓天上人間揔解愁細語堦前

風欲斷新眉  
簾半月相留  
空簷玉馬嘶  
霜露隔水黃  
姑泣女牛  
夜夜笙簧  
歌館沸共誰  
斟酌漢宮秋

烟籠閣院月參差  
坐見槐衙影漸移  
簌簌井梧鳴半夜  
飛飛鳥鵲聚空枝  
淒淒對酒成三友  
自在窺墻得半規  
早晚日歸愁歲暮  
蒹葭猶及未霜時

隴西明月不堪秋  
况復驚烽照戍樓  
原上鬼燐荒燒白  
軍中羌笛陣雲稠  
賀蘭山外虛弓怨  
無

定河邊破鏡愁  
長嘯可能空虜幕  
柳條黃盡古  
甘州

空青萬里露華新  
倚薄松窓憶故人  
玄度不來天共遠  
謝郎獨醉月相親  
蒲荒麥熟孤鷗友  
草白沙明老雁臣  
底是吳牛怯風甚  
不禁團扇改京塵

雲表纖纖耿玉繩  
銀灣無浪斗杓橫  
千門影落山河靜  
九道光分漢陌平  
試卷冰簾占近遠  
已拚蘆酒閱虧盈  
縱教狼藉春江夜  
忍待風吹夕



暈生

水國高秋倍闇然涼風天末想娟娟黃花耐擁  
南樓屐紅樹相看半渚舡白社避巢將客燕平  
林抱葉未歸船那堪子夜烏啼盡荻岸楓城夢  
裡烟

城頭北斗半闌干歸鶴乘風借羽翰清入桂藂  
淮水綠空含橘柚洞庭寒孤輝對濯霜燈苦斜  
照頻催菊酒殘寂寞五湖留影在還餘名字月  
中看

秋日同友人游西山

灌水翳長坂靡靡層陰動細草臥牛羊應作清  
都夢

鐘聲漸杳藹響未交杉松消沉向何際洪洪化  
長風

西山堤上

無窮柳夾堤蒼皇馬相逐風吹席帽軒驚入前  
堤綠

西山望湖亭

水眼虛爲星恍惚若宿海水衣化爲石可見不可采

西山玉泉山石紋如浪

山氣飲湖青日夜水泉長微風蹙波紋倒影石花上

西山涅槃寺

碧潭偃樛枝似守蛟龍宅照見油油天蕉蒲弄華日

西山卓錫泉

循飲此泉側日暝醉忘起流水轉人心人心轉流水

西山碧雲寺池

游魚何唯唯適此一方水一方自首尾遊魚若萬里

寺門

紫籬靜若夜清流澹無言不知山寺到乍見風旛翻

來青軒

遙青草木光空青  
天地冥憑欄三尺外  
與爾共青青

軒前東壁

東望金銀臺  
飄霞若衣帶  
目盡長安城  
心在長安外

軒前月

雲扶月華上  
森沉翠微冷  
霏霏高低林  
月中無靜影

窮雲瞽山頭  
蛇蟪及吾趾  
翠濕不可搏  
身在白

雲裏

環翠亭

徘徊虛亭上  
相憶杏花叢  
但留環翠在  
明日又春紅

祭星臺

空壇落星辰  
騰沙鬱皇野  
不知何王碑  
隔坡問牧者

別香山

相去幾何里  
香山紅寺青  
冥冥月中磬  
况隔晚

雲聽

歸途欲雨而竟晴

人言鷓鴣聲模糊若含雨啼破千林烟來我杖頭舞

秋夜懷仲醇長孺

相與江湖久并忘鷗鷺名自君農臥穩使我客懷輕  
忍草依龍象桐花老弟兄可憐塵滿眼猶爲說無生

落落高秋夜琴尊一草堂緒風搖束楚好鳥坐  
閑桑有客美無度如予河未梁紫芝眉宇在心  
逐泖湖涼

夜尋高隱傳見我韻中詩鶴警欣相得蟲吟盡  
可思別來秋去幾坐久月歸遲長興無多語應  
憐靜者知

月夜坐石經山頭聽泉聲呼季良不卽至  
戲罵之

空山易爲聞落葉如轉石洗泉會流隴莽若潮  
闔射如絲界空青淘我新月自大地盡一聲吾

耳乍爲關萬里爭道鳴何能覘泉脉對之飲且  
嘯雉子亦嗚嗚吾意那可敗祗爲阿戎惜

咏山頭月

招提吐白毫照耀摩尼珠十方若虛空載明西  
一隅樹轉圓不分夜午輪逾孤小星輝輝流三  
五龕燈踈明滅林莽中烟寺相有無遠乃群動  
含近與吾影俱

琉璃橋步月

蜿蜒百尺橋下有千里流灣環闔明月澹澹銀

浦秋漲渦蹙高浪魚龍頽不游呼吸挾風雷石  
勢兀欲浮遠天星可捫廣野烟相樛行人走陸  
陸杯酒誰爲酬吾將欸白虹飲我湖水頭

贈胡畫士出塞渠曾貌余

好向長康乞化工許將丘壑置龍鍾一回畫就  
一回老只恐黃花瘦似儂

緱山先生集卷之二十五

太倉王衡辰玉甫著

男時敏

婿李轍

校

李見羅先生之在難也其弟子止菴羅君  
偕其二三同志僦居長安納橐餽焉余既  
聞而義之迨羅君歸顧我于家連榻再夕  
愛其奧雅于其行以短歌呈別

古人結轍從其師使赴水火亦不辭今人友道



棄如土朝爲弟子暮爲虜咄嗟海客死田橫何  
如馬融帳下逢衣生一朝倉皇散如霧反令俠  
者留其名况今天下盡婦女閃忽人心自風雨  
漸聞室有戈非止市有虎市有虎尚可室戈能  
殺我目中僅見李豫章急難兄弟奔相將側身  
痛哭雷霆傍九關虎豹天蒼蒼朱生已死盧生  
餓獨有盧生下簾坐朝來分得磨鏡錢強半篝  
燈獄中臥丹者寸心白者虹上帝感動精誠通  
差峩豐城雙劍氣紫光晝夜磨崆峒天寧土繡  
萇弘血人自書傳夏侯訣君其先歸掃庭雪文  
未喪天視君舌

送人官塞上

海風如刀沙作雨拔君孟勞爲君舞酒酣不脫  
從事衫擲還骷髏月未午

長孺自燕至作

隔手遙相喚高齋榻已溫話來兼涕笑坐次失  
寒暄雨膩紅蓮沼烟封綠篠門淒淒燕市筑細  
語入黃昏

各敘五年事別來看鬢鬚風塵能頓老山澤未  
爲癯心狎耕漁漸夢尋悲喜無燈前憐瘦影珍  
重說征途

送李長卿遊北州

石門風雨大刀環夜入金城虜氣寒一道墨花  
飛盾鼻軍前萬舞拜呼韓

白草黃河漲落暉馬頭三月碎霜飛投觚四十  
未爲老醉脫青衫試鐵衣

凍月蒼蒼雨雪零前軍已掩幕南庭五更帳內

猶歌舞狄道烟消鳥鼠青

律律西風隴樹秋佩刀刺石取封侯平生知我  
龍泉在十萬軍麾擁蒯緱

翻車鍛矢驟胡風草木千山助火攻萬里燒荒  
空罽帳甘泉猶憶隴西烽

落日煥蠡烏尾訛將軍闔外立雕戈忍將無定  
河邊骨鬼哭長城博凱歌

夜占河鼓彗挽槍赤白飛馳報破羌虜粟不風  
鈴柝靜滿樓清嘯月如霜



材官突騎百爲群解取涼州獨有君戲下請纓  
來五部臥彪爭識李將軍

送孫見田任儀封

綰綬誰年少當時陸浚儀政閑更雀靜春到驛  
梅知別思知秦洧遙心託具茨况聞潁水上故  
有鳳凰枝

和殷無美感懷

比覺歲時易轉于魚鳥親可憐爲客老何似有  
官貧東閣梅如我西風鴈欲賓聊將試舟楫話

與未歸人

隴水風磨劒金城雪叩弦書生懷主辱立馬贈  
君鞭荒燒餘千里螟蠶尚兩川左賢曾否遁忍  
問太湖田

軍書若鞅掌轉憶習家池何地無風雨登壇亦  
鼓旗夢酣楊柳月酒醒杏花時樽俎功名在春  
光幸可私

送友人之蜀

思君何日下三巴錦水春風不念家遮莫劒南

楊柳盡一枝煩寄刺桐花

孫烈婦

生當共舖糜死復共誰之不改糟糠腸與吾死者知

郎不爲儂死儂自爲郎死芙蓉爲誰枯髮鬢滴秋水

三年綉羅衾鴛鴦未成眼魂魄倘有知留與妾舒卷

妾許黃泉誓難使茲言負鬼唱白頭吟待妾亦

已久

漆燈青熒熒土花碧萋萋夜臺日月沉兩髦去何其

東歸至通州別季良

惻惻出東郭悠悠臨遠道吸吸風舉衣澁澁沙覆草豈無親知觴可緩憂心擣征馬躑躅嘶對此慘不飽欲別再三顧腸結語言少與子皆壯年荏苒忽半老况我白髮親愁疾切自保聚散紛不常忽若雲舒卷豈不見故壑出岫夫

已遠曖曖空中暉柰此獨行蹇竭將百口歸誰  
與暖老眼賴子相將護彼此聊自遣乍爲伐寒  
暄久當習洗腆願言共携手松竹幸未剪  
初走燕趙郊騰塵闔余睫幸我骨肉諧漸且囂  
臭帖明發出都門忽與惡况接沙磧紛回薄昏  
風晝相攝驛古鴉巢空渾流歎徒涉差池帆影  
東衡宇返故業東南亦得朋但恨無子轍矜茲  
于役人誰不苦切切

靡靡客行邁憂緒錯如織乍經離別悲彌覺兄  
弟力余姊健婦人將事勝余百執爨或執羈分  
任豈不適一朝化陳人視子情倍戚雖獲同肺  
腸尚苦薄羽翼風雨原花青靈其駐魂魄鬼猶  
顧急難吾言詎容食

東歸別諸友

二月楊柳毳莽莽沙相蒙造次褰車帷遇我意  
所同持盃候道傍欲緩驪車東人生易偶合豈  
此樽酒窮慷慨別君去瀟灑從歸鴻日暮烟迷  
離點點江水空解衫倚風檻撩索推雨蓬乃知

黃河水不如杯酒濃行矣勿復道歸歎樂吳儂  
守風

久厭京塵惡塵途故許長風吹榆莢老沙罨柳  
稊黃沓浪襄官渡連雲落大荒臨淄剛一水何  
事日相望

途次雜詠

中夜雨汨汨朝宿草頭鮮女兒學鶯雛試上桑  
樹顛

四顧沙漫漫維舟青草步月出聞鷄鳴人家在

深樹

朝來楊柳青楊柳始破眼早不照別離空將樹  
枝撚

磧歷瘦馬行空原餓鴟叫寥寥壯夫心悠悠往  
來道

感懷

簪筆虛丹甌趨朝沒紫宸官猶慚退食吾感易  
呈身桃李無成徑菁莪漸可薪忍令明盛世東  
海有波臣

層雲迷鴈渡暗雨入船聲愁夢不可贈人言虛  
自驚獨行常問路欲隱恨無名端爲文章悞予  
今老未畊  
非無長者客相與古人期嬾未衣冠狎名將造  
化疑桑麻兄弟在鴻鴈稻梁私吾道貧如此思  
君詎可詒  
不記遠遊歲但驚梅柳踈春陽行暮矣吾黨賦  
歸歟久已恬羅雀何當復羨魚由來北闕夢祇  
爲古人書

九宇衣裳治千闕草木兵罪言聊自語任隱爲  
人榮飲啄皆君父行藏畏友生老農藜藿在忍  
道主憂輕

南旺

東西流水界平沙半憶長安半念家綠盡槐南  
渾不覺藥欄紅老石榴花

過留侯祠

祖龍布毒燄六社墟爲烟手操報秦椎乃此弱  
少季一擊不中去東海黃金散盡舌尚存而今

悔盡少年心行授嶧陽老子兵終扶赤帝噓炎  
精以漢報韓心自盟杯底龍蛇楚漢剖箸前縱  
橫六國走功成持我黃石書以問赤松當是否  
赤松黃石不可知豈其同茹商山芝未央鍾室  
烹壯士公方雲臥留之湄生前不戀侯萬戶身  
後寧貪一坏土神仙不死俠骨香月冷波清自  
今古

漂母祠

寂寞王孫路名由一飯揚悠悠男子足未省報

恩場

憶昔

五年去冉冉聚散此邗溝半非別離侶翻甚別  
離愁

戲成

南兒使快船北兒使快馬誰累千日糧窮彼四  
天下

寄家信

旦暮郵筒便北來音尚踈愁多滋畏卜語盡強

裁書醉自逢人足花猶此月餘寄聲天上客松  
竹故吾廬

瀘水鄒座師以詩寵別賦此寄荅

丈夫寥落心所重同風期古人千秋契亦以一  
日知鄙也挾策來賓筵厠威儀郁郁桃李花寧  
與春風私所幸侍君子莘蒿樂吾饑君子冰玉  
心古道勤自持顧獨鑒愚鈍結交衷不疑相與  
共臭味至或分毀譏聚散夫何常忽忽與君辭  
歎息吾道東欲贈無將離流言任丹青兩心要

不移人生若雲流動且經年睽不慮改毛髮但  
留施目眉殷勤服矩誨行藏倍驅馳願言愛玉  
體時哉勗光輝

雨中過陳仲醇遂將之至舟中話兩日夜  
各賦志喜

五年長安共醒醉素衣飽着長安膩疑將面目  
見故人猶喜故人不吾避羨子歷陸黃鬚青而  
我兩眼俱添紋不如意事將訴君與君拍手談  
如雲爾目不閱公車牘爾自不領大庖肉微吟

痛飲得自然心中無事妨耕讀君不見國門有  
棘不可斯維雉有羅鴻羅之少年行且其伏雌  
苦哀老子何能爲熟與君家共餽糜如何對酒  
能不思但念人生孰朝暮往日吾曹半非故山  
陽不盡笛中愁散作蒿丘草頭露何不瞥從陳  
先生春月春波樂鷗鷺今雨續舊雨烟波浩茫  
茫推篷看北斗宛在湖中央蟬連緩語將子去  
扁舟隨意高雲涼弟兄會合良有數巴山話雨  
莫相忘

雨舟中同仲立仲醇話舊兼讀二子詩湯

賦

敢疑肝膽變茲事有將無誰分人司馬其爲鬼  
董狐惜誓松筠老追歡歲月徂較量醒醉裏端  
不負吾徒

泛月園池同長孺仲醇作

盤槐下夕陽樹影照中黃片月含羣動虛舟觸  
晚涼烟踈浮竹翠水靜汎荷香三更如雨露猶  
喜未爲霜



宛轉芙蓉月溶溶  
傍我移遊魚擁虛沫  
烏鵲選深枝  
波影蕩舟白  
星輝入戶疑相持  
一樽酒明日夜何其

喜長孺仲醇至

東歸游子月當蠶  
思入涼風更不堪  
人在各天心自遠  
燈青深夜話初酣  
芙蓉池上秋千頃  
竹篠齋頭雨一龕  
轉憶長安蕭瑟甚  
幾回搔首賦江南

仲醇病起

依然松火半扉紅  
何似維摩丈室空  
渴有五更垂葉露  
涼當七月入林風  
豈無榻夢留知己  
故遣詩魔病乃公  
好自茂陵消息在  
五茸秋雨露濛濛

秋水同仲醇賦

江介紅蘭亞水枝  
江流浩渺正堪悲  
霜風半白蒹葭浦  
日月雙含雁鷺池  
牛渚飛星翻浪夜  
瀟湘微雨上潮時  
戎戎浦嶼漁村外  
何地扁舟不可期

河影高懸天井東，微波瑟瑟洞庭風。  
烟橫雙鳥寒塘外，雨亂千帆秋色中。  
八月濤聲催落木，五湖霜氣醉青楓。  
夕陽無際滄江遠，極目蒼茫一暮鴻。

秋聲同仲醇賦

夜靜空齋露氣清，蕭然天地一秋聲。  
蘆花簌簌鴈初至，榕葉蘇蘇蟬亂鳴。  
迢遞雙砧懸朔漢，參差片笛滿江城。  
年來意漸關搖落，風雨重陽白髮生。

高城河漢萬家秋，蕭蕭風送百草頭。  
忽驟花鈴驚鳥雀，自敲玉馬雜箜篌。  
雨收衆籟歸虛壑，月引涼颼度遠樓。  
正是停闌無賴甚，滿堂蟋蟀使人愁。

碩寬堂詩爲黃葵陽座師賦

彼美碧山下，悠然天一方。  
春風來燕燕，夜月問烏烏。  
草閣殘書擁，花塲半俸租。  
秋園蝴蝶老，夢覺始爲吾。

少有足高隱，偶然成臥游。  
少年勞貝錦，老我已

菟裘灌木城陰暮芙蓉塘上秋浮雲闌檻外別  
是一重愁

豈無憂國淚瀟灑到漁樵局外看誰是壺中且  
自驕菊青吳市酒楓暗浙江潮初狎沙鷗伴安  
車未許招

自嘆

不關行路客苦費篋中書人競營巢窟吾能保  
蠹魚燈明黃葉裏月照白頭初天地如窮我衡  
門尚有餘

懷仲醇

一片芙蓉水剛容二子舟意中人遠近明月夜  
窓頭

計偕別長孺仲醇

結旆蕭蕭事遠遊沙湖潮上荻花秋征帆日落  
長江外送客鍾聞野渡頭一夜弟兄吳市酒幾  
回風雪剡溪舟緇塵古道渾如許珍重初衣問  
白鷗

臨岐立馬太逡巡共折梅花贈早春未必文章

能重我不甘，嘖笑強供人。蒼蒼雪凍關河月，薄  
薄霜棲野戍塵。海上暮雲曾入夢，秋風非是憶  
江尊。

烏啼城樹夜中央，別客如雲意短長。去去未知  
吾道是勞勞，已覺此生忙。苦寒月似長安白，破  
臘花開故國香。但有兩生相勞慰，肯從風雨問  
行藏。

游虎丘有待不至

昔日讀書處，蘿關封至今。法丞山風雨，變半塢竹

茶深新沐澗，中影閒行石。上心無人解，相語漠  
漠釣磯陰。

別親友

遠道偶然發，賓朋已在門。將誰共裘馬，代我治  
琴樽。爲道非貧仕，憂時敢罪言。杯前畏途始，語  
盡此黃昏。

丹陽走陸道

固自別非遠，易令老者傷。月今帆上白，雪又馬  
頭黃。苦竹漁樵市，枯蘆鳧鴈塘。人生歎于役，僕

僕過丹陽

陂陀岸容改造次客裝單隔浦看檣樹披裘試  
馬鞍苦霧年年白重雲習習寒記君臘酒熟吾  
亦醉邯鄲

魯酒不成醉旅更聽乍長首途逢雨雪中夜攬  
衣裳人語車鈴動鼠啼燈火黃郵程纔足下吾  
意已茫茫

濠上

灑然古人心落落山水餘濠水不可梁徘徊濠

上魚

彭城

百里流澌擁雪來亂山千點對啣杯村中醉擊  
枌榆鼓寂寂花飛戲馬臺

關橋

拂拭頭上霜深林不辭罰聊與關橋人共此關  
橋月

嶧山

海外來浮石空中自累丸桐霜清古寺杏雨繡

深壇曾望暮烟直秦封白日寒愁看茅店火隱  
隱近征鞍

樹頭霜花

片野雪初白千林風乍微鬢鬆踈舊竹颯沓寄  
征衣草木開天地春秋占是非廣州三月路記  
得柳依依

寓極樂寺

灣灣綠水帶城陰白日青蓮雙樹林萬疊雲山  
千里夢六時鐘磬五更心寒燈貝葉翻香蠹春

日簷花坐語禽隨意竹床葵菜好經簾不捲畫  
堂深

寓甕山

山圍平楚樹周遭迢遞河丘界遠臯蹴蹴春冰  
浮草色茫茫日暮起松濤烟明碧瓦幡花落野  
簇紅雲睥睨高十載空悲在朝市一泓湖水湛  
征袍

游普通庵

陰岑結巖扉蘿關掩深築愛此森沉光餘清散

踈竹石裂瀦回潭潭流自成曲亂石縱橫梁時  
倚老樹腹冰乳鳴鏗寒鱗互驚蹙谷外天茫  
茫稀微寺烟綠有酒不盈樽清風坐來穆空谷  
何自聲正與吾耳逐溪頭浣花兒其上喧採牧  
和蒼良有以何必豕與鹿心將廣視閑境以幽  
賞獨今游非昔游吾生詎爲足

夜踏青龍橋

散步逐流月月流溪滿門薄暈生纖妍中天澹  
孤痕殷殷犬聲裡往往見墟村夜氣清微鍾烟

華簪陵屯轉歷燈火盡平橋坐言言忽見招搖  
星澹蕩落酒樽今夜一何遽嘆息休山樊

十三日夜步月至妙應寺登毘盧閣

憶昨風花天何意得今夕有月且復醉暇計今  
與昔相將涉虛臺游氛四垂闕市里渺浮浮湖  
山靜歷歷亦有松檜枝團影蕩石壁如彼河漢  
間踈雲淡相織童子初試燈試燈受華色辰物  
洵明茂膏火若爲力歸掩丈室關宛此一庭白  
獨坐光悄然樹末風策策

再游望湖亭

精籃絢殊采過之若有亡循坐湖上亭欲去神  
徬徨以彼一掬水而具虛空量埃風暗如霧受  
之甘且涼山氛鼓澤腹施施風旗揚鱸魚負水  
洑豈必河之魴去此一春秋照我鬚髮黃影影  
不可停喟然歌滄浪

百花朝詩

階前樹色感朝陽養得新條婀娜長但願風光  
似今日逐回花煖少年場

晴烟膏露若爲容躑躅香苞望曉紅莫怨五更  
風色惡開花原是落花風

漸次春深笋甲肥輕調涼煖護紅衣君看城外  
蘇蘇柳禁得楊花待汝飛

溶漾天絲弱不禁等閑飛縮百花心輕紅輕素  
渾無主寂寂春堤又綠沉

欲艷嬌陽不自持江南未肯報春遲兒郎莫負  
桃花呪快馬看花十二時

鶯鶯燕燕爲誰來語入深庭百尺臺日暮鞦韆



風蕩影隔墻桃杏一時開

弇園春曉

稀稠紅翠百花陰黃鳥朝喧日滿林  
疊疊春山遮不盡斷腸桃李隔橋深

淮雲雪霽

古寺垂垂閣凍雲月痕如水雪痕分  
朝來松色青於洗留得梅花尚似君

太湖

蕭然吾意在滄浪亂水如天不可量  
千片曉灘

千片月蘆花白似夜來霜

石湖

四面平湖生晚烟山頭草色避雲鮮  
竹堂寺裏逢僧話竹老如人莫問年

桃花塢

窈窕春深漲紅雨窮溪自得桃花塢  
塢中女郎嬌浣花頭上花飛鷓鴣舞

臯橋看花贈花主人

憇此嘉樹下謁將花主人主人白鬚  
麋策杖延

嘉賓引之面場坐繞圃一再巡紛濃靜沃沃葱  
楚青蓊蓊蒔蒔荷有道膏雨相依因頃畝無術  
阡種植手可均晨風輓轡響流水畦自勻春花  
宛容與秋實垂輪困剖甘飽孩孫餘可施比隣  
剪韭炊黃梁櫨杞羹紫芹家貧百不有未敢言  
花貧

井上呂城阻壩別親

蘇蘇寒雨滴平川共話行期笑屢遷宿草故含  
河畔色新炊半見客中烟隔江鴻雁如兄弟明

月天涯是去年匹馬夕陽緣底事梅花零落野  
塘邊

落日飢鷗下練塘回回見此欲沾裳朝來客作  
三山夢喚破鷄鳴萬里裝馬上裊袍先試雪日  
中茅店尚含霜擬將意氣輕飄泊腸斷江南柳  
色黃

楓林紅葉已堪悲况復楓殘葉落時澹澹曉星  
踈遠步漫漫野火入空枝溪流捲雪歸江急海  
日催春度柳遲爲客但拚兒女醉深房臘酒更

貽誰

登大觀樓

長江東繞甕城流  
北走濤聲入郡樓  
暮雨出山沙影現  
落潮歸海浪痕留  
愁看夕鳥投遙岸  
曾此戈船擁上游  
無限壯心銷欲盡  
一年頭白兩瓜洲

官驛

故人書問渡江無  
寂寞官齋據槁梧  
千里濕雲遮去馬  
一庭青霰對啼烏  
譙城夜柝寒猶禁  
漁

市朝喧凍可蘇臘  
後淮徐新草色好  
將吾夢入菰蒲

由峴山涉九華山頂初欲建寺

漸看飛鳥近回馬  
峴峯灣積氣遠成市  
曲江皆面山天平  
落日曠風起亂雲班  
相彼高原盡禪那  
好置關

雨中渡江

見此茫茫黯欲愁  
一天涼雨更如秋  
水流南非分官渡  
山影浮沉亂客舟  
瓜步夜潮風滿樹  
蘭

陵燈火月當樓獨吟澤畔來時路濕盡江籬未  
肯休

渡黃河

客思如流急河聲帶雨渾滔滔今古恨淡淡夕  
陽痕壯甚呂梁水高于雲夢村孤舟去飄忽倚  
棹寂無言

喜見春帆色遙遙落下邳山清風定後日照浪  
高時伐鼓空堤動行人細柳遲乾坤河廣在浩  
蕩渡何其

渡易水歌

易水春激激白沙鬱相濛我馬蹶踟慘不進腰  
間劔吼雙雌雄憶昔荆卿從此去送客如烟不  
回顧大風立浪吹向人人面稜稜髮爲怒當時  
漸離擊筑聲正悲燕丹跪捧金屈卮手提將軍  
鬪屨去血飲七首紅絲絲可憐秦庭浪一擲探  
鉛更笑盲公癡市中酒徒但醉死枉我歌泣空  
相持艱難壯士兩得意性命真可鴻毛遺今人  
報恩輕一飯千金然諾等閑論面前嘖笑摠不

真對面青黃復何恨世平俠氣都耗磨里中童子唾荆軻如聞鬼泣易水上珍重教公莫渡河

懷古

東朝開明堂郡牧紛走趨力士提沸鼎烹乃阿大夫衆口噴如流瞪目不敢吁卽墨負謗篋金璽耀路衢伯王用威福寧復循區區弓膠附昔幹豈必合罅踈失時不足貴智者笑淳于阿過東廣川治春秋三月不窺園讀書味其醇雅志非飽溫抱策對公車天子爲臨軒赫然賜第一齊

風變沄沄際合豈不竒終枉膠東藩弟子笑其愚減死爲囚髡腹背不相喻咳唾寧餘恩樸學縱逢時于世難久尊况復千載下嚶嚶誦遺言

過平原

遺書始出壁漢代重明經安車而蒲輪枉聘里先生一代稟章句帝耳知姓名齊詩襲毛公匡鼎猶遺稱憶昔稷下士談天恣縱橫爲膏自離咎玉石同灰坑賤極反徵貴視此道傍瑩安知璞中玉不爲璜與珩毛生墓

蠹蠹壯士髮黯黯賓朋淚瀟瀟北風起易水從此逝一去不復還去將復焉冀決策寸七首笑國若兒戲當其和歌時意氣太橫厲士窮迫知已崖然表其異帷帳羅美人無乃中貪餌一旦被驅使臨窅不得避亦知成事艱生死殉所爲知已良獨難受知洵不易

渡易水

### 送喜恒齋歸

問君何事苦思歸是處兒童競挽衣昨夜杏花新着雨藥欄點點竹孫肥

### 春日山游訪重光不遇

谷轉溪彌靜寂寂太古顏微陽下林木片陰含  
遠山野寺類墟舍獨掩禪那關不見山阿人細  
草春窓班凝塵湛未掃隱几心孔閑如聞蘇門  
嘯杳藹樵牧間手把青松枝沉吟不能還

我友黃叔度汪洋若秋水三子相唱喁德隣空  
伊邇耕耦亦自佳述作况有以樂饑何洋洋敷  
詞自疊疊好鳥相索求嬰鳴得其侶翳被幽谷  
中實托惟喬始爰居來東郊飛翔失爰止對此

鍾鼓懸嘆息以管累得失各有齊誰能洞玄理  
秋夜感懷

三十知非早欣從馬少游還虞欵段馬時觸貴  
人騶燕市五湖客薊門一葉秋相看酒徒盡無  
地擲吳鉤

蟋蟀破殘夢驚蟬搖午陰漸知游者趣不似坐  
來深苦樂妻孥面行藏書卷心又生憂國恨且  
理竹中琴

送許太初游薊門赴李大將軍約

冀門東風春草蘼轅門森張龍虎游門外稽首  
名王酋黃羊野馬紛肉流窮廬毳幕相望稠軍  
府饗士鬻肥牛賭勒部伍譏防周河魁三百賁  
獲儔就中健者李小侯侯家父兄盡貂獬讓汝  
走馬開強彊前年寧州昨高麗赤手血搏生骷  
髏襴襦經年綉浴鐵歸朝未脫銀兜鍪論功匆  
匆若不暇且領百騎當臺頭臺頭哨騎臥沙地  
軍中蹴鞠春塲戲隴西將軍射虎歸長安故人  
抱琴至投人十指流泉鳴肘後杏田那用耕橐

鞦韆空懸紈袴賤傲骨敢與公侯爭帳前歌舞雜  
胡語酒後鼓缶猶秦聲千峰無烟夜柝靜簷花  
細雨壚頭情

春暮偕劉博士沈吏部王舍人飯韋公莊  
一路碧萋萋遊人宛轉迷城當片野直風定梵  
音齊紅藥春分圃青蔬雨到畦江南真在眼頭  
上子規啼

分得公餘日壺觴選勝施薄來嘉樹下坐指碧  
雲滋吏散竹深處馬嘶花落時城陰搖暮柳心

感隔年期

觀柰花

翠葢葳蕤結香苞裊娜懸霞含穠李艷露濯海  
棠鮮入眼花三五停車酒十千蒲萄如可架錦  
袖曉風前

歸飯摩訶庵贈無弦非幻二上人

客到驚僧定始知堦草深遠山清晝榻空塔下  
層陰坐對無言塵床橫自語琴勸君聊此住門  
外正車音



蘿長看成幄吾來信有年花前當茗客鍾後乞  
齋緣風雨芭蕉紙晨昏栢子禪幽居殊自好意  
老倦游邊

送殷無美南還

北門雪苦風馮馮黃河逆流催斷冰余將放棹  
闔閭城君亦南遷歸秣陵秣陵葱葱鬱紅霧十  
里荷花萬家樹花沾六代樓臺雲樹隱八公鷄  
犬路君行正直揚子湖月明夜半秦淮渡臨風  
且聽莫愁歌南還莫擬長沙賦憶昔火照甘泉

紅軍書絡繹煩乃公手磨盾鼻奏方畧西海雨  
散單于空臣功不足論息壤盟在彼臣罪伊何  
哉狂則何所徙模糊對簿井中語季孟之間待  
吾子天下自貴健少年嗚呼世事皆如此白雲  
滿舍啼鳥頻君今始識爲官貧窓前海色淨如  
洗夢裡長安車馬塵

送瀛嶼兄歸陽羨

纔道還家好君家更可思雨青垂釣石涼入弄  
鶯池脉脉燕無語迢迢山若眉殷勤贈芍藥只

是恨將離

送表見陽先生歸水竹居

五月槐耳長繫馬郎官門槐花綠可染鬢然思  
故園故園秋風捲飛藿池水深深竹葉落寒霜  
曉繡芙蓉痕虛堂夜走蛟龍籜浮紅蟻面汎株  
梗清淺漁梁帶郭素雙螯斗酒百不無手把黃  
花招酒徒藏闔賭韻燭未午更與袒跣爭梟盧  
簷頭聊蕭戛寒玉片月正墮琉璃壺桐江男子  
負釣出長安舍人當關呼登高浮雲忽東去使

我頓憶尊與鱸夕陽一片葭莖外小艇已過桃  
花湖去住真無心君子久于役兒能讀父書父  
難對兒客渭陰數畝秋雨肥比子素封貧亦得  
平生嶽崎歷落心君其問諸江水濱錢塘潮來  
客欲渡只恐此君能笑人

送馮宗伯給假歸省

倦客思歸沐君恩時與寧依然問寢夜彷彿  
直廬星松菊元吾里冠簪儼在廷平生看事業  
拂拭舊傳經

不測深宮稟還如前席時賜金高馬耳擁傳入  
臨淄黼屨羹墻近松筠雨露私在公雖夙退家  
食敢逶迤

城門車馬客太息大夫賢獨出相如淚徬徨古  
道邊海浮無棣白月到穆陵弦望望東歸路君  
歸在鴈前

春日同叔達元任季良之西山觀杏花

細雨過郊原沙汀麥隴喧風絲蕩湖白日氣入  
花渾乍煖燕兒壘先迷蛺蝶園醉餘爭樹捷更

問夜沽村

香塵元不染松竹蔭餘清流水桃花飯空溝木  
葉聲杖底調魚熟松間坐鼠輕禪棲如可借頭  
白耐逢迎

游盤山

塞北山河百二重太行雲氣入提封泉爭亂壑  
時縈馬谷响虛巖半是松紫邏烟花當九月青  
天雷雨入雙龍朝來杖策中盤寺指點經行第  
幾峯

孤筇短笠乍低昂翠壁丹楓引興長片石倒懸  
流水路斷崖剛掩薜蘿房諸天影裏沉西界斜  
月林中見上方繞盡寒空不知路冥冥鍾磬遠  
相將

本將丘壑問山僧一望蒼然壯志增日落三河  
烟瑟瑟秋高萬堞氣峻峻參差遠磧遮雲斷縹  
渺孤鴻出塞層長老自看無戰伐漁陽棗栗廿  
年登

樵徑蒼封不厭幽隔溪鳴鳥若相求盤中天地

透迤見石上風雲慘澹留紅葉亂流如谷轉碧  
峯如浪抱林稠采山釣水真堪老辛苦驅車入

薊州

夜窓聞鴈

竹樹紛紛落燈清鴈過時亂群高不下孤影去  
如疑紅葉無消息蘆花記別離風中空結陣陣  
斷不禁吹

放歌

月朔開明堂頒瑞朝諸侯諸侯各有貢南金竹

箭珊瑚鈎天子臨軒賜顏色片語朝入暮見收  
白日緋桃映簪笏青天紫燕驕驕驪就中衆推  
廣川子十年閉戶窮春秋袖中有策天人三片  
語可奪鄒生談走馬銅龍歛不下梅花未落歸  
江南耳聞往者求士急賢者巖居畏徵辟爲囚  
爲虜寧暇論塲藿塲苗未云恤人心不同此道  
古三尺兒童賤草土肅肅群飛急暮燈翩翩落  
羽投一弩自來筆硯搥不靈天下衣冠本無主  
誰或尼者臧倉乎我則無心爾何苦造化酷忌  
人肯使心意足莫以玉笑石石亦不碌碌生兒  
狔犢還所如頭白文章笑刺促君不見叔敖之  
子行負薪優孟抵掌哀其貧又不見張公子休  
休裘馬新豐市人生百無不可爲但莫少年輕  
授書父書如山不可讀讀竟以此將焉如容足  
乾坤半無地曾連蹈海不足異只今海水平于  
杯如淫風雨人間世

醉歌

燈清月白河倒懸東風吹綠醕丘天我將拔劍

砍地出酒泉以之洗耳高歌眠直須小臥三千  
年牀頭闔蟻穰穰然徐看堯桀是非定撫掌一  
笑開心顏心顏鬱不開明日失今日夢中蝴蝶  
黃霜後柘枝白顧此喟然梁甫吟出門語暗瞿  
塘深亦有兔置施中林果否公侯求腹心黃口  
從大爵嗷嗷困蓬葆乳鳩化爲鷹肉食贖常飽  
人飽人饑人自知我枯我苑非我爲英雄有恨  
天亦老行與杜康斟酌之壁間詩書不足守次  
第將之貫美酒意氣難排兩頰紅客來沃以醇

五斗

棄婦歎

終風夜吼天倉皇蟲啼葉落朝雨霜匆匆遣妾  
出門走一步一回空斷腸始知恩愛不可倚宛  
轉君前脫雙珥君心婉戀妾自知道路或將他  
意擬可憐薜蘿春路青可憐桃李春風死欲去  
復還前致辭生死一言君聽之門前柳葉暗兩  
兩鳥作窠鳥無窠尚可楊柳枯柰何朱門公子  
好身手大堤女兒顏色都伊優樽席百事有君

其幸保千金軀主人漸應識辛苦牛芻馬粟今  
有無纂纂棗實身所種慎勿造次移根株眼前  
痛哭尚如此去後豈惜言區區女蘿枯槁絲未  
斷傾心君掌妾自愚出門沙浩浩躑躅當路岐  
道逢饑寒兒自名爲伯竒履霜以足非所辭事  
父無狀兒當笞顧我復我終父慈感此愴然雙  
淚迸人前未忍言薄命閤挑錦字不成梭背燈  
自拂芙蓉鏡鏡面照妾背照君照君不見心紛  
紜天上明星地上看不信生無見君面

出都門五首

一葉輕辭樹飄零尚畏風世情如燭轉市語故  
雷同去去雉膏薄勞勞魚網空君看車馬客貴  
盛且難工

自有花成市其如棘作圍我行非好遯天道或  
遲歸僕馬欺書卷兒童問褐衣翩翩少年社老  
忽羨輕肥

何期逢掖子出處遮關人雖際詩書厄欣無井  
臼貧蛾眉能自舊鳩眼若爲新意外寬羅網君

應念老臣

言念無衣賦誰居有道名是非分半載月旦未  
全輕苦辨人前失初心夢裏清云何如砥道寵  
亦使予驚

人我欣相避徒行亦自前漸知爲客易何以受  
君憐野氣籠天白江聲駕雨傳馳驅不可說脉  
脉杏花邊

雨中徐州道

鄉山看的眼愁向暮山生驛舍清明雨人烟芒

碭城花冥流水靜雲起大河平一路茫茫白歸  
心亂旅程

浩蕩雨成澤溟濛雲是山沿湖草自綠如我鬢  
初斑匹馬花間沒空潮月上還逢人皆道路幾  
得此生閑

理頭見白髮

自循頭上白未合此年中縱得千回老能堪幾  
信風春將隨髮化愁返盼途窮旦旦催明發憐  
花倍晚紅



途中連夢亡友

稿

以君明靈質神理綿若存况余款款心生死義  
所敦生猶隔千里死冥一息魂魂絲弱悠悠何  
由識遠路白袷青絲鞭恍惚寺前遇領巾掩半  
面顏色慘如霧抱子哭不休莫以藥石誤心知  
陳死人猶驚瘦何故寂寞不我酬手指庭前樹  
呀然枕席聲淡月黯照戶開門風湯湯草上不  
棲露

緱山先生集卷之二十五

緱山先生集卷之二十六

太倉王衡辰玉甫著

男時敏

婿李轍

校

家君出都門

梁鴻辭漢日得似二疏時宮闕浮雲亂山川落  
照移江清行靡靡駟牡去遲遲不分宸居秘還  
令野老知

揮手垂楊下迴腸禁柳前長安無限意祖道復



聞蟬一篋琴書色三山杖履緣江湖餘病骨勝  
得滿朝憐

生死辭天去廻尋遇合初契深忘語數寵過覺  
交踈補闕諸君在孤恩一字餘相期各努力慎  
莫老臣知

紫詔恩慈亟朱提寵賜繁艱難犬馬報珍重子  
孫看竹色清踈簞桐陰展素統舉頭高厚在忍  
道五湖寬

我自休官好輸他去國名耕漁原相業雨雪舊

王程焚草留心事看花閱世情十年京闕下老  
瘦不須驚

世事違心甚鄉關入夢非何期投老日許傍逐  
臣歸運際宮鄰泰時清袞闕稀乞將滄海日長

護薜蘿衣

時有被謫南歸者

萬里驅馳意三朝獻納身相憐舊皮骨忍使盡  
風塵薄命偏驚寵明君自擇臣願將衰老意前  
席少年人

母子天涯命寒暄道路時絲綸關物意天地亦

臣私青草迷深驛慈烏乳舊枝年年北堂上綵  
服對君披

歸計扶親得醫方取次將未求田舍穩先理菊  
畦荒老去經營簡官深俸積涼今年麻麥稔吾  
道足行藏

辛苦遺終日汎瀾別淚俱至今留聖覽自昔鑒  
臣愚漏午聽封事鍾晨儼步趨生平于此盡鄭  
重欲言無

東歸別親友

姬公勤吐握跌蕩天門開一朝見士七十二九  
州冠履爲之來年來貴人不見客公子逡巡守  
屋壁臥聞呵殿夢亦驚望見衣冠足盤辟春窓  
白晝封黃塵彈棊賭酒磨嶙峋九衢風花買一  
笑千門暮柳含長嘔眼中交游半行路書卷陳  
人飽魚蠹屋梁顏色空悄然檻外明河暗中度  
偶然鼓棹歸東吳策馬匆匆一事無懷中半刺  
已兩載道傍有語難斯須潞河茫茫動簫鼓津  
樹離離月吞吐高秋碧草尚江南此時黃葉長

安舞長安落葉渡江流杞菊家園正晚收天上  
故人誇好在茱萸先上野人頭

雨舟同帥敬元任話別

策馬今何去鷗飛亦已闌推蓬乞漁火剪燭坐  
江干片雨長安白層雲驛樹寒客程將別意今  
日兩漫漫

清源舟中憶荔枝題畫

荔子垂垂挂晚衙建寧春色鬪榴花何當醉臥  
冰文簞細撮吳鹽嚼絳霞

濁浪當舟夏日長浮瓜雪藕不成涼可能千里  
明駝使剪取枝頭曉露香

古城謁三義廟

水分官渡改沙白廟門清異代真人物同堂古  
弟兄艱難曾一旅痛哭此孤城千載劬勦跡滔  
滔濁浪平

閩門遇伯栩叔祖遂偕載歸是日風雨甚

武君爲唱暗潮拍岸抵家時已昏黃矣憶  
戊寅與伯栩陽羨失意歸景絕相類故未

及之

去年君行雪作花今年君歸雨打茶推蓬識君  
舊衣袂爾時城上喧歸鴉參差失意偶然會指  
口無言但索醉從容拂拭巾上塵與汝漫言京  
邸事諸侯貢者森琳琅會稽竹箭稱最良天  
子垂旒採封菲羽毛齒革皆登堂蛟龍噓氣東  
海底蜻蜓紫燕先飛張瓜牙拏空君始見深巖  
幽壑誰能常千里黃沙等閑歷腸斷青草江邊  
驛回風逆浪船相擊蓑衣着雨毛皆戟卽看烟

澹一江霞可知寒入千城麥崑山酒肆漸收旗  
平樂漁舟臥敲石武郎拍手歌暗潮潮回短棹  
輕飄颿忽憶廿年此城下凍簷寒柝聲蕭蕭僮  
僕散迸乞新火屐齒斷盡吳塘橋蹉跎褐衣尚  
相誤恍惚當時舊歸路老妻稚子在門西倚盡  
春樓數株樹

閩門見親友

吳門草樹故依然鍾落楓橋月又圓鏡裏尚能  
欺鬢髮眼中人不解藏年

燕市吳天積思盈相逢重見柳條晴憑將蘆酒  
三千斛泥飲鄉人話不平

路逢鄉人非上

停橈寄書信欲語尚匆匆相看帆上月無賴兩  
來風

歸田舍

自放蓬蒿長書關未許通竹荒青舍火蕉卷綠  
窓風無語踈螢坐深心老蠹窮一椽賓客滿聊  
喜得人同

小築帶村郭居然農圃兼細香看蝶舞淚雨聽  
魚噉橘實青垂路梅踈短護簷巡花知老至歸  
計不須占

苟美明農業娛人豈在多桐含新長桂樹老寄  
生蘿秋稼平于席寒畦曲似河湏填小池外還  
度竹孫過

園中

枯桑又生耳宿莽再抽心始悟庭花色不如芳  
草深

名花露供餘鳴鳥朝參罷倚案獨吟時  
蟾子垂垂下

劬筍不窮邊養得孫兒大雨過燒痕青日日挑生菜

日向病邊餘閑從愁裏學弄水怕驚魚刈草時逢藥

夏日園中

萬事倚闌外春魚繞指嬉萍花能自合藤蔓若爲移出地雷猶穉隨潮水暗滋我知濠上樂芳

藻欲生時

癸巳前十一月廿二日送亡妻襯出東郊次楊氏墓追述往痛

兒女真成恨秋冬乍已更九原同冥骨半世一生情落日鴛鴦綺春泥燕子營總輸殘夢裡刀尺斷腸聲

生時何忽忽死別故諄諄苦樂辭君子存亡伏老親啟予猶卜吉幻我或成真風入靈衣化遺簪始見珍



情生不自解悲至亦何時君已辭膏沐吾寧忘  
縞綦孺啼無節次鬼語半支離怪得詩成後潘  
安髻已絲

入室還如寄憑軒數落花大兒能哺弟小女解  
呼爺流水人間世寒雲日暮鴉重陽風雨合雙  
淚到君家

宅相看吾子干將負乃公病猶遵女誠老必紹  
家風百兩桃花下三星泖水東隔帷今夜語血  
抱汗衫紅

九載歡期促愁心病與并鏡臺長掩翳眉撫未  
分明骨盡開生面魂歸辨履聲將雛雙乳雀喞  
喞傍簷行

雨雪其涼候寒衣始到吳盡經慈母手分作兩  
兒襦容易捐團扇相思撥地爐舖糜隣室婦甘  
寢一愁無

十五粧成日羅衫若個長豈期終歛襖未褪嫁  
衣香狐死猶丘首鷄鳴反下堂妾身爲婦短何  
以別姑嫜

野草霜初被  
離星凍欲垂  
神鴉迎素旄  
保姆抱魂旗  
客鬼迷新次  
生芻莫舊詞  
影堂寒寂寂  
月照漆燈時

一片寒霜色  
憂歡判此年  
當時冰未泮  
此地鴈初還  
重理經心語  
能虧送死緣  
未云俯仰畢  
無乃蓋藏偏

秋夜雨舟懷友不至却寄

故人何地勝游偏  
獨有愁予思渺然  
九月暮潭彭澤酒  
一窓秋雨孝廉船  
虛村犬吠朦朧月  
子

夜鴉訛靈靈  
天此際有懷君  
不見燼花寒  
落枕聲邊

江頭見仲醇作

頻年遠道寄江籬  
及見芙蓉興可知  
縱有竹林容我日  
尚驚風雨到君時  
淒淒花發重陽酒  
黯黯燈消夜雨基  
容易少游心志得  
長安瘦馬怯驅馳

驚心寒暑逗江城  
脉脉江湖此送迎  
今日白鷗真狎客  
去年秋鴈及歸程  
擬將三徑私求仲  
漸

訝扁舟問姓名滿眼暮林秋網白相逢還喜話  
昇平

與仲醇館中夜話

腰鎌無賴剪秋蓬孤館寥寥夜色空忽報客來  
鐘定後共看心事月明中夢回書帶飛蝴蝶坐  
久經簾墮網蟲種得芭蕉堪作紙墨莊荒盡舊  
墻東

新陽屠公初任泰州繼吳江又繼吾州皆  
刻廉自好而卒掛計典于其歸以二律送

別前任豫章湯君亦有廉名而與公同去  
故并及之

可憐三任日航米到公衙投憤原非暮攀車柰  
已賒宦囊如槁葉歸思及桃花高臥苕溪上蕭  
然五柳家

亦有湯先輩高清迥自憐江湖同宦蹟雨雪罷  
官年共笑愚爲谷饒將貪是泉如今乘田吏未  
許爲貧全

贈米君夢

深坐納朝氣竹露媚清娟薄涼靜蛙黽好鳥對  
我眠俄有被褐翁貌古鬚眉鬢高談稱皇羲間  
詠郊居篇道心澹希夷冲韻坐妙妍臨高渺微  
睇不語當賓筵結交豈必深氣類歸同然  
春至上脉發羣芳燦藥藥非有藻績資天工造  
物理意匠謝丹青至音豈唇齒浮氣亦有憑亢  
節蕩和軌寥寥太始聲庶其在丘里嘉此良對  
緣信我獨知是交將遠或踈志以老漸靡蕙蘭  
汎微風悠然見君子

春暮雨後東園小集

竹外遠風至有人微詠來新陰剛覆坐曠野正  
當杯雨過看成夏花飛欲變苔莫空今日酒鄭  
重送春回

夢裡鳥聲樂曉晴花滿堂城陰在喬木雨氣結  
垂楊細草春蟲壁新泥海燕梁欲眠堪客共不  
畏晚風涼

物候頻驚眼花踈葉尚肥餘香歸芍藥禁雨待  
薔薇施食魚隨掌開簾蝶滿衣蘿陰垂欲合楊

柳白霏霏

真蓮花燈

時寺有四面蓮

巧折紅蓮火裏栽，翻將燈影對花猜。  
生香帶焰垂垂發，冷蕊含烟款款開。  
燭彩似扶嬌睡醒，月華真逐夜舒來。  
莫嫌寒燼偏饒淚，多少秋江白露催。

仲醇寓嘉興以書見訊賦報

不寐緣何事，難言始是愁。  
晨鷄初念失，春草半生浮。  
澹澹斜陽步，茫茫遠水頭。  
此時成偶坐，斗

酒婦相謀

好我於陵子，相貽種樹篇。  
沙暄蔬甲解，草盡竹孫圓。  
品藥過東院，聽鶯度小川。  
獨憐堤上柳，張緒正當年。

嘉禾訪仲醇館中

話我嘉禾好，琴書恥自娛。  
千年蠶結字，萬點蝶爲圖。  
得意平生盡，隨緣樂事如。  
紛紛多患裡，尚喜一長無。

賦王崑崙耕漁別墅

自酬秋色輞川詩容易扁舟晚更移細雨一簑  
楓葉下春雲十畝杏花時鱸魚故故隨遊舫鷗  
鳥飛飛近酒卮五嶽崢嶸收得未人間有地着  
茅茨

幅巾道服坐盤桓日日湖陰選釣竿但有秫田  
終歲計不妨橘柚隔林看殘陽晚掛空山翠白  
露螢飛萬井寒感得故人分俸買好來高枕聽  
波瀾

灌木陰陰駕釣車山農共識野人家蒹葭影裏  
時驅犢菱苳灘頭獨聽蛙鶯脰水分醴醪色包  
山雲護紫茸芽早知澤畔居堪卜悔殺東陵晚  
種瓜

贈朱孝子

世人愛巧完吾獨欽行堅商丘志得寶蹈火身  
若便至情激天性豈矜膚髮全橋西朱孝子弱  
冠顏尚孱朝朝握粟卜爲母病患牽盥沐潔巾  
幌拳跼擊豆籩命龜龜不食享神神不蠲霍霍  
磨厨刀裊裊騰爐烟鄰言子家貧舖糜尚辛艱

鬼神胡不仁不仁徵牲牲牲不可見血浣子  
右肩大兄捧頭號小婦裂帛纏疼痛各一身子  
獨何竒顛子言報慈恩析肉理固然漣血羹母  
殮一服煩苦捐繞床呼阿兒阿兒何早眠氣奔  
如潰堤鐵石不可還桑穰是何物能使膚膜連  
中腸車輪轉微陽乍回旋恍惚合靈契人工互  
因緣匍匐叩起居母言病良痊不審奏何藥但  
喜羹肉鮮子母共喁喁慈愛欣兩圓寄言一心  
人肝肺亦可鑄

讀施慶徵年兄主臣言有感賦贈

九天曙雲色千官肅威儀多士挾策來 天子  
親命之何事苦刺促忽忽占晷移春蠶葉未飽  
墨渴常支頤何以報皇天激昂負平時獨有褐  
衣子撫卷方三思恩深落筆苦地重操心危官  
鴉黯然暮鴿立猶夔夔小璫覆餘瀋學士分殘  
藜瞳瞳燭垂跋隱隱門收鍵賦就天人言君王  
正宵衣良哉君臣合服蹇斯見竒慚予乘軒鶴  
今爲濡翼鶉含毫不能吐榮名空爾爲

賦七澤漁人

水國秋清墜露濃  
漁舟點點亂芙蓉  
釣裘七澤誰圖畫  
種橘千頭已素封  
魚信拍潮江氣白  
鷗羣弄雨暮烟重  
汀洲隨意蘆花棹  
聽瑟湘潭第幾峯

題白蘇齋爲表太史作

古人頌風流大雅遺  
典刑道喪薄俗時  
蕩者蒙其名朗朗白  
少傅容與握道平  
曠代眉山公神宇  
更瑩晶胸次高雲  
流落筆春泉鳴高  
雲曠何

際春泉靜無聲以茲廓落心治我節崢嶸春酒  
社中熟雜花湖上明於此最酣適縱橫說無生  
燿若奔電驚止若寒蟬停學士澹蕩人尚友心  
自傾寤寐對兩公萬慮真可輕灑落豪素契寥  
寂松醪盟熙朝寡諍論拱揖延高濂緬懷何能  
已千載同此情

贈張濂水

濂水張先生察脉治病真隔垣見人五臟譚先  
生者疑鬼疑神而先生夷然不屑也顧獨好詩



續山先生集 卷之二十六  
五  
腹貯唐人詩數萬首猶不謂足搜隱抉微彙刻  
之于家口諷手校如救饑渴余嘗戲謂曰等藝  
耳豕苓時爲帝今其時矣與公爲李杜註脚孰  
若爲岐黃之忠臣耶先生笑而不答顧謂不佞  
子姑爲我歌因以短歌記之

偉哉張翁之察脉密如飛灰隱隱動玄籥窮寒  
谷底回陽春靜如織絲嫋嫋釣江水波紋不捲  
收潛鱗萬神參差獻狀貌二豎滅沒驚車塵蕩  
邪喫酒能化雨鍊氣煮石能爲薪吾聞古之真

人隱市里先生先生無迺是不然看君面如秋  
葉黃食牛之氣胡爲爾新齒歷歷雙瞳方一葛  
蓑蓑十冬矣知君井竈含丹砂定有昌陽供刀  
匕張翁獨自言我渴不飲上池水饑不食杏林  
實身世已如蝶夢蕉生涯肯作蝸粘壁自傷鋤  
鍾故人稀擬向遠廬萬緣畢獨有結習難消治  
生平喜誦唐人詩開元大曆滿天下君胡汲汲  
求其遺千秋若無老書蠹禹碑孔壁皆已而獨  
留肘後二百卷與人情性醫盲癡饑蚊不揮手

校削斜月微微半窓落與君高談發大噱明日  
爲君罷行藥

贈宜興八十六周翁與家君同鄉貢曾爲  
縣令

勞勞人間滿塵觸別有清涼太湖曲君不見宜  
興矍鑠翁閑領春風八十六芝田鶴瘦輕欲翻  
庾嶺棹香老初足看余三十齒已黃似爾何緣  
髮猶綠謝翁遠道存故人故人老恨歸來新病  
中皮骨君所見暮年兄弟言偏親自言休老無

異術縱有飽喜無饑嗔從拋吏牘十數載雙眸  
光彩心精神妻子不知墨綬貴偷兒久厭青羶  
貧從他西九輪稻蟹未暇石步開荆榛此中地  
僻風土厚酌泉飲之安且壽磋砑石洞窟神仙  
寂歷澄潭落星斗雲芽瑤草卽不無藥竈丹牀  
事皆有在天何必香案前墮地且爲鄉祭酒張  
公玉女誠荒唐君不見湖陰灌園叟

游玉女潭同叔達賦

把酒看瓊樹相思片石前嵐生新粉竹潭貯鬱

藍天散作巖巒潤屯爲草木烟太湖秋浪起隱  
隱月中傳

善權洞

山構危樓勢花垂采鬢情層雲雙洞合隔水片  
空明雷過遺陰火龍歸尚雨聲寂寥書帶草有  
石記三生

碁盤洞

樹底聞流水悠然天地深游魚迎洞口傳酒到  
溪陰白日寒溝色空泉片峽音彈碁聲滿谷况

復理明琴

秋日游大成洞宿余氏

重臺列幢旌曲室羅鐘鼓游人不知年墨食水  
痕古

贈蜀山夢坡歐叟

胸中溪壑鬪嶙峋甕牖繩床也不貧一夜風吹  
春茗綠窓前如對蜀山人

秋季游張公洞

路遠石橋斜楓林受小車霜頭明樹葉秋意入

山家得歲兼收粟先春欲問茶幾來靈洞口一  
度一回花

雨宿蜀山看月謁蘇公祠公自南遷歸居  
此故名蜀

蕩泊南遷老逢人便故鄉一杯終客土落葉滿  
神堂尚結陶漁市長留笋蕨香可知三洞月兩  
夜蜀山望

春園雜興

閉門梅花深寂寞鳴鳥外樓東老鱗甲紛然向  
日蛻臺西疊雪浪風動影旆旆微陰籠魄淨月  
滿生香細掩靄深竹中素女若揚袂穠華寒前  
路貴及時未逝

清明滯餘寒草木變氣候冉冉花破函一夜若  
紅荳莢甲相催逼時至不能逗服藥吸精氣願  
保金石壽去年看花顏去去不能復

天絲颺南窓燕子簷上驕久無案頭曆人言是  
花朝風物以熙明浮光亂農郊提壺坐花間繫  
之雙紅綃剪置齋房中庶免風飄搖結實良可

貪明來把空條

新草生翠烟日氣若中酒誰家遊冶郎走馬花  
在手紫繻十步香哆哆開笑口誇此一日樂勝  
汝百歲叟日暮解鞍時能復如此不

取歡耳目新種植有至理橐駝未爲工單父技  
能爾舊花報平安新花復經始牡丹開百芽雅  
勝薑千指朝來海棠絲忽秀櫻桃壘時至俱爛  
然根株復誰是今年暘雨調孫枝復生耳

園丁報花信翁若朝趨市掩露折一枝園園盡

如此稚子相呼叫病母色自起茸草不碍步軟  
輿且止止飛鳥庭內啄犬吠籬邊喜細雨化新  
魚楯檻若繞指蝌蚪復何意逐影亦唯唯小女  
簪餘花競插老人耳願我老人壽長年似兒齒  
高田不任稻下田不任麥竹荒不成筍魚荒不  
盈尺且乞菱芡種田此菱蒲宅種槿編作籬歲  
長不過膝口實未可期採拾詎爲惜老圃地自  
饒從來後收穫

荆花裹不托點點指印嫵藤花初放藍玉盞湛

翠羽雪白與平酥辛夷攪香乳園厨少魚肉芽  
甲盡登俎或貽洞庭桃誇我寶石五朝來雀聲  
鬪花落不可數

蠟梅初破臘開到茶蘼暮媚眼花不空賞心事  
多遇愛惜三春容不知久非故代謝誰覺知精  
神暗中驚寧待剝落時忽忽心始悟

少年意踈濶世事皆可爲吾友皆俊異抗手談  
皇羲邇來相晤談磨訂章句卑不惜功名暮但  
惜血氣衰傍人誰復知謂我好在此

我本澹蕩人忽若擔重負游情曠容與思念若  
埃霧朝朝贈異夢或啟占書顧名法自束縛力  
命難強御本無百年人自有百年慮逐日心紛  
然昏昏夢中路

靡靡耳目好往往能相值日短苦事長望途畏  
登涉志士邁千古小人偷自息吾友唐叔子朗  
朗負高識婁生近大雅餘酣潤文墨工詩有程  
生錢劉讓精刻頗許官庭外謳吟自得得年年  
花開時頽然醉君側

東園納涼卽事

主人數月棲床頭初聞喜鵲聲和柔王君到此  
百不憂東園梧葉始知秋竹中懸榻可下否涼  
颺徘徊爲君留剖瓜雪藕相勸酬凌霄跼跼飛  
窮溝灌木已厭林塘幽豁然數頃當平疇風吹  
稻香衣上浮高柳北障城陰稠牧兒吹葉下馬  
牛殘霞牛背鴉歸樓與君對此劇飲休不願甌  
婁常滿篝但願此地化作芙蓉洲

插楊柳

插楊柳風吹何時歇半沾兒女顙前黃半照清  
明隴頭月隴頭楊柳不成花強自含絲逗晚霞  
花飛陣陣濃如昨忽向女桑枝上落

仲夏雨後承子柔訊輒寫所懷奉寄時在  
夷亭舟中兼柬叔達

夏雲初漫漫海氣紛結縕霞霓雜來御日足高  
徐引澹若遠山色徘徊汎欄楯轉媚桑榆輝下  
有賢人隱支頤望所思超然立殘景

梅時蒸煩陰潦降暑猶溽浩浩已成勢絲絲鎮

相續子舍野田傍報我霑漑足奧草尚可夷塗  
耕敢辭毒我亦具芻蒲奔走泥陸陸又聞桔槔  
聲農事多反覆

夏雷不出聲羣動爭繁喧蛙蟲亂淺草蚯蚓歌  
卑垣垤鶴亦何求引吭相呼援鄙哉蒼蠅微薨  
薨牛耳根天地散元氣啁啾競爲尊靜者德愔  
愔安居澹無言

今人驚遠交名譽卑騰躍子獨愛瑟居閉門見  
花落喧靜各有適慎勿笑輕薄世人盡素心天  
地亦寥莫狐裘而袖羔中媿此飄泊

書契開鴻濛孳生洵多幻靡靡向背情諦視不  
可見好醜隨所置物情亦時倦老姥晚始悟千  
金寶團扇何有朗鑒人及爾時所賤寥寥千載  
名或匪出衿銜

吾友老布衣謀家計殊拙好譚古與今意遠波  
瀾澗與子實唱喁叅會契心悅有時燈影前起  
舞呼耳熱笑汝蓬蒿人何以聲歎切

負載天地間何其多煩憂省已能幾何因緣重



山丘情知兒女薄能不相爲謀百步一回首魂  
魄相拘囚漸隨年歲深詎得吾生浮何當長楊  
下避暑經窮秋所遭或不齊情性將無猶

夏日園居酬問伯

五陵裘馬厭經過乍可書關掩薜蘿歲月不來  
看燕去荼蘼開到柰花何青天樹遶銅駝闕細  
雨烟深白鷺簑盡說墻東堪避世漁樵滿眼笑  
風波

暑雨侵尋釀薄寒晚晴花竹報平安青山扶老  
供藜杖野寺逢人問籜冠蝶影深深窺晝榻蟲  
書隱隱綉空壇如年長日能消得白髮于今仔  
細看

桐葉陰陰覆屋青有無客至戶長扃星稀河漢  
涼天夕風入荷花午夢醒屈指故人如逝水白  
頭書卷對流螢朝來耕破城西土寂寞春原又  
草亭

送曹以新居吳門

隱矣居何卜因之市屢遷山前三畝宅門外五

湖舡謝客先長者迴心入少年奚囊生計有老  
更怕人傳

以我杜門役憐君獨往初邦誰非父母客自狎  
樵漁市急鐘聲暮窓含海氣虛爲誰吟望久楊  
柳故人如

靈洞山房歌

嵯峩天目峯勢走平地矗立金華山九峯森列  
若手指雙峴點點羅青環自從初平石羊去千  
古不破松蘿關洞房巖從閉白日紫芝瑤草春

斑斑鴻濛開闢豈無意麋鹿雜引游人至宋濂  
學士親封題趙公爲洗莓苔字公今出爲帝者  
師泉石藹藹添春姿蒼生未了安石事却憶東  
山初起時山頭流雲靜楚楚紫霞白雪相吞吐  
石上錯落仙人田空中滴瀝桃花乳石燕成羣  
拂雨飛蝙蝠千年對人舞曲阿窈窕通暗泉泉  
脉遶山山底懸皎如飛絲捲空翠黯若冰谷凝  
寒烟主人此時正休沐槐影深深靜剝啄懸崖  
置屋勢自然穿渠引水流自曲筆牀倦倚髯松

枝茶鑿間煮胡麻粥鳥含山氣聲始收客散晨  
鍾睡初足此心泊然緣慮空老我已分隨狙公  
深山龍蛇乍起陸滴水化雨從雷風長松秋蛻  
鱗甲老鶴奴守舍青泥封知公自有烟霞相三  
洞參差屹相望何心更與樵牧緣玉露晚出凌  
其上天留一壑待乃公赤松黃石紛無恙老農  
失計來長安滿街落葉秋聲乾吳山迢遞不到  
眼尋常把菊爲沈瀾今朝手把靈洞記夜夜夢  
隨溪水寒何時先鼓剡溪棹爲君灑掃天中壇

王問伯君子亭中觀射

朝來較騎城西塲駢兮在臂矢在房纛牙未轉  
軍士散走向王家看射堂射堂西風樹索索人  
面生冰馬毛薄綠鞵蒼頭釋棚坐靺鞨才官抱  
鞞躍餘勁飲石猶激昂神臂當弦故前却青天  
白羽相蕩磨歛然一點銀錢落提錢上堂聲氣  
揚鳴鈺伐鼓稱兕觥大呼酒瀝壯士膽翻飛走  
馬誇身強鷗鷺脂瑩孟勞綠龜龍金錯昆吾黃  
二矛重喬舞頓挫曼胡十隊趨低昂義烏健兒

勇投石淮南劍客技奪塲老拳納袖半甲子今  
日未能禁拍張等閑不肯賭勝負與君慷慨論  
興亡憶昔旌旗滿寓縣腥風夜挾鯨鯢戰紛披  
半海樓船兵痛哭登陴兒女面幕前干櫓造次  
增市中卒伍倉皇變吁嗟爾汝兵燹餘辛苦東  
南眼中見幾十年來臥戰鼓意氣虛彎六鈞弩  
赤手難投都護營熱心暫走尚書府尚書世受  
龍虎韜大兒昂藏參馬曹盾鼻文章賤于土蟠  
胸甲冑光如刀桑弧未了男子事銅柱敢許書

生標君看此輩辨賊否誰爲將之東射潮

贈邵元沙張平野兩翁

誰移渭陰半畝之籜龍矯然森立東墻東秋清  
忽照中林風虛堂月靄青濛濛此時座客歡相  
從碧鷄玉馬雄談鋒中有不語龐眉翁問翁何  
所能萬有羅其胸傍有一翁七十許視翁尚少  
八寒暑食牛之氣不可吞木鴈燈前忽人語自  
言兩老人如君年少時讀書不能破萬卷未敢  
人前輕吐詞解頤匡鼎執經早入室侯巴爭字

絳山先生集 卷之二十六  
奇填門五馬稱弟子先生尚掩書生帷自從兩  
公老書蠹學者半厭毛公詩眼中生花手磨勘  
片語尚可開來茲三十年來珍敝帚我求童蒙  
亦何有時艱競請終軍纓濟世還須伏生口老  
人閱世回回新十年閉口耕河濱君不見磨鏡  
先生卜肆坐兩公豈是尋常人

古意五首

松栢挺直幹斧斤落高岡芝蘭值當戶或乃非  
其祥奄離幽谷中傷哉獨芬芳萬類各有醜失  
時行決張東園亦有李願言代桃僵何當一心  
人持以奉君王

東隣有季女明潔有好姿殷勤自結飾閉約重  
屏帷爾室諒匪遐懷意兩不知不惜知我少惜  
子盛年衰心睽媒則勞君貞行有疑蹇修旣云  
逝末由通微詞婚媾紛有言嗟嗟非我思

鳴鳥不至郊西狩乃獲麟傷此二靈物生死回  
所遵宣尼歎其衰掩袂歸泗濱文仲實在位下  
惠終窶貧海島從何來智不謀厥身逡巡動朝

聽享燕乃紛紛呢嚟不下食流涕對九賓逝將  
歸故巢含意徒云云

十五歸君家兩姑正齊眉大婦調絲簧小婦織  
履綦中婦執任事敬適滋味宜同居不同心嗔  
喜或互持聲吞猶恐揚色授妄揣窺思再非所  
冀譴薄吾幸而窮老性未諳裴徊下堂辭豈不  
竭愚鄙君家婦難爲

皇靈信有赫弛張握中權不言布四時民咨猶  
暑寒燁茲煞機發萬物乃蠢然昭明本無心而  
豈亭毒偏膠膠鷄則鳴如夷道乃全益損以爲  
常用舍非所專白日出海底其下霧浮烟好風  
從東來蕩蕩游氛寒不腆枯朽質仰沐光采鮮  
願分桑榆照及子華盛年

園中觀稼

感感蛾羅黃閣閣蟲蛙語條葉退新枝代將事  
禾黍秩彼公私穫兩兩婦子伍雀麥開舊畦鳧  
苾釀膏土播插趁午陰長茂冀微暑新苗纔如  
髮知經幾風雨

楚國有貞士黽勉耕自食豈伊貧賤分念我先  
稼穡嗤彼梁肉姿而賤胼胝役明農洵可學吾  
衰不任力斗酒饁南畝慚愧難遍歷歌聲亦勞  
止愒蔭庶勿亟岸上誰家兒光馬耀服飾命也  
實不猶于何論勞逸但無食場苗辛苦良可惜  
古者耕鑿兼楛楛抱甕徙薄田幸濱河徒耕力  
可以油油枯槁動盈盈未云止瀾漫萬井平分  
之灌園杞藁竹引細流羣芳潤餘泚大雨今時  
行僂力且秉耜去年襍襍貴誰當復辭此

大人美翱翔農圃欣我有每每負郭田繞我宅  
三畝西北有高樓夕陽掛窓牖鮮風冷然來宛  
宛動榆柳偃仰當之眠逢與耕者耦亭臺雖具  
體幸托林泉後藤花高樹巔青蘋小桃口草長  
池魚肥果熟巢燕守芬此筍簾羨纍若枇杷剖  
食之勿願餘天以賜園叟自種還自甘可奉君  
子否

曉涼露田白之田敢遲遲我前抱經籍我後隨  
鋤犁耕僮磬折言甫草謹以治鴉鵲立牛背不

知牛苦饑廣場足小築胡床面交畦樂此禽鳥  
聲雅與吟嘯宜乍聞東家喧索租兒夜啼維我  
苔蘚門亦時車馬窺人生各有役約畧苦樂齊  
小隱不言深言與箕穎期

題知希齋

葢茅近城市門前車馬道車馬日以深環堵自  
秋草心清書卷閑夢寐無顛倒歛膝對古人開  
簾送飛鳥有念苦不多懷人竟以渺微吟動涼  
風拂拂琴上掃智離竿牘尊道在聲音小被褐  
而懷玉落落以爲寶

張仲立謁選得臨清守寄贈

人傳臨清太守美年少乃是崑山張季子穿楊  
妙技天下聞再發無何撥弓矢郡符今雖落君  
手君名尚在學士口片語墮紙插羽飛御史下  
堂博士走曩歲燕市懸金求尚恨糠粃翻在首  
世眼青白那得知至今盛事慙薪樵孱庶不辨  
幾頃田自陳毋老須五斗逡巡已自擲明珠翻  
使世人珍敝帚臨清風物天下饒齊統曾縞車



遥遥月午報客柝如雨日高聚市塵成囂酌水  
自飲猶畏膩手板導前疲折腰知君腹腸不解  
飽竊恐項骨難禁驕丈夫肯爲妻子計吏譽豈  
許文章要嗟予書卷疲日月螢火紛然照白髮  
儒服可堪官長迎新篇半就時人沒此時夢見  
張臨清高臥琴堂萬緣歇

沈文選日峰謫歸賦贈

山川紛紜送逐客四月沈郎亦遷謫出城遠雷  
震蓬蓬渡江梅風暗瑟瑟 聖主用人捐細誤

盛朝何聞置羅畢紫薇高懸箕舌張台階郎位  
紛震軼小臣自知天意深流言道路從何出邇  
年太宰歸匆匆其屬往往途相逢前有王趙後  
孟顧伉浪聲氣多才雄天下調平有沈公臧否  
雙提日月鑑庶彙盡入乾坤籠倉皇啟事綴殘  
牘一斥萬里羞雷同竄身潮陽瘴全黑回首魏  
闕塵猶紅新人勝故自應有祗恐此地難爲工  
自君策足據津要已拚謝事歸江東冠紳尚幸  
留 主賜休沐子舍差從容把臂喜得山吏部

莫將敗意嗤王戎

池上軒卽事

城隅靜女澹無言滿面柔腸更可憐池上露華  
濃似酒眼中秋色共娟娟

怪道如花滿春殿司花故遣侍兒愁筵前觴政  
縱橫甚脉脉芙蓉雨後酣

含情落葉已繽紛深轉歌喉齒未分橋上玉人  
真咫尺簫聲似隔數重雲

世路崎嶇盡狹斜權牽小艇宿蘆花鴈奴昨夜

驚寒起月白汀洲未是家

九日登鍾樓寄友人

沼邊晴日澹秋容更是層樓海氣東但使有花  
供令節一將危帽任高風蒹葭浩浩歸帆遠梧  
竹青青小寺通相憶響山今夜裡暮雲尊酒送  
飛鴻

十年縱酒狂歌地幾見園蔬墓草荒茶社客稀  
桑苧在僧寮秋晚荳花香煙黃睥睨遙村合月  
照罌罍片海黃檻外虞山青可摘東籬暮色又

重陽

客中此日倍生愁，忍復秋殘故國樓。  
滿地游人相識在，傍城臺館若爲留。  
霜前白露偏欺鬢，節後黃花欲上頭。  
一片夕陽農稼裏，吾生實有稻粱謀。

高秋物色正宜晴，水潦全收野楚平。  
檣樹遠搖潮影白，鍾聲寒帶月華清。  
相遺饒餌還鄉土，老見茱萸似弟兄。  
三十五番生日過，幾回風雨上東城。

十月省墓過飲群從卽事

禮失吾求野風流，俗尚初貧交鷄黍。  
見生計褐袍餘白髮，爭扶杖青衿不廢鋤。  
敝廬如有托萬慮，欲全踈。

喬木微陽下，柴扉流水清。  
漸稠桑柘影，正隱讀書聲。  
蟋蟀秋堂警，魚蝦早市晴。  
相呼隔城郭，一見若爲情。

此日田工晏未誅，冬月茅雨收紅苴。  
莢霜老木綿苞地，薄秋畦苦官新雜稅。  
交君看窮鳥熟歲。

暮亦登庖

海上

海風吹暮角戢戢亂帆收甲士何常耀穉航遠  
自浮市嚴清柝外城枕大旗頭鼃勉軍須辦遼  
陽未汝休

送崑石五叔輓輪北上

天上長安耳聞好年年尚轉東南稻出門不見  
黃河痕半途已夢江邊草世間萬事多遷流呂  
梁釜底窺徐州柳花春香珂馬路曾此王孫厭  
旅遊開樽已散北海客掃門誰憶平津侯歸來  
生事惟書卷科頭獨坐桐陰展涼天露剝雁來  
紅客衣霜氣知深淺

贈冲元子

初平騎龍去天闕隱隱華陽剩丹雪石上栽松  
夜雨清岡頭劖木春雲熱地肺遠接終南幽瓢  
笠飄然更遠遊半偈當關萬緣歇一丸守鼎妖  
魑愁雲車偃蹇驕不起尚爲人間兒女留白頭  
將玄入闌闌黃金無術干公侯留侯謝病新歸

里忽遇當時赤松子相對匡牀無一言香篆烟  
消月西起

錢一菴六十

莫羨閑身六十強誰于五十罷柴桑未論去就  
緣何事贏得兒孫置汝傍潦倒局殘蘿月暮依  
稀吏散竹風涼南樓海水高千尺釀作黃花歲  
歲觴

何勞隣父餉頻遺有酒相逢不解辭容髮定強  
爲今日家緣剛似罷官時餘醑敢自欺年少壯

業猶堪付小兒瀚海風雲看到眼且留殘日伴  
東籬

王崑崙先生青蓮舸

八月湖水清若空天高木落聲洶洶朝來雲擁  
楓樹黑白沙夜走江豚風灘頭漁燈靜戢戢微  
茫遠影含孤蓬如山巨浪破之出半醉半醒鼾  
睡翁此翁姓名落人口此翁不爲世人有廿年  
未老桐江絲百篇自醉烏程酒少年曾爲汗漫  
遊策蹇橫觸可隸騶五侯傳鯖跪行炙舉筋欲

下慙腥膻吳山滴滴青待我歸來不暇營菟裘  
千頭橘奴百斛林寒薄未了人間愁白髮黃金  
不我以賸有生涯付流水羽扇高懸白鷺簑竹  
床斜坐烏皮几潮去潮來秋可憐七十二點青  
娟娟蕪葭白露人宛在魚龍大澤天茫然五嶽  
已飽藤杖色五湖自握扁舟權扁舟日月自瀟  
灑朝遊閭門暮若下吳江自廣能容刀長年使  
船若使馬蘆中之人逝矣夫誰是當年問津者

送王崑崙遊五臺

歇馬先參栢子禪白頭行脚趙州緣無端故國  
蕪葭夢又在邛鄲酒肆邊

關東已試葛衣涼漸入邊城草色黃六月驅車  
君莫厭中臺山半已飛霜

定午微鍾出寺稍寒雲尚掩玉亭茅千年風雨  
三珠樹留得孤山野鶴巢

百丈冰崖天倒垂避人饑鼠齧枯枝此去好誇  
王太僕遠將雪色映峨眉

王崑崙先生六十生日登五臺賦長歌奉

壽

漫浪菰蘆中忽已一甲子兒歌孫舞躋春堂七十伯兄同燕喜黃魚出海菖蒲香桑落苞蘆至千里酒中忽憶五臺雪長安且過榴花節九衢埃雲結紅霧不向邯鄲夢中熱披裘五月登清涼金蓮布地天花黃聖燈暉暉映斜日身影忽現文殊光長跪問文殊何以壽幻叟一夜飄風西客星問北斗麻姑爪擘方平麟遠公室釀陶潛酒今年酬盡兒女事輕囊短劍隨風走芒鞋已挂道場山釣磯未沒蓉湖口十載一山名一更百年未了名山名乃公老大厭狡獪故山丘壑縈心情青獅無聲吼動地鬣華燕坐飛縱橫此時舉酒酬山靈山靈識不王先生

贈陳濂石先生歌

并序

世之趨勢利也甚而漸于家矣顏路曾點史不志而志陶氏之母何怪乎風靡至今也夫子父相弃割沒齒之愛以博美官厚直而父耶而子耶籍爲顯親世之以纓組事親不乏

矣而速朽者何限也陳先生有子而才曰仲  
醇仲醇年廿八棄儒而隱焉倘亦樂鷄豚之  
逮存親也然得無難先生乎哉乃先生曰喜  
人有子而無子而我能有其子我啜菽飲水  
傍兩兒以嬉爲貧陸賈足矣吁吾是以知天  
下未嘗無賢賢者不必衆是漫爲歌以寄之  
堂堂復堂堂君不見崑山小隱陳家郎咄咄復  
咄咄君不見陳翁之子山人骨陳翁之年過六  
十有子不減唐李白橋門博士稱吾師詩社爭

輸少年席盤龍繡虎手所能翁也握莽收其直  
是何感慨甚歎息浮生烟書螢幾乾死穎公不  
能言侏儒可以飽曷不裂冠挂瓢山之巔青城  
徐郎相勉旃謂而丈人將無爾憐陳郎曝然掉  
頭笑而真不悉吾翁賢翁謂兒丈夫自有志長  
安尺寸地人取爾須棄春膏滿天瓜可蒔酒槽  
油油滴香膩少可一月十朝醉我醉兒扶兒寒  
毋衣有兒在滕花在眼生願與兒共脯糜豈不  
聞天下盡趨湛毋風華亭競走平原祠山頭白



雲自怡悅若以問人知是非

緱山先生集卷之二十七

太倉王衡辰玉甫著



男時敏校

詩 附詞

鎮江郡守玉沙王公考滿

海東承賜履江介表名藩不覩江山麗安知刺  
史尊檣鳥迎皂蓋竹馬遲朱幡命重山爭色風  
清浪不喧春陰桑柘密膏雨稻苗繁魚蟹朝迎  
沫蛟鼉晝負暄輪前扶白鹿舍上集祥鸞始報

三年最遙沾五袴恩穎川新賜璽渤海舊乘軒  
卿月瞻天表陽春燕日溫佇聞徵使下敢卧屬  
車轅

建業千秋控上遊江聲百里接訶謳烏窺懸榻  
風生坐雀報嚴更月滿樓棠樹漸深南國雨櫻  
桃三熟海門秋穎川佇賜尚書鳥絳節朱旌暫  
可留

屠長卿枉奠先大母病瘧寺中移臥家園  
是日得雨病良已

有客有客白其馬繫之寺前古榆樹問君何苦  
六月行片心如漿已入絮出門千里不擇吉故  
人相奔一何遽火雲駕浪能鬱蒸居然瘧鬼能  
憑凌維摩抱膝居丈室諸天龍衆高峻嶒縱橫  
談塵了無異兩目挺動頭鬚鬢不能沃君廬山  
百道之流泉不能坐君峨嵋百尺之層氷東林  
竹竿靜嫋嫋涼颼徘徊如有情客來黃鳥亦弄  
舌高蟬乍咽單鳩鳴俄然蜻蜓送風雨蕭條木  
榻留餘清君言多病生道心逢渠何處勞追尋

自從松鶴去碧海黃蝶浪逐溪花陰微言墮地  
苦委羽清夢到窓堪解簪天河風浪亦時有邨  
保世事無浮沉看君收拾越江波濤向岑寂辛  
苦入山山不深君不見太原書生復何事高枕  
不得霜毛侵

長卿東歸

日午陰移白石壇清風欲過竹檀欒踈簾小簾  
題詩處留得雙趺印月看

自可遲迴訪戴船板輿無恙北堂前桃花甲子

應難記再渡錢塘是百年

騰江使君奉 特命臨祭先墓

旆旆霓旌近白楊風自呼一杯高馬鬣萬衆式  
龜趺蔓草何心結棠梨濺淚枯死生天地仗靈  
爽禁樵蘇

日掛東南樹茫茫片海圓大刀搖浪白新璽落  
霞鮮高會臨無際端君念巨川相聞謝安石半  
夜嘯風還

宿命吾何感僕夫行告勞出門當暑雨策馬涉

江濤同病寬賓禮經時攬使袍涼風正瀟灑何  
以駐干旄

馮尚寶奉 命致祭事竣還 朝奉送得

二十韻

鳳閣推恩重龍章灑翰頻使星紛海會卿月照  
河津特異臣逢主非常子逮親後生惟益賜加  
等豆邇均不分尸養沒還叨尚食珍肴烝羅鼎  
釜鬯灌赫纓紳禮創諏議審官嚴夙事禋腆筵  
沾故鬼哀些出詞人土壤無靈骨乾坤有負臣

哀啣心匪石感鬱火爲燐况借名賢重躬將上  
命陳緬惟爲茂宰割治托比隣葉縣鳧曾接萊  
蕪甌屢塵玉壺清沁骨冰谷迥凝神雲擁青囊  
舊風驅絳節新泥封原尚璽詔下式如綸葆衛  
臨蓬華瓊張散里闈享賓安坐次贈縞亦逡巡  
盛事兒孫記孤悰涕淚伸有懷當展念敢臥屬  
車輪

送翼堂趙使君致祭事竣還 朝

尚紆 皇眷獨臨軒江上雲霞接使轅親捧十

行新詔字轉驚萬里得歸魂蓬麻白日瞻霄漢  
墓草春風識子孫留得王戎鷄骨在好將恩數  
報秋原

壽外姑

青鳥三山使靈芝五色房庭瞻王母降南映老  
人光杲日明暈翟微風聽珩璜瓊杯傾顥露翠  
釜積玄霜子姓爭扶杖賓筵秋舉觴願言徵女  
史敢以告司觥矩法遵陳禮勤勞匹敬姜夙興  
朝筵笄燕侍飾壺漿焜燿綸爲命續紛服有章

寵仍行益僂處泰動思臧白髮操家政青燈教  
子方敢忘思餽饍尚浣嫁衣裳節嗇從三寶安  
行度七襄三秋當解悅萬寶式登場慈竹凌寒  
動黃花傲雪香鼎來春藹藹爰降福襍襍風鼓  
金鵬翼雲封玉燕筐衛郎初假館苗母正開堂  
照耀羲和馭晶熒寶婺芒儀形還自舊慶澤欲  
分祥采葛春相遲攀蘿月正望自今耆且耄咸  
與壽而康

汎茗上訪沈進士

曉行苕水上忽憶米襄陽棹出蘆花亂門深竹  
氣涼賣鮮朝市聚燒葉野橋香此間軒組客亦  
復在耕桑  
不識竹墩路自通桑者名烟光含日薄水氣冒  
江平蠶稅先秋雨魚梁掛月明往來無俗務小  
艇故盈盈

卽景

魚噉亂葦不避釣犬吠枯桑如有人一帶橫山  
飛鳥絕斷橋西去又通津

野菜香菇繞徑栽漁樵日落棹歌回回舟自識  
門前柳却問客船何處來

送沈水部北上

苕溪晴雪逗春寒迢遞行旌別思闌花發江南  
懷水部星從天北望郎官沙糝驛路孤流急浪  
隱繇隄老樹殘好計工功荒度始兩河日夜有  
波瀾

送李茂實赴蜀

吳山春雨聽鳴鳩珂馬驟驪向益州補袞有心

終戀闕籌邊無事亦登樓中朝尚自虛清問內  
史何當厭薄遊滿耳波濤送君去江山千里正  
安流

猿聲送雨急千峯夢裡猶聞長樂鐘落日坐馳  
新到檄寒雲愁檢舊時封遠臣敢料安危計

聖主曾將痛哭容惆悵一官成避世回頭雪暗  
掖門松

立春前一日園中踏雪

晚鵲簷頭噪雪光更將餘臈逗年芳先春正結

梅花片映日還禁柳絮黃泱泱細流穿伏檻踈  
踈亂竹亞東墻老親橋外携雛至風入茶鐺水  
正香

燈夕卽景

月滿寒街雪更清千家燈火闌新晴松毛密覆  
青帘碧蓮葍雙懸錦袖明夢裡星橋收晚市愁  
邊臈鼓鬧春城獨憐太守笙歌出竹馬兒童語  
笑聲

侍家君遊西山



平開太湖面澹蕩起風花萬舶浮孤嶼群魚網  
亂沙松齊剛可杖竹密始成家我自山情得饒  
君取路賒

登鄧尉

周遭山郭下半是綠蘿庄未卜吾能隱居然地  
可桑村穠禽鳥至花落水泉香初啟游人路春  
農已自忙

浩蕩扁舟興臨高更渺然隔江傳石骨近暮起  
松烟雨載蓮峯白花籠小閣偏櫻桃欲移醉展  
轉落梅前

但有娛親地都爲愜意時麥風吹浪起榆日放  
絲遲乞茗逢僧寺隨花識路岐晴鳩頭上喚與  
客更爲期

雨中子柔書來得宜興耗慨然賦寄

蹭蹬高鴻暮雪天書來再博故人憐漸看世上  
緇爲素莫是先生白尚玄憎命文章常道路送  
窮詩卷又殘年灰心筆硯無憑暖恐撥寒燈勸  
着鞭

雨中之嘉定過子柔謁其尊人

老眼蕭然強自遮，入門未敢便長嗟。心情此月  
旬中雨，詩興南窓牖裏花。豈有薄田餘菜麥，還  
欣水市賤魚蝦。儘饒留客朝朝醉，除却尊前事  
事賒。

曹謙吾北上戲贈

高蟬莫悲風，勸爾一杯酒。瓜香棗熟，大路邊井  
亭無處無楊柳。問君何苦六月裝，蕉旗霍霍秋  
雨忙。赤日照地，火雲滿人間。何地尋清涼。長安  
貴人入駟出馬頭，相揖無顏色。乃知漆園寄微

官數株，淒娑自得得。小鴻臚問大鴻臚，溫室年  
來一字無相逢。爛醉官醞酒，明朝累汗府中趨。  
丁明府兩年步禱雨，雨輒至。

人傳太守朝走東城隍，葛屨納納秋露涼。俄傳  
太守西河岸，魚頭使者當香案。去年十日五日  
齋，今年官厨無菜鮭。頭上瞳瞳戴赤日，累汗卓  
立當空堦。黃旗颭颭，招不得。父老傍觀淚沾臆，  
麥秋稍有鶯鶯餘。東江潮頭尚三尺，枯槁未斷  
秋林中。忍使吾侯面黧黑。是時日午塵頭揚，梧

桐捲翠蕉舒黃雲綃絲起西北未有雨葉翻  
垂楊數點尚疑竹上露俄然雨聲喧薄暮蛟龍  
跋浪東海來烏鵲盤空喚鳩婦卽看葱嵬潤簷  
花可念溟濛入郊樹香秔傳膏珠顆圓吉貝含  
滋玉苞富更喜七月無盲風脉脉萬井寒溝通  
數聲輕雷實陰火鬼車不敢驚兒童人言清河  
先生檄星五我言太守隨車雨何知太守雨君  
不見兩年竹馬街頭舞秋成醉君秋社場與君  
細說丁明府

游天平飯趙凡夫家

看山愛主人山窮主人出謝病經春秋心遠石  
自櫛落落書卷餘清談對捫蝨豈無佳遨遊及  
此清宴日苾芳春風香委虵出齋室藕漿芼葵  
羹雲子青瑟瑟月白松已花雷驚笋初茁分彼  
鳥雀糧聊爾供口實市鍾戛然鳴厭飽各已畢  
我杖策策鳴石磴躡虛空驚雷走足下忽起洪  
濤風朝雲何鬱淒澗底渴素虹喧逐萬壑聲鼓  
舞寒溝中回頭潭影低石幢出芙蓉隔谷聞丁

丁雕鏤殊未窮五丁鑿金牛非必皆鬼工陵谷  
本湏臾千古嗤愚公

桑濮已靡靡王風自蘋蘩吾道已矣夫求野茲  
庶存春絲晝簾靜窈窕揚微言素琴鏘房中高  
雲跨前軒萬類各有求幽谷芳蘭蓀高唱德自  
隣耦耕道斯尊閒風澹荆門桃李紛外樊德公  
許我來君其具壺殮

春仲偕仲醇遊楞伽山過故所讀書處飯  
趙凡夫墓所

人生無留影歲月忽十五縹渺讀書窓雲含亂  
山舞斑斑墓草深曖曖宿微雨壽比松與栢于  
焉縱尋斧孤泉如絡絲石上聲自苦雀啄游女  
塲花開酒家土眼前我與汝題詩跡已古

當時送吾友偶至東山麓風來蒼浪浪快我心  
所獨乾坤悶靈氣果此遂幽築石破土已膏水  
出山如沐藥壠開稻畦時哉坐雙鶩高高松原  
上白石淒以穆何以虞尸賓朋游奏觴肉枳花  
圍作墻寒扉不禁啄吾生有棲托喧寂相互逐

誰非斯人徒歡與游豕鹿

吳曲羅明府晉北儀部之任贈別明府與  
余長安有故丁酉冬余北上公追至江滸  
餞之北固山故首章及之

案牘江中了烟嵐戶外青來朝紅藥砌夢到綠  
莎汀欲問朝廷禮先占郎署星相思楊子水亦  
有峴山亭

潤州有峴山

十載論文意飛揚及此時一將郢人調再整漢  
官儀日月餘青簡風塵托素辭腐儒粗糲厭擬  
欲向君私

余三不上公車戊戌以病憤不竟試出都

門作

惆悵浮生墮棘闈幾番心事悵多違縱教白壁  
難酬價誰遣流黃不上機怕到暮春留客住懶  
扶殘醉待花飛殷勤還有雙歸燕相傍東園紫  
竹扉

勞勞毀譽十年身滾滾征衣萬里塵從未入宮  
誰是妬飽經逆旅漸知貧烟花禁籞遙含曉野

柳溪橋亦放春憔悴青袍憎草色不堪頻與送  
行人

自將名字帝城誇每及歸時柳未芽半刺老將  
懷裏玉十年常看夢中花蒙茸草閣書成帶冷  
落江楓牘滿車還喜倚閭雙健在羸君三月尚  
思家

萬事如君得自由汀花社燕亦春秋無端眼底  
珍鷄肋漸遣燈前誤虎頭去住盡看窮鬼面笑  
啼重上故人舟灌園陳仲成高枕枉殺當年爲

汝謀

懷仲醇

雜興

有州二十四不能鑄一錯人生三萬六不得一  
日樂過去日苦多未來杳難模縈縈萬思慮總  
爲見在縛見在在何所過來并除却莊周與蝴  
蝶相化兩莫莫

來時此楊柳歸時此楊柳楊柳未破黃客胡復  
東走主人牽客衣無乃太健隄解爾腰下綬貫  
爾黃糶酒客對拙言辭逡巡指其肘不見君家

燕飛飛出朝牖去  
噉冰上魚亦復長  
飽不彌空塞黃霧  
行鴈亂其序疾風  
橫面來使我不  
得語悽悽日影下  
彷彿見儔侶病馬  
嚙樹啼斧杏作薪  
煮酒漿槽頭泣相  
對何楚楚竹燈挂  
窓櫺照我舊宿處

棗林逗餘日汲汲  
望村火盥水不終  
湯且對三鷺坐塵  
冠拂不開浮埃枕  
前墮臥起襪被囊  
苟直不成褁壁上  
題詩人思歸盡如  
我歸語室中兒旅  
次真瑣瑣

吾當三十時四十  
看已翁咲彼髮已  
黃車馬何憧憧一  
朝行及身奔走不  
有躬世事相因依  
在俗能異同轆轤  
豈不勞激搏任虛  
空貿貿各有爲僕  
僕徒相逢寄言意  
氣者君子亦有窮

古人擁萬卷雅勝  
君百城美玉苟在  
斯被褐亦自榮寤  
寐心所歡豈爲世  
好嬰鄙哉學俳偶  
逐嗜不得停五色  
了無主心手相鬪  
櫻三日織一縑新  
故忽已更機杼不  
能言司市默以瞪  
自有章句來芻狗  
充棟楹豈無特立  
士崛強竟何成

荀不救饑餓石田焉可耕

謗譽殊孟浪一身萃媼妍高天而深淵相去一  
何懸愆咎卽苟塞酬知更難言身名不兩飛君  
子敢處全韜精示其璞衆詠相雕鐫寘身高壙  
上弋者或慕焉何以息吾影遺恨於簡編

人言隔陰昏多是隔世事今日思昨日忽忽亦  
何意因緣和合生豈必可思議步伐吾猶人無  
才不中忌我豈好窮哉抵壁若唾棄病在耳目  
前二豎亦劇戲力命互有權肝胆不我制

高原凍初圻忽已秀新夷况我江以南青青自  
陵陂十五二十時春暉尚遲遲醉席紅白花仰  
視低昂枝驅車此行役觸目多所思里中黃衫  
郎鞭梟垂楊堤我將施行歸或恐年少窺顧問  
客何來何當衣上泥

長安非天上望望不能前夙興戒車徒臨發帷  
頻褰大道固孔夷傾脫以忽焉矍索空爾勞或  
乃瓦注全遇合寧有常卿相亦偶然四十不動  
心我已非少年驅車過鄒邑有泚不自湔



感夢

遠客心胆孤因夢苦相虐五更聽車鈴已畏白  
日落往往心路熟驚魂復相索靈臺塞因果夜  
氣焉所托邀彼巫咸占出口念已錯欲驅三彭  
神還之太虛廓太虛亦不受諸業非我作了知  
萬法幻誰不爲幻縛

臚傳日口占

彩雲重擁五堦前未繭雙懸御墨鮮偶爾功名  
三語合如聞姓字六宮傳價從駿骨枯中貴色

借蛾眉怨裏妍顛倒十年京國夢一時回首杏  
花驪

敬酬温夫子贈章并以抒懷

十年心事付流言老盡蛾眉轉見憐豈有陽春  
真絕調彈將流水亦成絃高城月白分藜火小  
閣清風對草玄欲識宮墻新氣象雲華秋掌共  
澄鮮

公車初試薊門霜徙倚金臺舊道傍櫪下秋風  
勞剪拂樽前春色乍飛揚三朝袍笏龍章麗萬

卷圖書蠹字香珍重國恩慚退食敢從世路問  
行藏

送立峰高先生 冊封瀋瀋便道歸省

玉節葳蕤下直廬王門遙曳鳳池裾桐圭原是  
唐封地蒲坂曾藏漢史書絳水花迎丹闕外茸  
城草借碧山餘更將五葉堯雲色畫錦堂前慰  
倚閭

送溫夫子 冊封萬安便道歸省

六傳駸駸下洛陽曳裾猶散鳳池香如圭桐葉

迎秋碧似帶河流抱日黃緜嶺鶯笙隨使節周  
南蠹簡入奚囊亦知鄭重分封意寶冊東朝取  
次將

送春臺年丈之任丘

高第還爲令掄才寧偶然股肱三輔重早潦九  
河偏滾滾郵亭馬蕭蕭官舍蟬無窮手板恨端  
爲主憂捐

灌壇千里雨瀛海四郊春誰道風塵色長沾陶  
令巾文寧經世賤俸爲救荒貧不是無奇策殷

勤問故人

送王夫子言事謫貴陽

自點螭頭筆心看去就輕至今瞻衮闕敢復論  
王程痛哭留封事長噫出帝京可憐離伏馬萬  
里不成行

回檢晴窓疏真堪挂此冠敢私天雨露聊與世  
波瀾草色郊原盡河流并稅乾蕭然看道路誰  
爲說艱難

禮樂開蠻郡山川借逐臣驛從雪浪盡春到印  
江貧曉霧竹鷄語暮烟山鬼親相逢青瑣客半  
是問津人

送同年李文歸省

淮流遙接海門長玉杖扶鳩出畫堂瑤圃欲傳  
三鳥信泥書先報五雲鄉鹿車舊市留通隱熊  
膽寒燈憶共嘗此日春風輝彩翟瓊卮分得露  
莖香

夏日泛舟下潞河

湛湛溪蒲綠灣灣郭樹斜與君京國話借作故

鄉誇水氣清沙草河痕繡土花遙看車上客望  
屋問茶瓜

送人歸娶省親

四十年來號大家早停膏沐卷羅襦寧辭秀色  
消金鏡獨抱清心映玉壺詔許陳卿歸卜鳳情  
知令伯念慈烏春歸夜暖看花燭并作高堂獻  
壽圖

旌竿此日草茅偏幾度秋霜點鬢乾柏苦自甘  
春汎汎竹斑長共月娟娟堂中彩舞鸞箋影闕

下彤書鴈使年珍重里門相拜詔兒孫爭導板  
輿前

存問紀事

里門新捧御書鮮爲報東朝寵數偏心事  
再酬焚草後鬚眉還憶茹芝先春從玉案傳  
日暖借彤庭賜帛年次第斯干占國慶遍呼兒  
女祝燈前

壬寅春舟泊楓橋待客不至寒山寺訪曉  
山上人書畫香茶爲供

燈含帆影亂鍾雜市聲昏杳杳竹深處蕭蕭僧  
倚門獨將殘雪色遙對遠山言又聽烏啼急江  
城送客喧

僧復花山故刹

不改青山色還安白石禪空林原古刹僧臍始  
今年鷄犬桃花外香燈竹樹邊重來荒徑合幡  
影導君前

沈姬故淮人也侍御公過淮夢喜鵲啣槐  
花來以姬歸俄而公卒姬以死殉夫槐者

歸也姬得所歸矣壯之爲賦短歌

三月渡淮清若空鵲啣槐花墮掌中合婚有時  
花露融移植庭前號守宮一朝驄馬呼不起宛  
轉蛾眉爲之死誰云乾鵲占不靈花死留香報  
君子我有千金劍懸之塚樹傍塚樹不能言劍  
花湛湛凝秋霜淮河渡頭一片葉已挂閩江高  
白楊白楊蕭蕭不復春燕泥寂寞空梁塵逡巡  
下拜白太傅故是當年歌舞人

立秋日同仲醇集閑仲澹圃卽事

朝霞閣不散簾外薇花晴樹色交交入池光宛  
宛明話深幽鳥出局靜亂蟬清不待庭陰暮微  
涼暗自生

記詠歸思賦小橋紅寺西長齋作秋社曉讀帶  
春犁客自招新隱門應有舊題生涯真澹泊寂  
寂荳成畦

十月十五日

冊立分封禮成齋 詔東

下

遙聞仙樂駐黃麾裊裊爐烟引案移鶴禁曉鋪

金屈戍鳳樓晴啟玉葳蕤宮雲長紫千秋節輦  
草初青百子池廿載養成鴻鵠翼 皇情端爲  
萬方私

琅函五色下芝宮十月陽春驛樹紅夜半日輪  
重海上天邊星影照江東老臣涕淚謳歌裏游  
子衣冠拜舞中檢點退思真過計當年園綺幸  
無功

送吳函所年兄使竣還朝

駢駢駟馬出汀洲次第絲綸掌上收邑譜延陵

新禮樂家餘南史舊春秋堂中萱草天偏近池  
畔薇花月尚留記得寒江歸路共風雲獨擁仗  
車遊

七月望雨中同仲醇諸君子淮雲寺薦先  
次仲醇韻

四野桔槔收北山雲尚流薄烟生近郭細雨作  
新秋落落剛逢汝茫茫盡解愁招提何處是幡  
影直城頭

宛然晴雪路曾與梅花期香發酒深處客來齋

午時春原看築社秋水又分岐眼底成興廢寒  
林尚古碑

瓜果媚盤好茵陳飮坐清秋花僧共老踈葉雨  
成聲山鬼如投寺村鴉亦避城豈無留客處多  
恐費逢迎

日氣樹中碧微鐘烟際來虞山行莫矣吾黨賦  
歸哉法施湛然滿慈音聽漸哀竹枝深夜雨曾  
否到泉臺

天寧寺別叔達

記宿山窓雪悠然更遠行朔雲郊樹色落日寺  
門情臆鼓從鄉社寒花似弟兄看君飛動意且  
莫羨歸耕

別同門

甚負留人月蕭蕭桂屋隅歸看畦菊在好寄驛  
梅俱同喜于門合道將求野孤夜深寒馬立便  
擬怨驪駒

別同館

洵美西清彥如何苦憶歸一聲鴻信起萬樹葉

皆飛淡泊書生面蕭疎使者衣行藏各相見俯  
仰莫教違

沙溝見杏花寄長安同志

羯鼓催春十萬家龍池柳色盡含霞可憐寂寂  
沙溝水日暮行人也自花

郎君袍笏正嵬峩此日紅潮暈彩羅折取一枝  
憑驛信報君春色到黃河

途中志所見

河上揚塵日天邊貢篚時帷裳漸水薄書劍出



關疑壁盡馮夷笑圭成使者移輜軒有非是祗  
許寸心知

虎丘

木末已蒼然微陽挂客船鴉歸人影外鳥宿塔  
燈前宴坐經行地默參歌舞禪厭厭清夜咏月  
到可中圓

虎丘無題

秋水爲神玉爲骨眉頭無語香初發閭門細裊  
游絲春相思澹澹梅花月

清霜片片着衣乾紅燭行行影樹寒唱道月明  
歸去好游人啼鳥一時闌

上馮琢菴座師

宮隣誰第一典冊待君將欲識河山固先徵砥  
柱強春官真夙夜日御正初暘調燮需商鼎分  
封出夏璜乾坤瞻羽翼禮樂自吾皇喬木追先  
永芸花憶始芳大風吹垝漭穹嶽表顛昂才識  
推兼噐規趨儼大方降申通志氣冶化入文章  
䟽灑危明淚文迴却顧腸躬因王事蹇髮爲老

謀黃密畫安宮寢明謨弼廟廊論勲常處後借  
箸或從旁啟事多原牘賢書獨擅場紛紛諸吏  
士濟濟望宮墻雷鼓龍門曉雲深鳳閣涼匠材  
寧寸朽臣馬媿無良末路蹄先倦高天首忽驤  
戴山真欲舞飲海不知量久沐全枝借終然半  
壁望撫時悲少壯感舊惜輝光不改杯觴地曾  
沾篋笥香可憐長棄置還喜一相當貴敢忘藜  
莧歸誠足稻梁平生餘眈眈出處總津梁台席  
紆麻詔師垣望袞裳蒼生應自急燕雀若爲忙  
未嗣爲綸業誰知抒報錦囊心隨兒女入夢逐鴈  
鴻翔歷歷星辰上長懸舊直郎

丘寒谷先生八十

大理久朝列歿不貽寢丘負薪懼勿克吾生遑  
自謀緼絮結敝席腹中長休休問君何爲爾墳  
典羅床頭寂寥太音始碌碌安所求

鴻濛鬱人文苞符吐神理希微象數先浩衍圖  
書委不能市名譽自娛聊復爾鄰壁光已貧村  
壘久餘耻載酒時相從惟我二三子

浮沉老書蠹忽已登耆年親知走相賀漿醅羅  
堂前對之不能餐指我架上編韋編未三易我  
病行自還爲學喜不益撫已心晏然  
檢勘平生書如掃明窓塵窓塵掃復積千古常  
泯泯以茲悟玄化廓然得迷津彭鏗亦區區壽  
老空自珍跼踈窺井旁難爲達者陳

中泉范翁八十

老熟種樹書漸與山鳥狎問君草木年視我長  
一甲忽見春窓青相期理鋤鍾陰繁舊竹醉雨  
過新枝壓願拈無量花共說無量法

雪朝獨步園中上東城待酒不至

東城一以眺海氣何茫然浩浩天表明恍恍開  
林廛野色漸分樹人家猶未烟遠界寒河流莽  
接滄江天我思垂綸者對此心孔閒

飄雪落衣袂疑是樹上花樹上三五花蚤已迎  
風斜薄寒禁香氣可人隔窓紗眷言駐庭陰聊  
此留歲華臍酒未出房雪意消殘茶

春雪不待客獨游及崇朝歛然叩園扉排竹開

平橋熒熒碎玉葉隱隱見寒條道心共澄素虛  
宇曠寂寥參差群動來落鴉亂林梢

秋日玄宰邀飲舟中同仲醇游畸墅

得得山情近深深客意便高延九峯翠半借竹  
樓烟種樹書無恙看花榻尚懸滄洲吾欲共未  
許白鷗專

癸卯八月望社友陶逸則王閑仲從祖伯

栩同上春宮賦此以壯行色

津頭楊柳猶鳴蟬君胡急駕春風船八月潮頭

高拍天乘之欲賦明河篇長沙健翮新騰騫記  
君夢踏天門穿琅琊文字今誰專仲氏正熟黃  
梅禪太原袍笏當盛年汝宗孫子先着鞭鷄鳴  
壯舞結束便步擔歷落星斗圓竹堂風緊沙霰  
乾與君共割牛衣瓊有淚曾灑蕪城烟一朝六  
傳驅風還窮途反覆看已妍君不見平原珠履  
驚四筵成功尚在錐囊邊海內春秋推廣川三  
策忍齒慙不鮮撫時忠憤不可鐫藉子一吐彤  
墀前東村酒色如紅泉語簷燕子聲蟬連彼中

樂事知己偏有客問我我不言笑指天半三三飛  
鳶

雨中同仲醇過淮陰寺聽雪浪禪師講經  
出谷每相逢拈花得所同飲僧松影裏說法雨  
聲中自洗經行鉢還叅過去鐘殷勤留半偈欲  
解已成空

題白公石

愛此一拳石居然長五湖曾分池上碧肯學谷  
中愚尚迴星辰色寧彫冰雪膚影含松窈窕質  
伴鶴清癯洞小空全歛鱗皴浪暗輸鴈鴻峰外  
落蝌蚪壁間模下拜人如在能言骨未枯移山  
看已老更有舊題無

送張瀛海年兄還朝

春雲遙護紫宸居彷彿千官唱第初玉筍纔班  
池上客金蓮新直禁中廬幾多溫室難言樹更  
有彤墀未獻書白首尚矜臚次在天涯朋好莫  
教踈

夏日侍家君看周市蓮花還宿古塘其明

日齋于淮雲寺

朝氣北山昏清陰滿寺門一簾禪壁冷獨樹講  
堂尊禮佛能分供拈經擬共緇鉢蓮開面面如  
解比丘言

贈馬給諫時服先中丞之喪

客從遠方來蕭然臥竹院家世列鼎鐘中懷凜  
霜霰僧厨熟伊蒲未敢先先生饌難測情寄深但  
覺語際斷夜雨龕燈青薄言托禪觀爍爍素冠  
子是我心所歎

莽莽林薄間大夫亦徒行高談以當歌挂壁空  
酒鎗懷人苦不多萬里勞遠征聲聞陋小乘月  
旦輕世名寒泉藉修綆安能俟河清俟俟中丞  
公博謇垂令稱榮業何足道視子先民程

吾道有是非曾人笑東家千秋閉靈籥玄黃自  
萌芽幸托香火林蹇蹇驅鹿車俯仰去來今歛  
若棲浮苴山頭笙鶴聲過眼如流霞漏洩春光  
微君來嗅梅花

堅吾叔祖署敷宜興

荆溪碧水繞官衙  
滾滾諸生隔絳紗  
還許文章映桃李  
不妨吾道有龍蛇  
先儲破牖蘭陵酒  
次品驚雷陽羨茶  
北望五雲春樹裏  
一枝禁得上林花

訪歸季思

麥秀水西村  
伊人宛在門  
披帷風自遠  
入室氣如溫  
萬古不盈掬  
寸心聊可捫  
寂寥茶榻畔  
吾意亦忘言

罷藥翻緣病  
慵耕敢道貧  
踈梅真似我  
亂槿不關人  
草木山中曆  
弟兄原上春  
呼兒營小築  
未欲惱比隣

送曹中丞治河淮上

畫熊迢遞出關遲  
袞繡重來未可期  
四瀆故湏新節度  
三江仍稟舊旌麾  
長淮白日魚龍夜  
大澤秋風鴻鴈時  
舟楫賴公無恙在  
汙萊東土若爲治

乙巳清明後新霽踏青時春寒間有霜

日出東城花氣揚  
叢叢游女大堤香  
今朝北郭

蘼蕪路故是清明風雨場冷碧尚禁新變火踈  
紅欺得晚來霜當杯底事傳籌急不見簷前燕  
子忙

王家渡看桃花是日微苦暄俱步仲醇韻  
楊柳絲青欲繫船船頭紅紫趁人鮮千村煖霧  
烘茅屋一道晴霞入暮田客到轉思留客雨花  
深更愛養花天斜陽渡口從相識桃葉桃根不  
記年

春日同諸君看桃花汝戢墮水先歸走筆

戲之

十里茫茫樸花霧游人棹頭不還顧忽報楊郎  
出水坐尚沐楊枝半身露誰爲詛子春花前背  
人瞑立滄浪烟水中歷歷花影然照儂雙眼不  
得眠君不見薛主簿魚頭落几身臥席又不見  
洛中人不免更索癡龍食人生倚伏豈有極此  
日此花難再得不須津頭賽河伯但莫尊前避  
惡客

同仲醇諸兄飲藤花前



客來索我桃花詩桃花已轉藤花時常將春服  
二三子憶得晴烟千萬枝藤花滿架香不足更  
結青蘿上修竹一片蔚藍天上雲忽化寒溝半  
灣綠東園老人插垂楊對此攀條空斷腸未論  
老瘦禿如幘且喜新柳過人長柳南鶯雛入花  
串人心亦隨鳥語變二十四番花信歸桃花反  
覆看人面

贈石亭醫伯

肘後青囊到處懸維摩嘗得病中禪傳家更有

書千卷不愛人間賣杏錢

鄧尉山觀梅

檻外平湖匹練光鬢髮梅塢共低昂茫茫十里  
晴嵐白隱隱千林水月涼雪裏人家兼浪湧鏡  
中魚鳥媚花香由來未踏江干路庾嶺揚州湯  
短長

葵藿堂

露裏朝葵可採風中秋藿先飛谷口年年魚鳥  
五陵老盡輕肥

坐隱亭

夢殘書在四壁坐起香銷半  
跏人影綠沉苔蘚  
漁村白滿蕪葭

問月軒

半額簾旌未捲一床簟色先寒  
墻外梨花弄白  
居然月掛林端

眺雪齋

滕王蛺蝶成陣蔡州鷺鴨皆軍  
獨眺意中何限  
一燈漁火聊分

登子房山謁子房祠

霸畧千年盡風雲尚爾祠  
山河留氣色冠劍表  
鬚麋心事終黃石功名共紫芝  
東園有遺老長  
此托風期

秋季再過君策丈山園小飲抵暮而別

輕舟繞出神仙趾山下人家半  
流水風光的的  
武林源到門依舊平原里路轉溪迴百不同  
秋  
葉髣髴當階紅洞房窈窕路欲絕飛梁忽跨高  
樓風樓前參差戛寒竹藤子垂垂挂樛木人面

斜陽映晚曛鳥背濃烟帶微綠堂前橘柚香輪  
困主人未敢言山貧曲欄深閉五千卷等閒肯  
示尋常人山寺無鍾送客別與君坐到鳥聲歇  
相携忽過板橋東一笑溪潭半弦月

仲醇授經弁園歲暮歸送之

白日傳經罷高齋閉晝陰蟲魚饒書案童稚報  
車音舒卷四時氣回翔千古心家家能設醴偏  
向故人深

桃葉春堤暖梧陰夏簟清斯人發高詠灌木盡  
成聲歲共殘燈暮花仍舊臆明總關寥落意與  
爾得無情

豈謂便成別思君已不堪多言殊恨少苦語幾  
回甘臆樹黃初盡河水綠尚含好留雙屐影隱  
隱着西弁

臆月望日同仲醇過楊氏放生亭中看放生齋茗而退

西風截岸歸潮逆蟹斷魚梁亂如織詹何任公  
競好手勁弩長絲共逼側落羽更飽俊鷗拳窮

鱗尚滿淘河臆慈雲忽覆河上亭道傍隱隱明  
龕燈龕燈發光磬發聲囚魚檻鳥皆奔騰徘徊  
怨頸却反顧逡巡妬眼留餘憎如聞嗚嗚水底  
語已見簇簇簷頭舞豈惜齒角登君庖念此生  
成天地苦白日曾遮木葉衣滄波不泣桑薪釜  
萬里雲羅鴈字圓千層碧浪蛟珠吐啣環化印  
都渺茫見此自覺心洋洋朱門可憐酒肉臭對  
案忽送茵陳香剩粒殘羹施江汜網影縱橫不  
驚餌桃花信信春濤空蘆芽陣陣春魚起若處  
津橋捲釣竿見說西村罷蝦市共向亭前看放  
生放生長者名流水

東坡作戒殺詩貽陳季常季常自後不復  
殺岐亭之人多化之有不食肉者正欲拈  
出示俗適有感于吾里宴會之侈因和前  
韻得三詩示閑仲肯偈此戒于里中不也  
人饑慕梁肉肉厭思茗汁徑寸神明倉虵蚘爭  
暖濕珍味縱可窮饑飽要自得于我實腐餘于  
彼捐所急曲曲方塘邊擾擾牧鷄鴨時哉謹棲

止柳花作茵幕憐汝巢卵傾恐使羽毛赤每來  
待曲宴倒甕浮大白漸爲腰緩帶或遣頭穿幘  
釜熟薪且勞餅飽湯已泣少損郇公厨鼎籩未  
爲缺淡然天人糧請以羞主客一枕茶寮清時  
時共來集

解牛豈無刀函牛恨多汁可憐登庖肉日且耳  
猶濕桑下有饑人一飽不可得我已摩腹行甕  
子進逾急砮柳穿跳魚擿丸射生鴨素鱗凍銀  
盤紅虬挺青幕大烹爲誰來呀然面發赤安得

口中膾盡化草頭白本慙肉食鄙未老先投幘  
但對花鳥笑何負酒槽泣口實不願餘留此小  
陷缺吾黨餽粥斯勿若旅郵客好樂無已康良  
士憂所集

飲酒不盡樽啜肉不盡汁同生天地間念此相  
响濕每見肉食人豈藿亦甘得齧牛挂脯林無  
乃非其急窓前能談鷄欄旁自名鴨性命嗟有  
制俄爾膏鼎羃五蟲毛領殊共茲一腔赤蜣螂  
縱高飛曷思螻中白強力相噬吞何異虎而犢

撫已胡功能忍彼釜底泣吾欲食稱事稍補百  
行缺乞汝耕饁餘施我不速客願同雀鷓馴欣  
然掌中集

觀周林二君棋

鑄中火猶生枕上香已熟拋我讀殘書看君未  
殘局

寥寥三尺枰龍戰鉅鹿野誰握最先籌壁上觀  
戰者

索我數行書如睹山陰墅樵斧雖不靈十指亦

能語

作客人未歸釀寒秋且變因却打窓風丁丁雨

聲斷

羽觴流波

但有茂林修竹處處蘭亭永和  
不愁酒盃無羽  
只有流水生波

步虛臺

送罷九秋落日獨疑長天緒風不見滄桑海底  
時聞笙鶴雲中

華子渠

草肥春水將至花落新泉未疏一夜自通雨塹  
朝來喜罷雲鋤

禮星石

歷歷白榆未死落落瓠瓜可餐壇前斗柄西指  
片石秋芒自寒

附詞

詠春暮調踏沙行

公子閑居花奴告老鬢髮沙雨和風掃青天酒

幔石榴紅大堤紈扇蒲葵小待可重來向誰  
尋討闌干盡日歸黃鳥兒童鄭重數榆錢一回  
不見春光好

咏墻外春調南鄉子

午日暈紅椒流白天絲任意飄酒幕香車東去  
了聊蕭燕子啣花坐淺巢茂苑更春饒柳葉  
蘆芽月滿橋席底人人應念道櫻桃剩得鶯殘  
雨又敲

蘆鴈調如夢令

風起蘆花如醉歷歷鴈行成字一點一聲寒霜  
重曉楓羣碎知未知未只在淺深河際

送仲醇歸調點絳唇

濕夢沉沉芭蕉雨嚮燈花卸月兒來也人又隨  
潮下最怕登高醉面秋風灑紅堪把茱萸看罷  
半刻重陽假

閨門夜泊叙懷

刻燭呼盧西風乍急簷頭鐵故人涼熱依舊朦  
朧別山淡雲濃漸短憨兒髮楊花月溪橋雨

滑坐到微鍾歇

正月晦前一日拉友人賞盆中梅念家園  
梅林中不釋戲成詞數闋詞寄二犯江兒  
水

梅花報道昨夜裏梅花報道春光到樹梢看娟  
娟弄色楚楚抽條傍闌干一簾清俏輕風吹素  
絹黃昏轉玉翹破臘偷瞧羞伴天桃咏花人若  
問我湏及早薄寒未消只恐怕薄寒未消絳  
籠着且將那綠紗籠着冷蕊禁春索共招邀



何郎到來且喜我何郎到來流香生敝齋這芳  
蕤欲語粉面垂擡覩知音春愁似海連拳嫩  
捱盤龍矮髻歪露葉啼開漸把風猜嘆花神子  
星星兒頭早白清醺滿杯休辜負了清醺滿杯  
黃沙蒙蓋忽地裏黃沙蒙蓋試問陰鏗昨勝今  
來

好花眼前有幾日好花眼前一腔春未剪且傍  
香開宴趁影橫眠借風流將花笑撚酒拍水晶  
盤茶拋竹臼烟醉舞便便仔細俄延怪花頭半